

Vate

Kovara Kulturi

Hûmare: 22

Wesar 2004

Serredaktor

Malmîsanij

Redaksiyon

Haydar Diljen, J. İhsan Espar,
Malmîsanij, Mehmet Uzun

Însiyatîfe destpêkerdişî

Osman Aytar, Yıldırıay Beyazgul,
Çeko, Munzur Çem, Memo Darrêz,
Nihat Elî, Cemîl Gundogan,
Lerzan Jandîl, Huseyîn Kulu,

Seyîdxan Kurij, Robîn Rewşen,
Kazim Temurlenk, Şukrî Urgun

Temsîlkarê Almanya

Munzur Çem
Faks: +49 - 30 - 611 33 19

Seba aboneyîye û têkiliye (Almanya de)

Vate

Postfach: 30 21 07
10 752 Berlin/Almanya

Temsîlkarê Norveçî

M. Darrêz
Munkegt, 2

0656 OSLO /NORVEÇ

Temsîlkarê Hollanda

Şukrî Atîk
Poelenburg 30
30 85 KT

Rotterdam/HOLLAND

Sertê aboneyîye

Welat	serrek	6 aşmî
Tirkîya:	20 Euro	10 Euro
Almanya:	20 Euro	10 Euro
Swêd:	250 SEK	125 SEK
Welatê bîni:	40 Euro	20 Euro

Vayî: 5 Euro/50 SEK

Îlan

Rîpelêk: 100 Euro/1000 SEK

Nêmîpel: 50 Euro/500 SEK

Çarêgrîpel: 25 Euro/250 SEK

Çap: Apec Tryck & Förlag, Stockholm

ISSN: 1401-2995

Postgiro

Kurdiska Kultur och Språkföreningen
475 16 98-4 SWEDEN

Adresa têkiliye

Ihsan Türkan
Eksätravägen, 186
S-127 61 Skärholmen/SWEDEN
Tel: +46-(0)8-97 76 56
E-mail: espar@bredband.net

Berpirsiyarîya her nuşteyî ya nuştoxi/nuştoxe bi xo ya.

TEDEYÎ

Wendoxan rê	3
Derheqê Kirmancî (Zazakî) de Kombîyayîşê Diwêşine	4
Mutlu Firat , Çimê To Ke Înê	33
W. K. Merdimîn & N. Celalî , “Zûnî Ma Weş o Feqet...”	34
Mela Mehmed Eli Hunî , Mewlidî Peyxemberî	56
Serdar Bedirxan , Ziwan û Edebiyatê Kurdkî	72
Xidir Çelik , Yara Min a	74
Ercan Sarıçek , Hesen Efendîyê Başkoye	75
Burhan Beyazyıldırım , Dewran To rê Kî Nêmaneno	77
Ehmedê Dirihi , Kirmancî de Nameyê Tayê Nebatan	78
W. K. Merdimîn , Hîna Baş o	80
Seyîdxan Kurij , “Eskerûn Her Çî ma Vêşnabi”	81
Seyîdxan Kurij , “Kur ra 33 Tên Kişiyyat”	84
Gulbehar Çelik , Ti Melema Zerrî ya	88
B. Şilan , Derheqê Kirmancan (Zazayan) de Konferans	89
N. Celalî , Şinasî	92
Lerzan Jandîl , Raweya Fermanî	93
Newzat Valêrî , Oy Hewar Dilê Mi!	105
Akman Gedîk , Ti Kotî ya? Vejîye Bê!	106
Roşan Lezgîn , Îdyomê Ma-VI	108
M. Mîrzânî , Meşû Berfin	116
Aysena Kurdi , Derûdormeyê Bongilanî ra Tayê Vateyê Verênan	118
Nevzat Gedîk , Boglate Biye	120
Xezala Şarîkî , Dormeyê Palî ra Çend Îdyomî (Deyîmî)	121
Mela Mehemedê Muradan , Çimûn Xwi Ak'	124
Kitabê Kirmancî (Zazakî)-XI	126

WENDOXAN RÊ

Wendoxê delalî,

Kombîyayîşê Kîrmancî yê Diwêsite (Des û Dîyine) aşma nîsane de bi. Netîceyê nê kombîyayîşî na hûmara de yê.

Na hûmara ma hîna zaf bi nuştayanê nuştox û wendoxanê welatî xemiliyaya. Çewlîgî ra W. K. Merdimînî û N. Celalî reyna roportajêko muhîm şawito (rusnayo). No roportaj derheqê Mela Mehmed Elî Hunî de zanayışê ma zîyade keno. W. K. Merdimînî mewlidê Mela Mehmed Elî Hunî transkrîbe kerdo. Ma ey na hûmara de neşr kenîme.

Seyîdxan Kurijî zî di dewijan de roportaj kerdo. Nê roportajî derheqê zulmê 1925î de agahdarî danê.

Lerzan Jandîl nuştayê xo de raweya fermanî ser o vindeno. Ehmedê Dirihi, nameyanê nebatan bi kîrmancî (zazakî), latînkî û tirkî nuseno. Ercan Sariçek, Hesen Efendîyê Başkoye bi wendoxanê ma dano naskerdene. Serdar Bedirxan bi ziwanê xoyê weşî rexneyanê xo nuseno. Aysena Kurdî tayê vateyanê verênan ê derûdormeyê Bongilanî pêşkêş kena. Nuştayê Roşan Lezgîn û Xezala Şarikî na hûmara de dewam kenê.

Na hûmara ma de gelek şîîrî zî estê.

Ma nê nuştoxan û şâîran hemîne (pêrune) rê sipas kenîme, keyeyê înan awan bo.

No beyntar de des ra zafer kitabê kîrmancî vejîyay. Na gamêka zaf muhîm a. Şima rîpelanê ma yê peyênan de kopyaya qapaxanê nê kitaban vînenê.

Sey her hûmara ma wazenîme ke şima bi wendişê na hûmara zî şa bibîn.

Vate

DERHEQÊ KIRMANCKÎ (ZAZAKÎ) DE KOMBÎYAYÎŞÊ DIWÊSINE

Stokholm, 03.04.2004 - 08.04.2004

Roja 3.a menga (aşma) nîsane, Stokholm de kirmancık (zazakî) ser o kombîyayîşê diwêsinê (des û dîyine) dest pêkerd û şes rojî ramit. Nê kombîyayîşî de nê des kesî amade bîy:

Aydin Bîngol (Gimgim)
Munzur Çem (Dêrsim)
Haydar Diljen (Sêwregi)
J. Îhsan Eşpar (Pîran)
Wisif Kaymak (Pîran)
Huseyîn Kulu (Dêrsim)
Seyîdxan Kurij (Çewlîg)
M. Malmîsanij (Pîran)
Selîm Mûrat (Pali)
Mehmet Taş (Dêrsim)

Nê kombîyayîşî de, amadebîyayoxî wendişê herfanê alfabeya ma û tayê çekuyan (kelîmeyan) ser o vindertî û meylê xo tesbît kerdi. Çekuyê nê kombîyayîşî hîna zaf nameyê kel-melê keyeyî (eşyayê çeyî) bîy. Cêr ra şima netîceyanê kombîyayîşî wanenî.

WENDIŞÊ HERFANÊ ALFABE

Herfê alfabeya kurdîkî nê yê:

a, b, c, ç, d, e, ê, f, g, h, i, î, j, k, l, m, n, o, p, q, r, s, ş, t, u, û, v, w, x, y,

z.

Wendişê herfanê corênan wina yo:

a, be, ce, çe, de, e, ê, fe, ge, he, i, î, je, ke, le, me, ne, o, pe, qe, re, se, şe, te, u, û, ve, we, xe, ye, ze.

TAYÊ ÇEKUYÊ (KELÎMEYÊ) NEWEYÎ

açan: akerdox, -e; rakerdox, -e

wekerdox, -e wekerdiş, wekerdayîs, yakerde (n), yakerdiye (m)

acık: akerde (n), akerda (m);

rakerde (n), rakerdiye (m)

wekerde (n), wekerdiye (m) yakerde (n), yakerdiye (m)

açma: akerdiş, rakerdiş

wekerdiş yakerdiş

açmak: akerdene, rakerdene

wekerdene yakerdene

ahr: axur (n) axure (m)

ahize: ahîze (n) ahîza (m), ahîze (m)

akım: cereyan (n) ceryon (n), ceryûn (n), ceyran (n), ceyron (n),
ceyrûn (n)

alafranga: alafranga elefiranga, elefiranxa, elafranga, elefiranqa

alafranga tuvalet: tuwaleto alafranga (n)

alaturka: alaturka eleturka

alev: kile (m) kil (m)

kilawe (m) kilwe

alawî (m)

alıcı: girewtek (n)

alıcı (telefon için): b. **ahize**

almaç (telefon için): b. **ahize**

ambar: embar (n) ambar (n), imbar (n)

kuware (n) kuvari (n), kquare (n), kuari (n), kare (n), kari (n)

ampül: ampul (n) ampule (m)

apartman: apartman (n) apartmane (m), apardumoni (m)

apteshane: b. **yüznumara**

ardkiye: erdiya (m) ardîya (m)

depo (n) debo (n), debû (n)

aspiratör: b. **emmeç**

AŞAMA: merhele (m) merhale (m)

avlu: hewş (n) hewşe (m), howş (n), hoş (n)

ayakyolu: b. **yüznumara**

ayna: neynik (m) nenik, nênik (m), lîlik (n)

eyne (n), eynik (n) eyni (n), eyna (m), eyniye (m),
êne (n); ayne (n), hayne (n)

qutîye (m)

- ayran:** do (n) due (n)
- ayvan:** 1)b. **balkon** 2)b. **salon**
- baca:** lojine (m) lozine (m), lojini (m), locini (m), lujini (m)
pixêrî (m)
tifike (m) tifiki (m)
- badana:** şitawe (m)
çerpe (m) çerpi (m), cirpi (m), çerpeki (m), çepeki (m)
badana (m) badene (m), badûne (m), bedene (n)
- bakraç:** beroş (n) biroş (n), biros (n), bures (n), burês (n)
xizik (n)
qazik (n)
- balkon:** balkone (m) balqone (m), balkon (n), balqon (n)
şûmşîne (m) şûmşin
- bant:** band (n) bande (m)
kaset (n) kasete (m), qaset (n), qasete (m)
- teyp bandı:** bandê teyîbe (n) bandê teyibi (n)
kasetê teyîbe (n)
- video bandı:** bandê vîdeoŷî (n) bandê vîdeoysi (n), bandê vîdoyî (n)
kasetê vîdeoŷî (n) kasetê vîdeoysi (n), kasetê vîdoyî (n)
- banyo:** awke (n)
banyo (n)
hemamek (n) hemomek (n)
çale (m) çal (m)
çerx (n)
- banyo almak:** b. **banyo yapmak**
- banyo dolabı:** dolaba awkeyî (m), dolaba
banyoyî (m), dolaba hemamekî (m), dola-
ba çale (m), dolaba çerxî (m)
- banyo havlusu:** xewlîya banyoyî (m)
- banyo kazanı:** qazanê awkeyî (n), qazanê
banyoyî (n), qazanê hemamekî (n), qa-
zanê çale (m), qazanê çerxî (n)
- banyo kürsüsü:** kursiyê awkeyî (n), kursiyê
banyoyî (n), kursiyê hemamekî (n), kursî-
yê çale (m), kursiyê çerxî (n)
- banyo yapmak:** sereyê xo şutene, xo şutene
- baraka:** baraqa (m) bereqa (m)

- bardak:** bardaxe (m) bardax (n)
 şuse (n) şushi (n), suse (n)
- bardak altı:** binbardaxe (n)
- çay bardağı:** bardaxa çay (m) bardaxê çay (n)
 şusyeyê çay (n) şuşê çay (n), susey çay (n)
- su bardağı:** bardaxa awe (m), şusyeyê awe (n)



Kombîyayîşê diwêşine ra

- basamak:** linge (m) ningi (m)
 palike (m)
 paynike (m) paynik (m)
 silime (m) silimi (m), sulimi (m), sulumi (m)

merdiven basamağı: linga nêrdîwa-
 ne (m), palika nêrdîwane (m), pay-
 nikâ nêrdîwane (m)

basma: pay ... nayîş

basmak: pay ... nayene

Yorgana bastı. (Pay lîhêfi na.)

battaniye: betanîya (m) batanîya (m), batanîye (m), batûnîya (m),
 batûnya (m), betanî (m), betana (m)

bavul: bawule (m) bawuli (m), bawili (m), bawil (n), bawol (n)

bıçak: kardî (m)

ceviz içini kabuğundan çıkarmak

için kullanılan bir bıçak çeşidi: goz-

veje (m) gozvece (m), guazvec (m), guezvec (m)

meyve bıçağı: kardîya meyweyî (m),

kardîya fêkîyî (m)

ekmek bıçağı: kardîya nanî (m)

kardîya kalanî (m) kardîya kalenî (m), kardîya kalonî (m),
kardîya kalnî (m)

iki tarafı kesen bıçak: kardîya difeke (m)

kardîya alafranga (m) kardîya elefiranxa (m)

kabzasız bıçak: şîlf (n) şîfl (n), şîfil (n)

kesici tarafı testere gibi dişli

olan bıçak: kardîya birrekine (m) kardîya birrikine (m)

küçük bıçak: gilazinge (m), kardîya qije (m)

bidon: bîdon (n) bîdûn (m), vîdon (n), vîdûn (n)

su bidonu: bîdonê awe (n) bîdûnê awk (m), vîdonê awi (n)

bilgisayar: komputure (m)

bina: ban (n)

binanın çatısını çatmakta kullan-

nılan ince çubuk: martag (n) mardak (n), mirdaqe (m), mirdaqi (m), mirdyaq (m), mirdîyaq (n)
çirpî (n)

binanın çatısını kaplamakta kullan-

nılan yaprak, sap, ot vb.: kewaşe (n) kewose (n)

binanın çatısını taşıması için tavan-

da yatay olarak dizilen kalın direk-

lerden her biri: maxe (m) maxi (m)

pirde (m) pirdi (m)

çuwe (n) çiwe (n)

kêran (n) çêran (n), çêrang (n)

bira: bîra (m)

bodrum: bodrum (n) bodrim (n)

boncuk: mura (m) müra (m), mira (m), more (m), moreke (m)

bornoz: bornoz (n)

- boru:** lulî (m) lule (n), lûle (n)
 borî (m) borrhî (m), borriye (m), borîye (m), buarrî (m),
 buarî (m), buerrî (m), buerî (m)
- soba borusu:** lulîya soba (m), borîya soba (m)
- briket:** pîrîket (n) pîrket (n)
- bulaşık:** firaqê nêşuteyî (zh)
 qabê nêşuteyî (zh) qab-qacaxê nêşuteyî (zh)
- bulaşık makinesi:** makînaya firaqan (m) makînay firaqon (m), makînê firaqûn (m)
- bulaşık sepeti:** sela firaqan (m) seley firaqon (m),
 selê firaqûn (m), selê firaqû (m)
- bulaşık suyu:** firaqsû (m) firaqşuy (m), firaqşî (m)
- buz:** qeşa (n), cemed (n)
- buzdolabı:** dolaba qeşayî (m)
 dolaba cemedî (m) dolabê cemedî (n)
- büfe:** bufâ (m) bufe (n)
- CD:** CD (m)
- cep:** câbe (m), tûnike (m)
- cep telefonu:** telefonê destan (n)
- cereyan:** cereyan (n) ceryon (n), ceryûn (n), ceyran (n), ceyron (n),
 ceyrûn (n)
- cezve:** cezwe (n) cezve (n), cezvi (n), cezbe (n)
- cimbız:** müçîne (m)
 qisqance (m) qisqonci (m), qisqûnc (m)
 cimbize (m)
- cin** (içki): cîn (n)
- çakmak:** adirge (n) adirgi (n)
 çeqmaq (n) çaqmaq (n)
- çamaşır:** kincnêșuta (m)
 cilnêșuta (m)
- çamaşır günü:** roja kincan (m), roja cilan (m), roja çinayan (m), roja pîrênan (m)
- çamaşır leğeni:** leganê kincan (n) legenî kincûn (n), legena kincan (m), legana kincan (m)
 leganê cilan (n) legenê cilon (n), lenganê cilan (n)
- çamaşır makinesi:** makînaya kincsutîşî (m), makînaya cilşutîşî (m)
- çamaşır sepeti:** sela kincan (n)
 sela cilan (m) seley cilon (m), selê firaqûn (m), selê firaqû (m)

çamaşır yıkama ve yıkanma zama-

nı: şüy (n) şue (n)
 robar (n) rovar (n)
 dilavî (n)

çanak anten: tewqe (m), tewqa satelitî (m) çanaq (n)

çanta: çante (n) çente (n), conte (n), cûnte (n), çûnti (n)

el çantası: çanteyê destan (n) çenteyê destan (n), çûntê destûn (n)

kol çantası: çanteyê polî (n) çenteyê polî (n), çûntê quelî (n)

sırt çantası: çanteyê piştî (n) çantey paştî (n), çenteyê piştî (n), çûntê paştî (n)

çarşaf: çarşefe (m) çarşefî (m), çarşef (m), çarsefe (m), çarşeve (m),
 çarşewe (m); çarşefî (m), çarçef (m)

yatak çarşafi: çarşefa doşekî (m)

çatal: çetale (m) çetali (m), çetele (m), çeteli (m), catale (m),
 çatal (m), çatal (n)

çatı: serban (n), çatî (n)

çatı katı: qatê serbanî (n), tebeqê serbanî (n)

çay-I: çay (m)

çay bardağı: bardaxa çay (m) bardaxê çay (n)

şuşeyê çay (n) şusê çay (n), susey çay (n)

çay kaşığı: koçığa çay (m) koçikê çay (m), kueçikê çay (m)

çaydanlık: çaydane (m) çaydan (n), çaydoni (m),
 çaydûn (m); çaydanki (m), çaydang (n)

çeper: b. çit

çerçeve: çarçewa (m) çarçewe (n), çarçiya (m), çarçewa (m), çerçewe (m), çarçifa (m)

çit: percîn (n) parçin (n), perjîn (n), percîn (n), percîyeni (n)
 çeper (n)

çuval: ciwal (n)

çuvalın ağızını dikmek, çarık ve ço-

rap bağlamak vb. için kullanılan

kıldan yapılmış ip: arozî (m) arûzi (m)

şimûndî (m) şimondî (m), simondî (m), şimûnd (m),
 şimûнд (m)

daire: dayîre (n) daîre (n), dayre (n), dayra (m)

dantel: tentene (n) temtene (n)

dantel iğnesi: b. tiğ

dantel ipliği yumacı: b. kuka

dantela: b. dantel

- demlik:** 1) çaydane (m) çaydan (n), çaydoni (m), çaydûn (m); çaydanki (m), çaydang (n)
 2) demlige (m) demlig (n)
- depo:** depo (n) debo (n), debû (n)
- silah deposu:** depoyê çekan (n), depo-
 yê sîlehan (n)
- dijital:** dîjîtal, -e
- dikiş:** deştene (m)
- dikiş makinesi:** makînaya deştene (m) makînay deyşteni (m)
 makînaya deştiş (m) makînê deştiş (m)
- diş:** 1) didan (n) 2) nek (n)
- diş macunu:** macunê didanan (n) macunê dindanan (n), mecumê didanan (n),
 macûnî dindûnûn (n)
- diş fırçası:** firçeyê didanan (n) firçeyê dindanan (n), firçey dindûnûn (n)
- divan:** dîwan (n)
- dolap:** dolabe (m) dolavi (m), dulav (m), dilavi (m); dolab (n), dolav (n)
- banyo dolabı:** dolaba awkeyî (m), do-
 laba banyoyî (m), dolaba hemamekî (m),
 dolaba çale (m), dolaba çerxî (m)
- elbise dolabı:** b. **gardırop**
- giysi dolabı:** b. **gardırop**
- don:** tumanî (zh) timanî (zh), timonî (zh), timûnî (zh), timûn (zh)
- don** (kadın donu): pîrênbâzî (zh), tumanî (zh)
- döşek:** doşek (n) doşeg (n), doseg (n), dueşek (n), dueşeg (n)
- duş:** duş (n)
- duş perdesi:** perdeyê duşî (n)
- duş yapmak:** awe xo ro kerdene
- duvar:** dêş (n) dîyes (n)
 dîwar (n)
- duvar halisi:** xalîya dêşî (m), xalîya dîwarî (m)
- duvar resmi:** resimê dêşî (n), resimê dîwarî (n)
- duvar saati:** saeta dêşî (m), saeta dîwarî (m)
- sadece taşlardan örülen harçsız du-**
- var:** huşkdêş (n) wişkdêş (n)
- düğme** (giysi için): gojage (m) gojäge (m), gojagi (m), guejak (m), gojek (m),
 gujak (m); gocage (m), gocege (m), gocag (m),
 gocake (m), gocak (m), guçak (m), guecak (m),
 guicak (m); gozage (m), gozagi (m), gozege (m)

- make (m) maki (m), mak (m)
- bışkoje (m)
- qumça (m)
- sedefe (m) sedefi (m)
- zirare (m) zirari (m)
- düğme** (makine vb. için): gojage (m)
- DVD**: DVD (m)
- el**: dest (n)
- el feneri**: elektrikê destan (n) eltîrika destan (n)
- el havlusu**: xewlîya destan (m)
- eldiven**: lepik (n) lapik (n)
- elektrik**: elektrîk (n) elektrîk (n), elektirîke (m), eltîriki (m), eltrîk (n), eletrîk (m), eletrîge (m); alatîrik (n), alatirkî (n), alatirk (n)
- cereyan (n) ceryon (n), ceryûn (n), ceyran (n), ceyron (n), ceyrûn (n)
- elektrik feneri**: elektrikê destan (n) eltîrika destan (n)
- elektrik fırını**: firina elektrîkine (m) firma eltîrikini (m), purna elektrîkin (m)
- elektrik ocağı**: ocaxa elektrîkine (m)
- elektrik prizi**: prîzê elektrîkî (n) prîza alatirkî (m)
- elektrik süpürgesi**: geziyo elektrîkin (n)
- elektrikli calorifer**: kalorîfero elektrîkin (n)
- emmeç**: aspirator (n)
- enkaz**: b. yıkıntı
- entari** (gecelik entari): pirên (n) pêrîn (n), piryen (n)
- kadın entarisi** (gecelik entari): binfis-tan (n), pirên (n) binfiston (n), binfistûn (n)
- eşik**: 1)şêmûge (m) şêmuge (m), sêmuge (m), sêmige (m)
suxber (n) suqbe (n)
zifqêre (m) zifqêri (m), zifqêli (m), zilqêr (n)
- et**: goşt (n)
- üzerinde et dövülen kütük**: qote (m)
- etajer**: etajer (n)
- ev**: keye (n), ban (n)
- tek katlı ev**: bano erdî (n), bano yew-qat (n), bano yewtebeq (n), bano yewqanat (n)
- eyvan**: b. ayvan

fanus: fanose (m) fanûse (m), fonosi (m), fûnosi (m), finos (m), fenus (m), fonos (n)

fener: fenere (m) fener (n)

el feneri: elektrîkê destan (n)

elektrik feneri: elektrîkê destan (n)

fırça: firçé (n)

diş fırçası: firçeyê didanan (n) firçeyê dindanan (n), firçeyê dindûnûn (n)



Kombîyayîşê diwêsine ra

saç fırçası: firçeyê porî (n)

firçeyê gjijikî (n) firçê gjijik (n)

tıraş fırçası: firçeyê tiraşî (n), firçeyê taş-tışî (n), firçeyê terdişî (n)

fırın: firine (m) firini (m), firni (m), firûni (m), purni (m), purn (m)

elektrik fırını: firina elektrîkine (m) firma eltîrikini (m), firina alatirkine (m), purna elektrîkin (m)

fırın eldiveni: lepikê firine (m)

gazlı fırın: firina gazine (m)

fincan: fincane (m) fincan (n), finconi (m), fîncûn (m)

- porselen fincan:** fincana porselenêne (m)
- fistan:** fistan (n) fistan (n), fiston (n), fistûn (m)
- fitil:** fitîl (n) fitil (n), fitil (n), fitili (m), fitili (m)
- lamba fitili:** fitîlê lamba (n) fitilê lamba (n), fitilê lamba (n), fitîley lamba (m), fitîla lamba (m)
- floresan:** floresan (n)
- floresan lamba:** lambaya floresanine (m)
- flüorisil:** b. **floresan**
- fritöz:** frîtoz (n)
- garaj:** garaj (n) xeraj (n)
- gardırop:** dolaba kincan (m) dolabê kincan (n), dulavê kincûn (m)
dolaba cilan (m)
- gardirobe:** gardirobe (m) xardilobi (m), qardulabi (m), gardolabe (m)
- gaz:** gaz (n) gaze (m), qaz (n)
- gazlı firın:** firina gazine (m)
- gaz lambası:** 1) lambaya gazyaxî (m) lambaya qazaxî (m), lamba qazexî (m), lambê qazî (m), lamê qazî (m)
2) çila (m), çilaya gazyaxî (m)
- gaz lambasının konduğu yer:** çiladane (m)
- gaz ocağı:** gazocaxî (m) qazocaxî (m)
- gaz sobası:** sobaya gazî (m), sobaya gaz-
yaxî (m)
- gazyağı tenekesi:** tenekeyê gazyaxî (m) tenekeyê qazaxî (n), tenekey qazexî (n), tenekê qazî (n), tenekeyê qazî (n), tenkey qazaxî (n)
- gazyağı:** gazyaxî (n) qazaxî (m), qazexî (m), qazyaxî (n)
- girgir** (süpürge türü): girgir (n)
- gozer:** seradî (m) serradî (m), serrat (m), siradî (m)
- gramofon:** gramafone (m) gramafon (n), qramafûn (m), qerebafuni (m)
- halı:** xalî (m), xalîye (m) xalî (n), xali (n)
- duvar halısı:** xalîya dêsi (m) xalîye dêsi (n), xalî dîyêsi (n)
xalîya dîwarî (m)
- küçük halı:** xalîça (m) xalîçe (n)
- hamam:** hemam (n) hamam (n), hemom (n), hemûm (n)
- hamam taşı:** tasa hemamî (m) tasa hamamî (m), tasey hemomî (m), tasê hemûmî (m), tosa hamamî (m)
- hasır:** hesîre (m) hesîri (m), hasir (n), hesir (m), xesir (m), xasir (n),
xesîl (m), qesîl (m), astir (m)
- havlu:** xewlî (m), xewlîye (m) xavlîye (m), xawlîye (m), xawlî (m), xowlî (m), xolî (m)

- el havlusu:** xewlîya destan (m)
- banyo havlusu:** xewlîya banyoyî (m)
- hela:** b. **yüznumara**
- hol:** b. **sofa**
- ibrık:** mesîne (m) mesîni (m), mesîn (m), mêsîn (m)
ibriq (n) îvriq (n)
- icecek:** çiyê şimitîş (n), meşrubat (n)
- içki:** şimite (m)
- alkollü içki:** şimita alkoline (m)
- içki kadehi:** qedeha şimite (m)
- iğne:** derzîne (m)
- çengelli iğne:** firkete (m) firketi (m), filkete (m), filketi (m)
- dantel iğnesi:** b. **tiğ**
- iğne yastığı:** b. **iğnelik**
- yorgan iğnesi:** pincirarî (m)
- derzîna lihêfan (m) derzîney leheyfon (m), derzînê lehêfûn (m), derzînê liheyfûn (m)
- iğnededenlik:** b. **iğnelik**
- iğnelik:** derzîneke (m)
- derzîdane (m) derzîdanke (m)
- balişnaya derzinan (m) balişnê derzinûn (m)
- jaluzi:** jaluzi (n)
- jilet:** cîlet (n) cîlat (n), cîlêt (n); cîlate (m), cîlete (m), jîlete (m)
- kabza:** deste (n)
- kadeh:** qedehe (m) qedîhe (m), qadehi (m), qedîhi (m); qedeh (n)
- ademhane:** b. **yüznumara**
- kafes:** qefes (n)
- kağıt:** kaxite (m)
- tuvalet kağıdı:** kaxita tuwaletî (m),
kaxita keneffî (m), kaxita destawxa-
neyî (m), kaxita awdestxaneyî (m)
- kahve:** qewe (n)
- kahve makinesi:** makinaya qeweyî (m)
- kalas:** qelas (n) qalas (n)
- kalorifer:** kalorîfer (n) kalorîfer (m), qalorîfer (n), karolîfer (n), qanîfer (n)
- elektrikli kalorifer:** kalorîfero elektrîkin (n)
- kalorifer borusu:** lulîya kalorîferî (m) lulîya qalorîferî (m), lûleyê qalorîferî (n), luleyê
qalorîferî (n)

borîya kalorîferî (m) borîyey karolîferî (m), borrhîya kalorîferî (m),
 borrhîya qalorîferî (m), buarrîyê kalorîfér (m),
 buarîyê kalorîfér (m), buerrîyê qalorîfér (m),
 buerîyê qalorîfér (m), borîya qanîferî (m)

kama: 1)kardîya xoverrokerdişî (m), kardî-
 ya verrokerdişî (m), qama (m)

2)kardîya kalanî (m) kardîya kalenî (m), kardîya kalonî (m), kardî-
 ya kalnî (m)

bir çeşit kama: kardîya çerkeze (m)

kanepê: qenepe (n) qenepa (m)
 meqet (n)

kap: firaq (n)
 qab (n) qav (n)

kapak: qapax (n), ser (n)

kaptı: ber (n), keyber (n)

kapı kolu: destikê berî (n)

parmaklık biçimindeki kapı: çar-
 ber (n), caxe (m)
 bero caxleme (n) bero caxlame (n), bero caxilme (n)

karatahta: b. **yazı tahtası**

kariştırıcı: b. **mikser**

karmaç: b. **mikser**

karyola: karyola (m) qaryola (n), qarula (m); karyole (n), karolî (n),
 kalolî (n), kalueli (n), kalule (n)

kaset: b. **bant**

teyp kaseti: b. **teyp bandı**

video kaseti: b. **video bandı**

kaşık: koçike (m)

çay kaşığı: koçika çay (m) koçika çayı (m), koçikey çay (m), kueçikê çay (m)

tahta kaşık: koçika darêne (m) kueçika darîn (m), kewçika darêne (m)

kat: 1)qat (n) qate (m)

tebeq (n) tebax (n)

2)qanat (n) qonat (n)

çatı katı: qatê serbanî (n), tebeqê ser-
 banî (n)

iki katlı ev: bano diqat (n), bano dite-
 beq (n), bano diqanat (n)

ikinci kat: qatê dîyine (n) qata diyine (m)
 tebeqê dîyine (n)

- tek katlı ev:** bano erdî (n), bano yew-qat (n), bano yewtebeq (n), bano yew-qanat (n)
- zemin katı:** b. **yerkatı**
- katalit:** katalît (n)
- tüplü katalit:** katalito tubin (n)
- kavanoz:** qawanoz (n) qawanoze (m), qawanozi (m), qawunêz (n), qawunês (n)
- kaynاتıcı:** kelnayek (n), keldayek (n), girê-nayek (n)
- su kaynاتıcı:** kelnayekê awe (n), kelda-yekê awe (n), girêneyekê awe (n)
- kazan:** lêñ (n) lîyen (n), liye (n), lê (n)
qazik (n)
qazan (n) qazûn (n)
- küçük kazan:** nêmlêñ (n) nîmlêñ (n)
- büyük kazan:** dene (n) denne (n)
- çok büyük kazan:** neqre (m) niqri (m), neqli (m)
- kazık** (yere ya da duvara çakılan): pîj (n) pîc (n), pîz (n)
miyîn (n) miyin (n), mihîn (n)
- keçe:** kulav (n)
- kenef:** b. **yüznumara**
- kerpiç:** kerpiç (n) kelpîç (n)
- kese** (yikanmak için): kese (n)
- kevgir:** 1) kefgîr (n) 2) b. **süzgeç**
- kın:** kalanî (m) kalenî (m), kalonî (m), kâlnî (m)
- kirlent** (yastık): kirlente (m)
- kivîlcım:** çîk (n)
çeq (n) çeqi (m)
çiqqlik (n)
gizgarik (n) gizgalik (n)
- kibrît:** kibrît (n) kîbrît (n), kîbrít (n), kîbrîte (m), kîrvite (m),
kifrît (n); kirbît (n), kîrbît (n), kîrvite (m)
- nifte (m)
- kiler:** mîneb (n)
dunike (m) dunik (m)
bano peyên (n) bano peyen (n), bûn peyin (n)
kîler (n) kîlere (m)

- gole (m) guele (m), guel (n)
qibe (m) qib (m)
- kiriş** (duvar için): mundî (m)
kîrîş (n) kirîş (n)
- kiriş** (tavanı tutan ana direk): kêran (n) çêran (n), çêrang (n)
girşag (n) girsag (n)
şirît (n) şerît (n)
- kitap**: kitab (n)
- kitap rafı**: refê kitaban (n) refê kitabon (n), rêf kitabûn (n)
- kitaplık**: kitabgeh (n)
- kitaplık rafı**: refê kitabgehî (n)
- kolon**: estune (m) estun (m), estûne (m), ustine (m), ustini (m), istuni (m)
- koltuk**: palkursî (n)
qoltuxe (m) qoltuxi (m), qoltixe (m), qoltixi (m), qoltix (n)
- koltuk takımı**: taximê palkursîyan (n)
taximê qoltuxan (n) taqimê qoltuxan (n), taximê qoltixon (n)
- komodin**: komodîne (m) komodîn (n), komîdîn (n), qomodîne (m)
- komot**: b. **komodin**
- kompütür**: komputure (m)
- konak**: qonax (n) qunax (n)
- konserve**: konserve (n) qonserwe (n)
- konuk**: mêmân, -e mêmôn, -i; mêmûn (n), meyman, -e; nîyeman (n)
misafir, -e
- konuk odası**: odaya mêmânan (m), oda-
ya misafiran (m)
- konyak**: konyak (n)
- kor**: kozire (n) kuezle (n), kuezme (n)
piling (n) pingil (n)
- korniş**: kornîş (n) korneş (n)
- kova**: sitil (n) sitl (n), sîtil (n), satil (n)
hilke (n) helke (n)
beroş (n) berduş(n), biroş(n), biros (n), bureş(n), burêş (n)
- deri kova**: dewl (n) dowl (n), dol (n)
qowxe (n)
qewlix (n) qowlrix (n)
- küçük kova**: xizik (n)
- küçük deri kova**: dewlçe (n) dowlçe (n), dolçe (n), dualçe (n)
- tahta kova**: elbe (m) elbi (m), helbe (n)

- elbike (m) elbik (m)
 kulenge (m) kuleng (n)
- kömür:** 1)komir (n) kûmir (n), kuemir (n)
 2)xizal (n) zixal (n), zax (n)
- kömür sobası:** sobaya komirî (m)
- köşk:** koşke (m) koşki (m), kûşki (m), kueşk (m); koşk (n)
- köz:** çêle (n) çeyle (n)
 bizote (n) bizuate (n), pizote (n)
- köz yiğini:** tiramî (m) tirramî (m), tirranî (m)
 tirafe (m) terafi (m), terrafl (m)
- krem:** krem (n)
- tıraş kremi:** kremê tıraşî (n), kremê taş-tişî (n), kremê terdişî (n)
- kuka:** koka (m) qoqa (m), kuka (m), kueka (m)
 guda layê nake (m) gudê layî nak (m)
- kutu:** qutî (m), qutîye (m)
- kuzine:** kuzîna (m) kuzîne (m)
- kül:** wele (m) wele (m)
- kül tabası:** weledane (m)
- kütüphane:** kitabxane (n)
- küvet:** kuvet (n) kuwet (n); kuvete (m), kuwete (m)
 kurna banyoyî (m)
- lamba:** lamba (m)
- floresan lamba:** lambaya floresanine (m)
- gaz lambası:** 1)lambaya gazyaxî (m)
 2)çila (m), çilaya gazyaxî (m)
- gaz lambasının konduğu yer:** çiladane (m)
- lamba fitili:** fitîlê lamba (n)
- lavabo:** lawabo (n) lavabo (n), lewabo (n)
- legen:** legan (n) legane (m), legene (m), legen (n), lengan (n)
- çamaşır leğeni:** leganê kincan (n), lega-nê cilan (n)
- leken:** lekan (n) lekon (n), lekûn (n)
 lekanî (zh) lekonî (zh), lekûnî (zh)
- lenger (kap):** lengerî (m), lengerîye (m) lengere (n), lengîrî (m)
- lif:** lif (n) lûfik (n)

likör: lîkor (n)

lüks (lamba): lukse (m) lukise (m), lokise (m), lokize (m), lokose (m), likose (m); lukis (n), lukus (n)

macun: macun (n) macûn (n), mecum (n)

diş macunu: macunê didanan (n) macunê dindanan (n), mecumê didanan (n), macûnî dindûnûn (n)

makara: meqara (m) miqara (m), muqara (m); meqere (n)

iplik makarası: meqaraya layî (m), koj (n)

makas: meqes (n)

makine: makîna (m)

bulaşık makinesi: makînaya firaqan (m)

çamaşır makinesi: makînaya kincsutîşî (m), makînaya cilşutîşî (m)

dikiş makinesi: makînaya deştene (m), makînaya deştişî (m)

kahve makinesi: makînaya qeweyî (m)

sac kurutma makinesi: makînaya porziwakerdişî (m), makînaya gijikziwakerdişî (m)

tıraş makinesi: makînaya tıraşî (m), makînaya taştışî (m), makînaya terdişî (m)

tost makinesi: makînaya tostî (m)

maltız: maltiz (n) mantêz (n)

mangal: manqale (m) manqal (n), monqal (n), mûnqal (m)

masa: masa (m)

masa örtüsü: rîpêşê masa (n)

îzara masa (m) hîzara masî (m)

çala masa (m)

masa saatı: saeta masa (m) seetê masî (n)

yemek masası: masaya werdî (m) masey werî (n)

küçük yemek masası: xonça (m), xonçice (m) xûnçe (n)

maşa: maşa (m) maşe (n)

şeker maşası: maşaya şekerî (m) maşey şekerî (n)

maşrapa: şerbik (n) şarbik (n), şarb (n)
meşrefe (n) meşfe (n), mesef (n)

teneke müşrapa: dulik (n)

memişhane: b. yüznumara

mendil: 1) destmale (m) desmale (m), desmal (m), dusmali (m), dismali (m)

- 2) pêşgîre (m) pêşkîre (m)
- merdane:** 1) merdane (n) 2) b. **oklava**
- merdiven:** nêrdîwane (m) nêrdewani (m), nêrdwûn (m), nîerdwûn (m),
nêrdîwan (n); nerdîwan (n), nerdiwûn (m), ner-
gon (m); nardîwani (m), nardane (m), nardonî (m);
merdîwani (m), mêrdîwan (n), mêrdîyûn (m)
- derenga (m) dirinca (m)
- ağaç veya tahtadan yapılmış mer-**
- diven:** nêrdîwana darêne (m)
- silime (m) silimi (m), sulimi (m), sulumi (m)
- merdiven basamağı:** linga nêrdîwane (m) linga nêrdîwanî (m), ninga nardonî (m), ningey nar-
donî (m)
- palika nêrdîwane (m)
- paynika nêrdîwane (m) paynikê mêrdîyûn (m)
- menteşe:** menteşa (m) menteşe (n), mentiše (n), menteşi (m)
- merhale:** b. **aşama**
- mikrodalga:** mîkropêl (n)
- mikrodalga firını:** firina mîkropêlî (m)
- mikser:** mîkser (n)
- minder:** mînder (n)
- misafir:** b. **konuk**
- misafir odası:** b. **konuk odası**
- mitil:** mitêl (n) mitîyel (n), mitîel (n)
- mum:** finde (m) findi (m)
- mume (m) mumi (m), mum (m), mûme (m), mûm (m), momî (m)
- mumluk:** findedane (m)
- mumdane (m) mûmdane (m)
- muşamba:** muşeme (n) muşemi (n), müşeme (n), müşemi (n), müşem-
be (n), müşembe (n), misembe (n)
- yer müşambası:** müşemeyê erdî (n)
- masa müşambası:** müşemeyê masa (n)
- mutfak:** mitbaxe (m) mitbaxi (m), mitfaxi (m), mitfax (n), mutbaxe (m),
mutbax (m), mutbexe (m)
- kulinde (m)
- mutfak robotu:** robotê mitbaxe (n)
- müzik:** muzîk (n)
- müzik seti:** setê muzîkî (n)
- nalın:** qapqapik (n) qapqabik (n), qabqabik (n), qabqap (n), qabqab (n)

nalên (n)

namazlık: 1)b. seccade

2)şalika nimajî (m) şalika nimacî (m)

çala nimajî (m)

îzara nimajî (m) hîzara nimacî (m)

polê nimajî (n) puelî nimacî (n)

posteyê nimajî (n) puestê nimacî (n)

nevresim: newresîme (m)

çarşefa lihêfi (m)

ocak(ateş yakılan veya gazla yakılan):adırgan (n), adırgon (n), adırgûn (n), adılgûn (n), adılkân (n)

adirca (n)

kuçelan (n) kuçlan (n), kuçlon (n), kuçlûn (n), kuçran (n),
kişlon (n)

kuçike (m) kuçlik (m)

Ocakta ateş yak. (Kuçike de adir weke.)

tif (n), tifê adırî (n), tifaye

ocaxe (m) ûcaxi (m)

baca ile birlikte ocak: lojine (m) lozine (m), lojini (m), locini (m), lujini (m)

pixêrî (m)

demirci vb. ocağı: kure (n)

elektrik ocağı: ocaxa elektrikine (m)

gaz ocağı: gazocaxî (m)

ocak (soy, aile): ocax (n) ûcax (n), wicax (n), wecax (n)

oda: oda (m)

konuk odası: odaya mêmânan (m), oda-
ya misafiran (m)

misafir odası: b. **konuk odası**

oturma odası: odaya roniştişî (m)

yatak odası: odaya rakewtişî (m)

odun: îzime (m) îzimi (m), eyzimi (m), êzim (m), êzim (n)
kolî (n) koli (n), kueli (n)

bir tarafı yanıp ateş haline gelmiş olan

odun veya ağaç parçası: piskone (n) piskoni (n), piskene (n)

kosadir (n)

kosebî (n) kosevî (n)

meşe odunu: îzima mazêre (m)

kolîyo mazêr (n) kuelo mazîyer (n)

ok: tîre (m) tîri (m), tîr (m), tîr (n)

oklava: tîrî (m), tîrîya nanî (m) tîre (m), tîri (m), tîr (m), tîr (n)

orlon: orlon (n)

oturma: roniştiş (n) rûniştiş (n), rueniştiş (n), rueniştiş (n), ronîştiş (n),
ronîştiş (n)

oturmak: roniştene rûniştene, rueniştene, roniştene, ronîştene

örtme (bina için): ortme (n) wertmî (m)

çardaxe (m)

howle (n) howli (n), holi (n)

page (m) pag (m)



Kombî yayîşê diwêşine ra

örtü: rîpêş (n)

örtü olaraq kullanılan bez: ïzare (m) hîzare (m)

şale (m) şali (m), sali (m)

şalike (m)

çale (m)

yatak örtüsü: rîpêşê cile (n), rîpêşê nivîne (n)

parke: parke (n) parki (n)

paspas: paspas (n)

pencere: pencera (m) pencira (m), pencere (n), pençere (n)

paca (m) paja (m)

çarçiba (m)

duvarın iç tarafında bulunan ve dışa-

riya açılmayan pencere biçimindeki

yer: şibake (m) şibaki (m), şibak (m), şebake (m), şimaki (m)

taqa (m) teqa (m)

perde: perde (n)

tül perde: perdeyo tulin (n)

petek (tahil ambarı): kuware (n) kuvari (n), kuare (n), kuari (n), kare (n), kari (n)

pijama (erkek için): pîjemeyî (zh) pîcemeyî (zh); pîjameyî (zh), pîcameyî (zh), pîce-
mê (zh)

pirên-tumanî (zh)

pijama (kadın için): pîjemeyî (zh), binfis-

tan-pirênbazî (zh), pirên-pirênbazî (zh),

berşoyî (zh)

pikap: pîkabe (m) pîkab (n), pîqabi (m), pîqab (m), pîlaqe (m)

pike: pîke (n)

porselen: porselen (n)

porselen fincan: fincana porselenêne (m)

priz: prîz (n) prîze (m)

elektrik prizi: prîzê elektrîkî (n) prîza alatirkî (m)

radyatör: radyator (n)

radyo: radyo (n) radyo (m), radyoyi (m), radîyo (n), rado (n), ra-
dû (n), radiûn (m), raydûn (m), radûn (n), radon (n)

raf: ref (n)

terek (n) tereg (n), derek (n)

rakı: reqî (m) reqî (n), reqa (m), eraq (m), araq (m)

ranza: ranza (m)

rende: rende (n) rinde (n), rindo (n)

resim: resim (n) risim (n)

duvar resmi: resimê dêsi (n), resimê dî-

warî (n)

robot: robot (n)

mutfak robotu: robotê mitbaxe (n)

saat: saete (m)

duvar saati: saeta dêsi (m) seetê dêsi (n), saatê dîyêsi (m), seatê dîyêsi (m)

saeta dîwarî (m)

- kol saatı:** saeta destan (m)
- masa saatı:** saeta masa (m)
- sabun:** sabun (n) sabûn (n), sawin (n), sovun (n), sovin (n)
- tıraş sabunu:** sabunê tiraşî (n), sabunê taşışî (n), sabunê terdişî (n)
- sac:** sac (n) saj
- sac** ("dişbükey pişirme aracı"): tewqe (m) tewqi (m), tewq (m), toqi (m), toq (m), dewqi (m)
saci (m) sac (m), saj, soci (m), sojî (m)
- saç:** por (n), gjijk (n)
- saç fırçası:** firçeyê porî (n)
- saç kurutma makinesi:** makînaya porziwakerdişî (m), makînaya gjijkziwakerdişî (m)
- saç tıraşı:** tiraşê porî/gijikî/sereyî, taşışê porî/gijikî/sereyî, terdişê porî/gijikî, qesnayışê porî/gijikî, cirakerdişê porî/gijikî, birnayışê porî/gijikî
- saçak:** siving (n) sîving (n), sîvig (n), sîbig (n), şiving (n), şîving (n),
şîvig (n), sîlbang (n), sîlvag (n)
sifirne (n) sifirni (n), suwerni (n), suarni (n), sorni (n)
- sahan:** sehene (m) seheni (m)
- sakal:** erdîse (m) erîse (m), erîsi (m), êrdîse (m), ardîş (m), eyşi (m);
herdîse (m), herdîse (m)
- sakal tıraşı:** tiraşê erdîse, taşışê erdîse,
terdişê erdîse
- saksi:** saksî (m) saqsî (m), seqsî (m)
- salon:** heyate (m) heyati (m), yate (m), hîyate (m)
çardaxe (m)
eywane (m) eybûn (m)
salone (m) salon (n)
- sandık:** sindoqe (m) sindoqi (m), sendoqi (m), senduq (m), sandiqe (m), sandiqi (m),
sanduqe (m), sondiqi (m), sundiq (m)
- sarhoş:** serxoş, -e; serxweş, -e
- sarmışak:** sîr (n)
- sarmışak vb. yiyecek maddelerini**
- ezmekte kullanılan küçük tokmak:** sîr-kut (n), sîrkutik (n)
- seccade:** secade (n) secadi (n), secde (n), suzde (n)

- sedir:** sedir (n)
- sehpa:** sêpî (m) sêpê (m), sehpa (m)
- semaver:** semawere (m) semaweri (m), semawer (n)
- sıva:** siwax (n) sûwax (n), suyax (n), sebax (n), şiwax (n), swax (n)
- kaba sıva:** kerandês (n)
- sini:** sênî (m), sênîye (m) sînî (m)
- çok geniş olup üzerinde yemek yeme-**
- mek için de kullanılan bakır sini:** sê-
- nîya dîwanî (m) sînîya dîbanî (m)
- küçük sini:** sênîke (m)
- soba:** soba (m) sobe (n), suba (m), sube (n), suwa (m)
- gaz sobası:** sobaya gazî (m), sobaya gazyaxî (m)
- kömür sobası:** sobaya komirî (m)
- mutfak sobası:** b. kuzine
- soba allığı:** binsoba (n), texteyê soba (n)
- soba borusu:** lulîya soba (m), borîya soba (m)
- soba borusu dirseği:** çengê soba (n)
- dîrsegê lulîya soba (n) dîrsega lûleyê soba (m)
- dîrsegê borîya soba (n) dîrsega borîya soba (m)
- sofa:** berteng (n)
- sofra:** sifre (n) sifra (m), sufre (n), sirfe (n)
- xonça (m), xonçike (m) xûnçe (n)
- sofra bezi:** ronik (n) rûnik (n)
- ronikê werdî (n)
- somya:** somya (m)
- su:** awe (m)
- su bidonu:** bîdonê awe (n)
- su kaynatıcı:** kelnayekê awe (n), kelda-
yekê awe (n), girêneyekê awe (n)
- sünger:** sunger (n) sînger (n), singir (n)
- süpürge:** gezî (n), havêlik (n)
- elektrik süpürgesi:** geziyo elektrîkin (n)
- sûrahi:** surehî (m) surahî (m), surahî (n), surayî (n), sulahî (m), sulehî (m)
- sütun:** estune (m) estun (m), estûne (m), ustine (m), ustini (m), istuni (m)
- süzek:** b. **süzgeç**
- süzgeç:** 1)parzun (n) perzun (n), parzum (n), parzim (n), perzim (n)
- 2)torre (m)
- 3)suzgeç (n) suzgêç (n), sizgeç (n), sizgêç (n), sizeç (n), surgêç (n)

- 4)sefok (n)
- 5)filtre (n)
- süzgü:** suzgeç (n) suzgêç (n), sizgeç (n), sizgêç (n), sizeç (n), surgêç (n)
- şampanya:** şampanya (m)
- şampuan:** şampuan (n)
- şarap:** şerab (n) şerabi (m), şerab (m), şarab (n), şerav (n), serav (n)
mey (m)
- şeker:** şeker (n) şekir (n), seker (n)
- şeker maşası:** maşaya şekerî (m)
- şekerlik:** şekerdane (m)
- şifoniyer:** şifoniyer (n)
- silte:** doşek (n)
- şış:** şîşe (m) şîşî (m), şîş (m)
- örgü şısı:** tîrî (m), tîrîye (m) tîre (m), tîri (m)
caxe (m) cax (m)
- şuhe:** şuhe (n) şushi (n), suse (n), şusa (m)
- şofben:** şofben (n)
- sömine:** ocaxe (m), pixêrî (m)
- şomîne (n) şomîna (m)
- tabak:** 1)tebaxe (m) tebaxi (m), tebax (m), tabaxe (m), tebeqe (m)
2)nalmikî (m) namlıkî (m), namilkî (m)
- küçük tabak:** tebaxça (m)
- tabaklık:** refê firaqan (n)
- tabure:** tabura (m) tabûre (m), tabure (m)
- tahta:** texte (n) texta (m)
- küçük tahta:** textik (n) textiki (m)
- tahta kaşık:** koçika darêne (m)
- tahta kova:** elbe (m), elbike (m), kulenge (m)
- tahtadan yapılmış:** texteyên, -e
- yazı tahtası:** texteyê nuştîşî (n)
- takım:** 1)taxim (n) taqim (n)
2)kome (m)
3)ekipe (m)
4)qat (n)
- giysi takımı:** qatê kincan (n), qatê cilan (n)
- takunya:** b. **nalm**
- tandır:** tenûre (m) tennuri (m), tenuri (m), tendure (m), tendûri (m),
tendur (m)

ekmeği tandırda yapıştırmak için**kullanılan bir araç:** refike (m)

papatî (m) papat (m)

tarak: şane (n) sane (n), şone (n), şûne (n), şûni (n)**tas:** 1)tase (m) tas (m), tose (m)2)uskura (m) uskira (m), uskera (m), wiskura (m), wiskira (m),
eskura (m), iskura (m)**büyük tas:** çape (m)**derin tas:** badîye (m) badin (m)**hamam taşı:** tasa hemâmî (m)**küçük tas:** tasike (m) tasiki (m), tosike (m)

fincike (m)

tava: tawe (n) tawa (n), tewe (n), tawike (m), towike (m)

miqil (n), miqilik (n) meqlê (n), miqlê (n)

qanzik (n) qûnzik (n)

tel: têl (n) teyl (n)**telefon:** telefon (n) telefun (n), telefûn (n), têlefun (n)**cep telefonu:** telefonê destan (n)**telefon açmak:** telefon akerdene, tele-
fon rakerdene**telefon etmek:** telefon kerdene**televizyon:** televîzyon (n) televîzyoni (m)**telgraf:** telgraf (n) telqeraf (n), telqiraf (n), telxiraf (n), têlqeraf (n),
têlqiraf (n), têlxiraf (n), têl (n), teyl (n)**telgraf çekmek:** telgraf antene**tencere:** tencere (n) tencire (n), tencira (m)**küçük tencere:** 1)tencik (n)2)quşxane (n) quşxane (n), quşxone (n), quşxûne (n), quşxa-
na (m), quşxane (n), quşxani (n), quşqane (n),
qusqane (n)

3)beroş (n) berdueş (n), biroş (n), biros (n), bureş (n), burêş (n)

teneke: teneke (n) tenike (n), tenke (n)**gazyağı tenekesi:** tenekeyê gazyaxî (m) tenekeyê qazaxî (n), tenekey qazexî (n), tenekeyê
qazî (n), tenekê qazî (n), tenkey qazaxî (n)**genellikle kulp takılarak kova gibi****kullanılan küçük teneke:** çînko (n)**tentene:** b. **dantel****tepsi:** tepsi (m), tepsiye (m) temsî (m)

- büyük tepsi:** lengerî (m), lengerîye (m) ... lengere (n), lengîrî (m)
- terlik:** şimik (n) şemik (n), simik (n), şimike (m)
terlik (n) telik (n), terlig (n)
- termos:** termose (m)
- teskere:** teşkere (n) teşkeri (n), teskere (n), tezkere (n)
nesîlke (n)
- teş:** teş (n) teyşt (n), teşte (m), têşt (n), têştî (n), tîşt (n)
- teyp:** teyîbe (m) teyîbi (m), teyîb (m), teyibi (m), teybe (m)
- tezek:** 1)tepike (m) tepiki (m), tepik (m), tepixi (m), tepixi (m)
tepika silî (m) tepikey silî (m)
2)gota silî (m)
3)sil (n)
4)tezek (n)
5)palpat (m) papat (n)
6)sergîn (n)
7)kerme (n) kermi (n)
- tığ:** nake (m) nak (m)
çengal (n) çongal (n)
- tıraş:** tiraş (n) teraş (n), terraş (n)
taştış (n) taştış (n)
terdiş (n)
- saç tıraşı:** tiraşê porî/gijikî/sereyî, taştîşê porî/gijikî/sereyî, terdişê porî/gijikî, qesnayîşê porî/gijikî, cirakerdişê porî/gijikî, birnayışê porî/gijikî
- sakal tıraşı:** tiraşê erdişe, taştışê erdişe, terdişê erdişe
- tıraş etmek:** tıraş kerdene, taştene, terdene
qesnayene qesnayine
- tıraş firçası:** firçeyê tıraşî (n), firçeyê taştışî (n), firçeyê terdişî (n)
- tıraş kremi:** kremê tıraşî (n), kremê taştışî (n), kremê terdişî (n)
- tıraş makinesi:** makînaya tıraşî (m), makînaya taştışî (m), makînaya terdişî (m)
- tıraş sabunu:** sabunê tıraşî (n), sabunê taştışî (n), sabunê terdişî (n)

torba: kîse (n), kîsik (n)

koyun veya keçi derisinden yapı-

lan torba: manike (m) maniki (m)

tost: tost (n)

tost makinesi: makînaya tostî (m)

tulum: b. **tuluk**

tuluk: 1)meşke (m) meşki (m), meşk (m), meske (m)

2)kin (n) kind (n)

küçük tuluk: aşîre (m) aşîr (m)

rêwike (m) rêuwûke (m), rewike (m)

kedike (m) kediki (m)

tutacak: destikî (zh)

tutaç: destik (n), destikî (zh)

tutak: destikî (zh)

tuvalet: 1)tuvalet (n) tuvalet (n)

2)b. **yüznumara**

alafranga tuvalet: tuwaleto alafranga (n)

tuvalet kağıdı: kaxita tuwaletî, kaxita kene-
fi, kaxita destawxaneyî, kaxita awdestxaneyî

tuzluk: soledane (m)

tül: tul (n)

tül perde: perdeyo tulin (n)

tüp: tube (m) tupe (m), tup (n)

un: ardî (zh)

urgan (kildan örulen urgan): resene (n) resen (n), resane (n), resne (n), resni (n), rasni (n)

kısa urgan: xape (m), gilonc (n), bend (n)

guwend (n) gwend (n), güyend (n)

uydu: peyk (n), satelît (n)

valiz: valîze (m) valîz (n), walîze (m), walêze (m)

vazo: vildane (m)

vazo (n) vazo (m), wazo (m)

verici: dayek (n)

verme: dayîş (n)

vermek: dayene

video: vídeo (n) vídeo (m), vídeoyi (m), vído (n)

video bandı: bandê vídeoyî (n) bandê vídeoyi (n), bandê vídoyî (n)

kasetê vídeoyî (n) kasetê vídeoyi (n), kasetê vídoyî (n)

video kaseti: b. **video bandı**

- villa:** villa (m)
- viski:** wîskî (m) vîskî (m)
- vitrin:** vîtrîn (n) vîtrîne (m)
- votka:** votka (m)
- yâlı:** yalî (m) yali (n)
- yastık:** bâlişna (m) balîşna (m), balîsna (m), başna (m), palişna (m), paşna (m)
- köşe yastığı:** nazbalîve (m) nazbalî (m)
- yastık kılıfı:** rîyê bâlişna (n)
- yatak:** 1)cile (m) cili (m), cil (m)
ca (n) cê (n), ja (n)
2)nivîne (m) nivîni (m), livîni (m); nevîn (n), livîn (n)
ortî (zh) wortî (zh), wertî (zh)
mitêl (n)
- yatak çarşafı:** çarşefa doşekî (m)
- yatak odası:** odaya rakewtiş (m)
- yatak örtüsü:** rîpêşê cile (n), rîpêşê ni-vîne (n)
- yatak takımı:** (döşek, yorgan ve yastıktan oluşan bütün): qatê nivîne (n), qatê cilan (n)
- yatak yüzü:** rîyê doşekî (n)
- yatma:** rakewtiş (n) rakowtiş (n), raktotış (n)
- yatmak:** rakewtene rakowtene, raktotene
- yemek-**I: 1)werp (n) 2)nan (n)
- küçük yemek masası:** xonça (m), xon-çike (m) xûnce (n)
- yerkatı:** qatê erdî (n), qatê zemînî (n)
- yıkınma ve çamaşır yıkama zama-**
- ni:** şüy (n) şue (n)
robar (n) rovar (n)
dilavî (n)
- yıkıntı:** xirbe (m) xirb (m)
page (m) pace (m)
- yorgan:** lihêf (n) lehef (n), leheyf (n), lehêf (n), liheyf (n)
orxan (n) werxon (n)
- yorgan iğnesi:** pincirarî (m), derzîna li-hêfan (m)

- yorgan ipliği:** layê lihêfan (n) layê liheyfan (n), lay leheyfon (n), layî lehêfûn (n)
destekîya lihêfan (m)
- yorgan yüzü:** rîyê lihêfi (n)
- yorganın iç tarafa bakan yüzü:** îza-
ra lihêfi (m) hîzara lihêfi (m)
- yunak:** şûy (n) şue (n)
robar (n) rovar (n)
dilavî (n)
- yük-I:** bar (n)
- yük-II:** b. **yüklük**
- yüklük:** 1) lindan (n) lindon (n)
2) andal (n) andol (n), ondol (n)
3) kulîne (m)
4) yuke (m), yuka cilan (m) yuki (m), ukêrî (m)
- yüklük örtüsü:** çarşefa nivîne (m)
şelme (m) selme (m)
- yün:** peşm (n) pêşm (m), peşmî (m)
pirç (n)
- eğirilmiş yün:** rês (n) rîs (n), rîes (n), rîyes (n)
- yün iplik:** rês (n) rîs (n), rîes (n), rîyes (n)
- yünlü:** peşmên, -e; peşmin, -e pêşmyen
rêsên, -e; rêsin, -e rêsin, -e, rîesin, rîyesin
pirçin, -e
- yüznumara:** destawxane (n)
awdestxane (n) awdastxane (n), awdestûne (n)
daşır (n) daşr (n)
kêşme (n)
taretxane (n)
tuwalet (n) tuvalet (n)
kenef (n) kenif (n), kunif (n)
memîsxane (n) memîsxane (n)

ÇİMÊ TO KE ÊNÊ

Mutlu FIRAT

Çimê to ke êne
vêrenê aqilê mi ra,
ginenê awe ra destê mi;
ez qayîte hewayî keno,
qayîte koyan keno,
anca kî to nêvîneno.

Ez ke ax keno,
çimê to yê siyayî
benê ters kewenê zerê mi;
xewf keweno qelbê mi,
seke adir bivaro mi ser ra.
Ez nêzano ke se bikerî.
Porê xo kaş keno,
aqilê xo weno seke.

Çimê to ke ameyî
vêrdî ra aqilê mi ra,
o wext to ra gêreno
ca bi ca, welat bi welat.

Xewf û ters ke kewt zerê mi,
bêvengîye kewena kar
reyna xeyalê to keweno çimanê mi ver.
O wext
rindekîya to derbaz bena mi ver ra.

27.06.2003

Mela Mehmed Elî Hunî:

“ZÛNÎ MA WEŞ O

FEQET MALESEF ALIMÛ HETA INKÊ ÎHMAL KERDÛ”

Roportajkerdoxi: W. K. MERDIMÎN & N. CELALÎ

Mehmet Uzunî cuwa ver kovara Vateyî de ma Mela Mehmed Elî Hunî û şîiranê ey ra xeberdar kerdibî. Payîzê serrê 2003. bi. Çewlîg de ma fikirîyê, ma va: Gelo ma eşkêni xo birasne Mela Mehmed Elî? Pali ra ma embazék eyar kerd. Gereka bisîn Hun ra Mela biardên Pali, ma zî Pali de ey de derg û dila qalî bikerdîyen. Ma da ra şî Pali. Labelê embazî ma Pali de nêbi û pê telefon zî ma nîşkêy yewbînan de qalî bikerî. Ma va: Cawo ke ma heta Pali amê, ma ko heta Hun zî şerî. Erebe ma bin de bi. Ma da piro şî Hun. Labelê çi heyf ke Hecî Mela (Hunijî Mela Mehmed Elî ra wina vanê) serî sibayî semedî yew ezayî (sereweşî) şibi Xarpêt. Ma Mela nêdî. Welhasil ma muradî xo şâ nêbî û destveng geyrê a, amê Çewlîg.

Hîrê-çar rojî cuwa pey, Çewlîg de embazék mi rê telefon kerd va: “Mela Mehmed Elî ameyo, hanî yo tîya paweyê şima yo!”. Ma bî şâ, leza-bez ma şî Mela Mehmed Elî dîy.

Mela Mehmed Elî ma dima roja bîn geyreno a, yeno Hun keyeyê xo. Keynayê ey vana: “Baba, la vizêr misafirî tu amêbî.” Mela dano piro yeno Dara Hêni, keyeyê Mela Mehemedê Muradanî. (Ma keyeyê ey ra vatibi ke “Ma embazî Mela Mehemedê Muradan ê”. Wina eyseno ke na zî keye de şâş ameya famkerdiş.) Mela Mehemed, miqatê Mela Mehmed Elî beno. Taştî de ci rê “suerrîn” dano viraştiş. Dima zî texmîn keno ke ê ke geyrênenê Melayî, ma yê, ey şaweno Çewlîg.

Çewlîg de engurê Licêyî zaf bîy. De hewce çin o ke tîya de ez wesfanê engurê Licêyî bidî. Ma çend kiloyî engurê xo girewte (guret) û şî niştî ro, derg û dila qalî kerdî. Yew het ra engur fekî ma tamîna, heto bîn ra qalanê Mela Mehmed Elî. Gelo qalan û sohbetê dostan ra hîna weş çîyêk esto?

Cêr ra şima nê roportajî wanenî.

W. K. Merdimîn: Seyda, ti kam serre ameyî dinya?

Mela Mehmed Elî: Bismîllahîrrehmanîrrehîm. Senî ke Ustad Bedîuzzeman vano, ci gurey xeyrî bibû gerek merdim pey “Bismîllahî” sifteh bikirû, dest pey bikirû.

Gêl birarû, ez 73 serrî ina ya ver ûmeya dinya.

W. K. Merdimîn: Kamca de?

Mela Mehmed Elî: Wîlayetî Elezîz, qezay Palî, dewê Hunî -înkê vûnî Beyhan-. Verî yow lay di. Layê Hunî, Kueyo Sipî ra yena bena Ruey Muradî mîyûn. Kinarî aya la di, verî Layê Hunî di, bûno ke pîrikî mi Derwîş Çawîş ra babî mi rî mendû, aw bûn di, ma vûnî “vil-vûmê wesarı”, wesarı aşmê nîsûni di. Yanî wexto ke darû vil kerdû a, darî xemiliyê.

Însûn pelg (belg), dar velg. Yanî însûn pey peraguretiş (xo têbestiş), dar zî pey velg, vili, pel û fêkî xemiliyena. O donem de ez ûmeya dinya.

Mi ra ver yow biray mi bîyû –hema zî weş o-, babî mi namê yi Mehemed Dewrêş nawo pa. Namê mi zî nawo pa Mehmed Elî.

Ruejêk mi va:

-Bawo, qey tu nûmey biray mi na pa Dewrêş?

Va:

-Ez o wext seyyah bîya. Ez sey dewrêşûn geyrênî. Mi aye ra namê yi na pa Dewrêş.

Mi va:

-La Mehemed?

Va:

-Ez qirbûnî ay nûmî bî, nûmey yi weşî mi şî.

Mi va:

-Yow keye di yow Mehemed bes o. Tu qey nûmey mi na pa Mehmed Elî?”

Va:

-Muhemmed! Muhemmed! Uca di yow şedde estû. Di hebî “m”yî (mîmî) estî. Mi va wa di hebî Muhemmedî keyê mi di bibî.

Mi va:

-La in Elî çinê yo?

Va:

-Ax oxil, ti nêzûnî! Ellah, Muhemmedûn bê Eliyûn nêkirû.

W. K. Merdimîn: Melatîyê babîyê to estibî?

Mela Mehmed Elî: Yi ra vatîn Mela Husêñ. Zaf geyraye bi. Hîrê aşmî xezwê Şêx Seîd Efendî di bi. Hîn yaşlı bi.

Ez babî xwi ra, dadîyê xwi ra ewladî dîyin a. Hêvîr biray mi amo dinya, cuwa pey ez ûmeya dinya. Hire hebî wayî, di hebî birayî mi dima bîy. Ey merdî. Înkê ma di biray û hîrê way mendî.

Babî mi ard hem ez nawa dersê Qur'anî ver hem zî kekî mi -tirkî vûnî "abêm"- Mehemed Dewrêş. Yi nîwend. Ellay nesîb kerd, mi wend. Sebebî wendişî mi û nîwendişî yi zî in bi: Yow lapat dey ma r'. Wi yers (hêrs) bi şî, nîwend. Mi xwi rî qebul kerd. Aya teresî mi xwi rî qebul kerdi.

W. K. Merdimîn: Babîyê şima lapat day şima ro?

Mela Mehmed Elî: Belê.

W. K. Merdimîn: Hol bîyo ke to xo rê qebul kerda. To wendo, ti bî wayîrê îlmî.

Mela Mehmed Elî: Heta çend serrî verî Democratû (Demokrat Parti) ez şîya Xarpêt cûmî. Hafızî wirzenî serî kulsî (kursî), muqabele wûnenî. Ez ûmeya keye mi va "Baba ti mi benî Dîyarbekir, ez xwi rî wûnen". Ez berda Dîyarbekir. Xasteg ra Evdurrehman Topaloxlî bi, ez teslîm ay kerda. Ay ez hîmaye kerdîn. Key' yow zuvêrijî⁽¹⁾ di ez rakewtîn (kotînî ra).

Uca Dîyarbekir di yow aşmê remezanî mi tecwîd wend. Uca ra pey ez şîya Silîvan.

W. K. Merdimîn: Farqîn?

Mela Mehmed Elî: Belê, Farqîn. Yow dew esta, înkê vûnî Yolüstü, Qultî Köyü. Muftî Erxenî Mela Abdussemed –in hetî Licê ra eşîrê Badikî ra bi- het mi wend. We ra pey ez şîya Sêrt. Hîrê aşmî zî mi zerê (merkezê) Sêrtî di wend. Yow serr mi Perwarî di ders guret.

W. K. Merdimîn: Melayan dersî şima kurmanckî dêni?

Mela Mehmed Elî: Melay ma kurmûncî bî, kurmûncî ma ra vatîn; dersî erebkî dêni ma, ma erebkî musnên. O wext mi hema hol kurmûncî nêzûnên. O ri (semed) ra ez persên, kûm melayî eskerayî kerda, tirkî

1. **Zuvêr:** Yew dewê Palî ya.

zûnû ez şîn ay het.

Mela Mehemed Gurhuseynî ci r' vatîn, ey ders da mi. Uca ra zî ez şîya Cizîr. Cizîrê Botan. Mi Şêx Seyday [het di] wend.

Ez ûmeya keye, biray mi esker ra ûmo, apî mi esker ra ûmo. Maddî durumî ma biney zeîf bi. Babî mi va. "Oxil, ti dewam bik biwûn! Ez parse ken, purse ken tu miqat ken, ti biwûn!". Na rey ez şîya seydayê xwi Şêx Mehmed Emînî het. Înkê hema weş o, ho Enqere di yo. Eslen Çêrmûg ra lajî Hecî Zilfiqarî yo.

W. K. Merdimîn: Çêrmûg ra yo, kird o (zaza yo)?

Mela Mehmed Elî: E, zaza wû, feqet ma tirkî qalî kerdîn. Uca ra ez ûmeya. Ina şâîrî filûn hend qelbî mi ra nîvîyertîn, yalmiz yow Mela Ehmed umbazî min ê medrese bi, mi va:

-Mela Ehmed!

Va:

-Ho.

W. K. Merdimîn: Ça (kotî) ra bi?

Mela Mehmed Elî: In dewûnî Hunî ra, Sêraçur (2) ra bi. Înkê wefat kerdû. Mi va:

-Mela Ehmed, tirkî wirzêni tirkî şîîrûn vûnî, erebî wirzêni erebkî vûnî. Qey zûnî ma ra ûna (wina) çow nêvecîyo?

Va:

-Lîya, tîya Dîyarbekir ra Mela Ehmedî Xasî zazakî yow mewlid nuşto,

2. **Sêraçur**, Pali de yew dew û verî Koy Sipî de yew mintqa ya. Sêraçur ra yew "Mela Ehmed" estû ke cuyî (heyatî) ey zaf balkêş o. Bi ihtîmalo pîl "Mela Ehmedî Sêraçuri" ke *Mela Mehmed Elî* behs keno, no "Mela Ehmed" bi xo yo. Çike Sêraçur ra bi nê nameyî yewna "Mela Ehmed" nîamo sinasnayış.

No "Mela Ehmed" 1920 de na dew (Sêraçur) de amo dinya. Sêkur (sêwir, yetîm) bîyo pîl. Pi ey eskereya tîrkan ra peyser nîno. Hîrê serre yo mayê ey merena. Qijîya xo ra dew ra vejîyeno û ca bi ca medresan de wûneno. Yew emir ra pey şîno "Binî Xeti" (Sûrîye) û peyser anîgêreno. Xebata xo ya sîyasî ser o zaf teda û zehmetî diya. "Mela Ehmedî Sêraçuri" yan zî "Mela Ehmedê Palo" gulanê 1991 de de Binî Xeti de şîno rehmet.

Mela Ehmed, mîyanî kurdanî Sûrîye de bi nameyî "Mele Ehmedê Palo" yeno sinasnayış. Yew şexsiyeto şâîr û edib o. Ey kurmanckî (kirdaskî) zaf babeten de nuşteyî û zaf zî şîîrî nuştî. Nuşteyanî ey ra yew, bi nameyî "Dewr û Gerra Kurdistanê" 1994 de nimitekî neşr bîyo.

bin ra kê nêzûnî ho vûn se. Zûnî ma yow zûno meqbul nîyo.

Ina toxunmişî mi bî. Ma het yo zîyaret estû, ma vûnî Şêx Eladîn. Tabî rewên o. Bexdad ra ûmo. Yow ruej mi verî xwi tada ey mubarekî. Ez ûnîyawa şîir ha yena qelbî mi. Mi va ez çend kelîmû bîyarî yow ca. Ina “ayî ayî” esta, mewlido zazakîyo ke mi nuşto tede esta.

QICEY PEYXEMBERÎ

Vernî d' vac namey Homayî, Muhemed lac pî û mayî

Gergüş bişan ayî ayî, wi yewekê pî û mayî

Muhemed peyxembêr ma wo, Muhemed lac Amîna wo

Gergüş bişan ayî ayî, wi yewekê pî û mayî

Muhemed ik est yew şah û, Muhemed lac 'Ebdullah û

Gergüş bişan ayî ayî, wi yewekê pî û mayî

Sukey Mekkî dere y', çal î, kuey Mekkî k' êst kerrey sal î

Gergüş bişan ayî ayî, wi yewekê pî û mayî

Sukey Mekkî d' ame dinya, Hezret Muhemed Mustefa

Gergüş bişan ayî ayî, wi yewekê pî û mayî

Muhemed ik est yew kil a, Muhemed ik est yew vil a

Gergüş bişan ayî ayî, wi yewekê pî û mayî

Muhemed yew vila rezî, Helîma pîştû sey girzî

Gergüş bişan ayî ayî, wi yewekê pî û mayî

May Muhemmîd Amîna ya, may yi şitî z' Helîma ya

Gergüş bişan ayî ayî, wi yewekê pî û mayî

Nûrî Muhemed Mustefay, ti van qey estarey sibay

Gergüş bişan ayî ayî, wi yewekê pî û mayî

Ti van qey yew aşma newî, ti van aşma çarresşewî

Gergüş bişan ayî ayî, wi yewekê pî û mayî

Ti van qey ruec ho akewti, pêşey Helîma d' rakewti

Gergüş bişan ayî ayî, wi yewekê pî û mayî

Pî yi vêr merd resa merdû, sarey yi bi sarey derdû

Gergüş bişan ayî ayî, wi yewekê pî û mayî

May' yi badî çend serrû merd, pey yetîmî yi dî zaf derd

Gergüş bişan ayî ayî, wi yewekê pî û mayî

Qicey yi nîya sey qicû, Helîma şit dekerd cicû

Gergüş bişan ayî ayî, wi yewekê pî û mayî

Yi nê dayk a nê zî bawk û, şît Helîma wen sey awkû
 Gerguş bişan ayî ayî, wi yewekê pî û mayî
 Pey mehfezey Rebbî corî, hûrî vanî "nûrî nûrî"
 Gerguş bişan ayî ayî, wi yewekê pî û mayî
 Muhemmed peyxember vêca, dîn kafirû nîmend ricya
 Gerguş bişan ayî ayî, wi yewekê pî û mayî
 Peyxember îslamey nicnay, yi quçey kafirû ricnay
 Gerguş bişan ayî ayî, wi yewekê pî û mayî
 Mewlîd peyxembêr xwi bizan, qey yi rî selawatû biwan
 Gerguş bişan ayî ayî, wi yewekê pî û mayî

W. K. Merdimîn: Şîîrê to ya tewr verêne na ya?
Mela Mehmed Elî: Ina (na) ya. Ci ra ma vûnî Muhemmed lacî pî û
may o? Her kes lacî pî û may o. La ina nîya?

W. K. Merdimîn: Belê.
Mela Mehmed Elî: Feqet, Adem eleyhîselam nê pî nê may a. Îsa
eleyhîselam pî çin o, may teyna esta. Peyxemberî ma zî hem pî hem
may yi estî. Lacî Amîna û Ebdullahî yo.

Gêl birarû, ez aqilî xwi ra vûna, Ellahu 'alem bî muradîhî, senî ki
yow makîne pey benzîn şina, inî gurûn –nuştîşê şîîrûn- di zî însûn pey
esq kenû, esq lazim o. Çunkî, ez ûnîyena qarşî umbazûn mi di tehsîl mi
o derece nîyû. La yi nîşkêni di kelîmû bîyarî yow ca. Û zûnî dadîyê ma
di, senî ke tirkî vûnî "anadîl", Ellahû tealay ina yow çî nesîbî mi kerd.
Ez texmîn kena ina meseley eşqî ya.

A bîn zî, 1957 di, di rey ez şîya mi Ustad Bedîuzzeman dî. Mi lew na
destî yi ra, yi lew na çarê min a, sér çimî min a. Aya serr ra pey ez
Qur'anî Kerîmî teyna gen xwi dest. Mewlîd û kitabî ez nesîhet kenû.
Bê kitab ez mutala kenû, verî çimûn ra viyarnenû. Çowres serr a mi
xutbe kitab ra nîwendû. Rey-rey ez şina, îmam teklîf kenû, ez vêcên
mînber. Ez ûnîyen teqwîm. Ina aşmê erebî çend a? Cumey çendin o? O
gueri (goreyê ey) ra ez hîn vûn. Tirkîyê yi zî hîn o qeyde ez vûn. Yanî
şîîr yow çîyo hol o.

W. K. Merdimîn: To va, ti hetî Şêx Eladîn a şînî...
Mela Mehmed Elî: E, ez şînî, ûna ûmînî mi qelb. Ez şîya zere, mi di

rikatî nimac kerd; mi va “Lîya rahar ra mi yo çî va”. Kelê mi amê, mi gişt eşt gueş, mi çiyêk va û mi ard nuşt. Ez ûnîyawa yena qelem. Ez ûnîyawa nusîyena, ez ûnîyawa wûnîyena zî.

W. K. Merdimîn: Ti alfabeyê kirdkî (zazakî) ra xeberdar bî? Ma vajî herfê “V”, herfê “J” senî nusîyenî? To zanêni?

Mela Mehmed Elî: E, ey mi zûnêni.

W. K. Merdimîn: Ayê Melayê Xasî ra to zanêni?

Mela Mehmed Elî: Belê. Narey, hema verî Demoqratû, mi Farqîn di wendînî. Yow ruej ez pey hesîyawa, va “Mela Ehmedê Xasekî estû, merdimêko serrek (pîr) o; mewlido zazakî nuştû”. Mi va “Ez senî xwi rî yow mewlid tera bîrî (bigîrî)?” Ez şîya het. Şekil yi ina biney kirrek bi, yanî kilm bi, lakin dekerdi bi. Yow xirxowo (hirka) pemeyin piradeyi bi. Milî yi terefî Ellayî ra ina deverdeyi bi. Ez şîya mi zîyaret kerd.

Va:

-Lajê mi ti kotî ra yî?

Mi va:

-EZ Hun ra wa.

Va:

-Hunê Palî?

Mi va:

-E, Hunê Palî.

Va:

-Zilfi Axa esto?

Mi va:

-Estû.

Va:

-La, to xeyr o?

Mi va:

-Seyda, ez zaf mereqlî ya. Tu yow mewlid nuştû, ez geyrena yowî xwi dest finî.

Va:

-Şo na dewe. Mela Ehmed estû. Hîrê hebî mi day ci, wa yew to rî hedîye bikirû.

Ez şîya Mela Ehmedî het, eg' ho nûn wenû. Ez zaf zî bîya veysûn.

Zalimî Ellay, se benû ti vacî “bê nûn biweri”. Eg’ renc ra, dewarî ver ra amo, ho nûn wenû. Çîm mi o nûn di mend. Ez hema biney şenik bîya. Nîva “rûşî” zî.

Va:

-Tu xeyr a lajo?

Mi va:

-Seyday ez rey kerda.

Va:

-Seyda Mela Ehmedî?

Mi va:

-E.

Va:

-La xeyr a?

Mi va:

-Va “Mi hîrê hebî mewlidî teslîmî yi kerdî, wa yowî bidû to”.

Va:

-Willay yow tek zî çin o. Mi hirê hemi zî dey.

Mi va:

-Ayê tu çin o?

Va:

-Ayê mi estû.

Mi va:

-Ayê xwi bid mi. Ez Seyday ra vûna, wa yowna (yewnayî) bidû tu.

Va:

-Willay ez nêdûna.

Nêda mi. Ez ûmeya cay Seyday.

Va:

-Înşallah tu ard!

Mi va:

-Înşallah mi nêard!

Huya, va “Ino lac tebîetî şâîrî tey eysenû”. Va “Lawê mi, qey nêda?”

Mi va:

-Nêda.

Üna pey destî xwi îşaret da mi, ez şîya verî yi. Wi zî pay ra bi. Destî

xwi na serî sarey min. Çimî xwi ceneý pîyor, ûna çî wend û mi ra pif kerd. Eh, ez ha binî çimûn ra ûnîyenû. Destî xwi da paštê mi r', hîrê rey va “Ez Rebbî xwi ra wazen ti zî bibî yew şâîr, ti zazakî mewlid binusî”. Yanî ina keramatê mi nîya, ê ay zatî ya. O wext mi vatîn inî gurey – şîrnûştiş- henzar û pûnc sey serr mi ra durî yê. Ellahû tealay nesîb kerd.

W. K. Merdimîn: To mewlid ey ra girewt (guret)?

Mela Mehmed Elî: Nê! Çinê bi, mi nîguret. Cuwa pey nesîb bi, şînrî “Hesen-Huseyn”, “Qebra Tarî”, “Bedîuzzeman”... pîyor mi nuştî.

Ez şîya Bedîuzzemanî het, ûmeya. Mi va “Willahî îcab kenû ma yow qesîdeya zazakî berzi yi ser, qe nê wa miletê ma zî yi bişinasnû.”

W. K. Merdimîn: To a qesîde kam serre nuştî?

Mela Mehmed Elî: Hîrê serrî verî wefatî yi, yanî 1957 di.

W. K. Merdimîn: To ça (kamca de) nuştî, Hun de?

Mela Mehmed Elî: E, Hun di. Wexto g' mi Bedîuzzeman dî, tirkî mi ra va:

-Lajî mi, ti ci semed a amey?

Mi va:

-Na esra şedîd di ma îmanî xwi senî xelesnêni? Mi îlim tehsîl kerdînî, babî mi merd û cuwa pey maîşet û sixintiyê dinya nîverda ez îlim xwi temam bikirî. Ez ustadi xwi ra yow duayêk wazena.

Va:

-Çîyo ke ti zûnî ey biwûn! Çîyo ke ti nêzûnî, Ellah ey zî dûnû tu zûnayîş.

Mi zûna g' işaret dûn mi vûn “Şû dewê xwi di dersûn bid”. Ez ûmeya mi dest kerd pê, 23 serrî mi ders da. Dersê Qur'an, tecwîd û yazî Qur'anî. Uca ra pey hîn mi fexrî imamtî kerdi. Ez qedrolî nêbîya. Şêxî mi, Şêx Seydayê Cizîr musade nikerd, va “Ti ûna qey Ellahî nimac bikir, Ellah rizqî tu dûn”. Ellahî r' şikir, heta êr (ewro) ma veysûn nîmêndî. Êr ra pey zî, emrî mi 73 serrî yo.

W. K. Merdimîn: Cuwa pey to ci nuşto? Ma bi tarîx şêrî.

Mela Mehmed Elî: Willay tarîx mi vîr di nîyû. Kitabî mi di estû la înkê mi het nîyû. Ma fotokopîyê yi şawit Îsveç (Swêd).

W. K. Merdimîn: Qesîdeyê Hesen û Huseynî esta. Yew zî Yûsuf û

Zelîxa esta.

Mela Mehmed Elî: Qesîdey Hesen-Huseynî yow a, Weq'ay Kerbela, Qesîdey Hezret Hemzay (Weq'ayê Uhudî) esta, yow zî Yusuf û Zuleyxa.

W. K. Merdimîn: Ez qayil a to ra bi rêzkî bipersî. Ti vanî, ûmey mi qelb û mi nuştû. Mesela, to mewlîd nuşto?

Mela Mehmed Elî: E, mi nuştû.

W. K. Merdimîn: To çap (teb') kerdo?

Mela Mehmed Elî: Nê, mi teb' nîkerdû. Yow nusxey yi ho mi dest d' o. Destnuşte (elyazması) yo. Ez qemîş nîben xwi di biçarnî. Tu dî ûna desto hîy dîya pa, yaxut awk ginay ci, solmîş benû.

W. K. Merdimîn: To pey destî xo nuşto?

Mela Mehmed Elî: E, nuştey min o. Lazim o ke fotokopîyê yi biûncîyû. Esasen aya rueja ke şima ûmey, ez uca bibînî ma berdîn Pali yûn zî Xarpêt di fotokopî ûntîn. Eger şima biûmînî keyê mi, cînê mi ra, qicûnî mi ra mesela hol bivatêni, mi zûnêni. O gueri ra mi terarekî xwi dînî, ez ûmînî. Inkê însûn sewbîna nîyet a zî yenû mi het. Qey nuştûn, qey nêweşî, semêd qicûn a, semêd "qûm" a, tu dî "înanc meselesi" yo, tayê ina bawer kenî.

Yanî, mi nêzûna de'wa çinê ya. Inkê in seyahatî mi, mi va "Inî merdimî amê, ma nîşkey ci r' xizmet bikiri".

W. K. Merdimîn: Estaxfirullah.

Mela Mehmed Elî: Ez şêrî, destnuşteyê xwi tey bîyarî?

W. K. Merdimîn: Nika na xebatê to ya erjayî ra xeberê zaf merdiman çin a. Homa bipawo, o destnuşteyê to mavajî biveşo yan zî vîndî bibo, hewna yewcaardişê ey zaf beno zehmet. Aye ra ma yew fotokopîyê ey vejenî. Yew fotokopî zî ma to rê kenî hedre. Nata-weta ti şêrî, ti aye xo dest de tey benî. Cuwa pey zî eke nesîb bibo ma sey kitabî vejenî. Mesela, mewlîd û şîirî Mela Kamilî çap kerdi. Dikanî ey de yê, kam şero tayên bê peran dano, tayê zî bi peran erînenî.

Mela Mehmed Elî: Mela Mehemedî Muradan zî henzar hebi teb' kerda.

W. K. Merdimîn: Belê. Yi zî mewlîdî xo çap kerdo. Ayê to, wexto ke ma çap kerd, beno ke ma bi herfanê latînkî çap bikiri. Çunke no dewir de zafiyê ciwanan, xortan nêşkenî herfanê erebkî biwanî.

N. Celalî: Seyda, to wexto ke şîîrî nuştî, ti binê tesîrî kam şâîrî de mendî? Terzê şîîrnûştişê to û kam şâîrî maneno pê? Mesela to Melayê Cizîrî wendo?

Mela Mehmed Elî: Mesela mewlîdî Mela Ehmedî Xasekî mi dest nîkowt. Heta inî serrûnê peyênûn zî, mi şîîrî xwi nuştî hema kowt mi dest.

N. Celalî: La to eşnawitibi, to goş nabi ser?

Mela Mehmed Elî: Willay mi guesh nêñî qesidûnî Mela Ehmedî Cizîrî ser. Ez ûnîyêñ veng û qafiyeyî weş pîye yenî. En zaf mi Şêx Seydayî Cizîr ra feyz guret. Zeg' (wexto ke) mi uca wendînî hefte di yow-di rey ez şînî tîrbê yi r' şînî war. Tîrbê yi ha Cizîr di, binî erdî di ya. Ehend berz a. Yanî destî kê (kesî) ci nêresenî. Wertê mîyûn yow xapung [di] a. Pûnc tîrb ê. Inîyûn ra kûm mezelî Şêx Ehmedî yo kê nêzûnî. Pencera çin a. Pencera ha rîy erdî ya. Narey yow ten kê tepşenû, kê deverdenû war. Heta etyay kê yenû. "Birkuele" ma vûnî, mi lingê xwi eştînî serî birkuelî, xwi salmetnêñ û kulp xwi eştîn war. Ez şînî war, mi biney çimî xwi guretinî, çimî mi musenî pê, ez ûnîyêñî, hîn tîrbî belû bêñî. Feqet ez hema zî nêzûna ey pûnc hemin ra kûm a. Vûnî "Xirbê welîyûn, tîrbê welîyûn û cey zikr û îbadetî welîyûn ra kê feyz gêñî". Yanî, xutbewendiş, waz (we'z) û nesîhet û ina şâîrî yow lutfi Ellahû tealay o. Ez zî inkê xwi ra çî nêzûna.

W. K. Merdimîn: To ra ver, -Melayê Xasî xora ma zanî- kesê bînî zazakî vato, nuşto?

Mela Mehmed Elî: Eger vatû zî mi nêdiyû, mi nêşnawitû. Yalnız in mewlidî zazakî (Mewlidî kirdkî yê Mela Ehmedê Xasî) yo ke pey "Ez bi bîsmîllahî ibtîda kena" dest pêkeno, babî mi ina çend kelîmey yi vatînî. Wexto ke vatînî ûna yow eşq ûmîn mi, mi vatînî "Ax mi in mewlid bidîyêñî". Ellahû tealay rîy ey mewlidî mi nîmuet (nênavit). Mi şîîrî xwi kerdî temam, hema mi dî.

W. K. Merdimîn: Yew "Beyatname"yê Şêx Selaheddînî esto. To eşnawito? Çirey (qet) kewto to dest? Herçiqas şîîre nîya labelê yew nuşteyo kirdkî yo.

Mela Mehmed Elî: Nê!

W. K. Merdimîn: Yanî keso ke ti ey ra kirdkî bieşnawî, bimusî û binê

tesîrê ey de bimanî, çin o?

Mela Mehmed Eli: Nê! Ez bin a yi het nêşîya. Şêx Selheddîn Efendî ûme memleket la ez yi het nêşîya. Nesîb nêbi, ma yewbînû nêdî.

W. K. Merdimîn: Nê ke to nuştî, to kam serre nuştî? To va “Ê Bedîuzzemanî, ez 1957 de geyraya a, mi nuşt”. Mewlîd to key nuşt?

Mela Mehmed Elî: Inkê mi vîr di nîyo. Yalniz mi ûna ele'd-dewam, yanî dewamlî nênuştî. Peyderpey 23 serrûn di mi nuştî. Yanî nuştîşî yin 23 serrî ramit. Üna mi serri di yow tene, di tenê nuştî. Qesîdeyî mîyûn di zaf î. “Qesîdeyê Mekkî” cîya (xoser) esta, ayê “Medîna” cîya esta, ayê “Laîlaheîllallah”î esta, “Qebra Tarî” esta.

W. K. Merdimîn: Mewlîdî to zaf esto? Çend beytî yo?

Mela Mehmed Eli: Nê nê, zaf nîyo. Neway û çend beytî yo. Derg nîyo.

W. K. Merdimîn: Pêroyê mewlîdî vîrê to de yo?

Mela Mehmed Elî: Willahî nê, ez gerek bûnî tera. Zaf çî estî ez xwi vîr a kena. Wisif û Zuleyxa ra tuy yeno vîrê mi. (Tİya de çend beytan waneno.)

N. Celalî: Seyda, ma amê Hun, her kes kirdkî qalî keno labelê nê şîrran û quesideyan û mewlîdî çew (çî kes) zaf goş pa nêkeweno? Bîlhessa melayî.

Mela Mehmed Elî: Yow qisim melayî inî qebul nêkenî, vûnî “Çi şîr a? Şîr yow çîya meqbul nîya”.

N. Celalî: Vanî “Şîre meqbul nîya” yan “kirdkî”?

Mela Mehmed Elî: Nê, nê! Vûnî “Şîr meqbul nîya”. Ha tirkî, ha zazakî, ha kurmûncî.

Yanî yow exlaqî inî tirkû estû: Üna yow merdimî yino inayin bibû, finenî pîyasi, wahar veciyêni. Inkê ez duşmîş bena, mesela inî şîrrî mi, mi zaf pawitînî. Mela Mustefay Ardurêk ⁽³⁾ estû, hol mela wo. Mi yow tene da ci, xîyanetê kerd, berd kerd vîn. Va “Mi erşawit Kuweyt, yow ten uca dûn metbea ri”. Cuwa pey, va “Kerdû vîn”. Ü bajînê mi eşnawit yi îmha kerdû.

W. K. Merdimîn: Ellah Ellah!

Mela Mehmed Elî: Üna key yi ra mi xeber girot ke îmha kerdû. Homay

3. Ardurêk: Pali de yew nahye yo.

kerdi ki yow nusxey yi mi di bî. Inkê in semed ra ez pey herkesî emel nîkena.

Kelaxsi ra umbazêk ûme. Ma şî Xarpêt, hîrê-çar seatî ma niştî rû. Mi wend, yi guret band. Guret berd Îsveç. Yow mudet cuwa pey, mi dî Îsveç ra yow telefon ûme, va “EZ Mehmet Uzun”. Îtya Ardurêk ra wû. Ey dergîya (kovara) Vateyî di neşr kerd. Fotografi mi zî dawû pire. Mesela Çowlîg ra Mehyeddîn bi, ey çend hebî şîîrî mi waştî la nesîb nêbi. Bûnî (biewnî)! Gurey Ellay, nesîbî şima bi. Înşallah şima heta peynî ina xebat benî, kenî tamam. Ez siba şina Dara Hêni, resena tîrûn, kitabî xwi ûna.

N. Celalî: To Vate diyo? To wendo?

Mela Mehmed Elî: E, mi dî.

N. Celalî: Senîn o? Ti şâîr î. Ti kirdkîyê (zazakîyê) Vateyî senî vînenî?

Mela Mehmed Elî: Zazakîyê yê rind a. Narey mi mekteb nîwendû. Ê herfî zazakî biney yownê (yewna) qeyde yî. O lajî mi estû, şima dî, ey wendînî, yi zî biney dên tîyemûni r'. Yi mektebo mîyûnin wendû. Narey mi serbest wendînî. Vatîn “Baba ti senî wûnenî?” Mi xwi rî ezbêr xwi ra wendînî. Serî qal ûmên, mi wendînî. (Ma pêro piya huyenî.)

Ez weş nêşken biwûnî. Feqet ez wazena şima yow hetî “yazîyo verên” ra, hetî bînî zî herfûn latîn ra virazî.

N. Celalî: Eyê Mela Kamilî tîya de bibîn, ma ko to mojnê (binawnê). Yew het pê herfanê erebkî yo, melayî eşkenî biwanî; heto bîn pê herfanê latînkî yo, xortî eşkenî tera îstîfade bikirî.

W. K. Merdimîn: Eke musadeyê to bibo, xeyrî ser o, ma derheqê heyatî to de malumat kenî kitab. Ma vanî “*Mela Mehmed Elî* filan ca ra yo, wina yew merdim o, fîkr û vateyê yi nê yê”. Ma rê biney derheqê eşqê nuştîşê kirdkî ser o fîkrê xo vaje. Ma biney ïnan sero zî qalî bikerî.

Mela Mehmed Elî: Ez qayîl a şima bipersîn û ez cewab bidî şima..

N. Celalî: Belê. Nika ma pê edebîyatî ci qezenc kenî? Edebîyatî kirdkî ra ci îstîfade reseno ma?

Mela Mehmed Elî: Seyday mi zaza bi. Seyda Mehmed Emîn, zazûnî Çêrmûg ra bi. Ma kowtî qalî, mi va:

-Seyda inî şîrûn senî ûnî piye?

Yanî sankî ez ha tera yow ders gena. Va:

“Şima bêrîn mi gueştarî
 Ina dinya sey yo warî
 Çirey mekîn zemey şarî
 Ven dûna ma qebra tarî

Qebir esta mekir yarî
 Yarî kê bena caw' tarî
 Sirat estû, sey mûy barî
 Ven dûna ma qebra tarî”

Va:

-Dâîma şîîr de herfa peyên pîye bîyorû, bes o.
 Feqet ey ez tetmîn nêkerdîn. Mesela ez heyatî yow merdîm, qicey yi
 ra gêna heta 70-80 serrûn, heta merg ûna; pey şîîr. Sey yow kitabî mi
 arda pêser. Vind' ez vernîyê yi bîyarî xwi vîr:

“Însûn xafil nik o hûn d' o, ruh însûn ho ruhû mîyûn d' o
 Nesîb însûn awk û nûn d' o, ge sukûn d' o ge dewûn d' o.”

Inî çar qismî yow beyt a. Hetûn çar hemin peynîyê yin yow nêbû ez
 pey tetmîn nêbena. Narey:

“Şima awkey mi hîn ser nîn, kefen sabûn mi pêser nîn
 Lapikûn deştûn cêser nîn, tor' pircin ra melay ver nîn

Wa mi biş' pey derd û nazî, sela bid' pey weş awazî
 Îsqat biçarn des umbazî, qedêr Homay bibîn razî

Felek firrêن şînî ser ra, felek firrêن şînî ver ra
 Felek firrêن şînî erd' ra, sêr mi kerra bîn mi herr a.”

Inkê ez çî xwi ra nêzûn. Inî çâ ra (ku ra) ûmey mi vîr, ez nêzûn.
 (Huyeno.)

N. Celalî: Ti vanî îlham o? Şîîre pey wendîş tenya nênuşiyêna, ganî
 îlham bibo?

Mela Mehmed Elî: Biray mi, inkê zî ez ha nusena. Sêrrî mi 73, tu dî

vûnî çowres ra pey zeka tepyâ şina.

W. K. Merdimîn: Yanî ti na hele (game) roşî, ti eşkenî binusî, yan ganî İlham bîyorû?

Mela Mehmed Elî: Nê! Yalniz Ellayî sixintî û idareyê maîsetî mi r' kerda îlac. Ez sixintî gêna, gêren têserî ya, yipranmîş bena; uca ra şîir vecêni.

Bo (biewnî)! Dîyarbekir di ez misafir a. Şehîtlîk estû. Amnûnî, melşe (kermêse, vizik) zaf o. Narey waharî keyî Hesen Efendîyo ekragij⁽⁴⁾ uca xebitîyênî. Wi kowt (kewt) ra. Ez ûnîyawa hûnî (hewnî) mi nênu. Melşey nêverdêni. Ez wîriştâ we, mi desmac guret, di rik'atî nimac kerd. Ez şîya yow turbê şehîdî ser, tera vûnî "Yuzbaşî"; mi paştê xwi şâ birkueley yi û mi nuştî. Tîja aşm ver di, a şew mi şîirî nuştî. Inkê mi xîyal a nêni, kitabo ke mi eştû Sofî Terxûnîj ser, ha uca d' a. Bo! Melşî ra ez muteesîr bîya, mi şîirî nuştî.

Tu dî, rey-rey rahar ra yow ten gişt erzenû gueş lawikû vûnû. Narey ez ê lawikû nêzûna vajî. Mesela, ma qij bî, "lawko lawo" vatînî. Bo! Ez inkê nêzûna vajî. Ayê mi nîya, ayê şarî bî. Cuwa pey hewesî mi nîmend. Homa tealay ez men' kerda.

W. K. Merdimîn: No mewlido ke to nuşto, gelo çewî (kesî) ezber kerdo? Hayîyê to pey esta, dewê to ra, derûdormeyê to ra?

Mela Mehmed Elî: Willay rey-rey dewê mi ra yenî mi benî, vûnî "Mârî mewlîd ma biwûn". Ez zî wûnena.

W. K. Merdimîn: Teyna to de mendo, çewî ezber nêkerdo?

Mela Mehmed Elî: Nê nê! Yalniz Fûad Efendî, lacî Mehmed Zekî Efendî, ey ina "Qesîdeyê Bedîuzzemanî" û "Qesîdeyê Qebra Tarî" ezber kerdi, hol vûnû. Vengî yi zî zaf weş o. O teqrîz (pesenayış, wesifdayış) zî yi nuştû. Tehsil yi, lise qedînaya; tirkî nuştû. Zaf weş arda pîye. Tabî mi r' caiz nîyû ez vacî, biney wesfanî mi danû. Vûnû "Biray mi şâir Mehmed Elî şîirê ke nuştî, hem wendeyî hem zî nêwendeyî tera fam kenî". Vûnû "Yenû zanayış ke eşqî yi quwetlî yo. Aye ra nêwendeyî zî fam kenî û tera feyz genî".

Mesela, mewlîdî Mela Kûmîl wûnîyenû, her kes nêzûnû ho se vûnû. Mewlîdî Seydayî (Mela Mehemedê Muradan) zî ina wo. Yanî hol o, pey

4. **Ekrag:** Pali de, nezdîyê Hunî de, verî Ruey Muradî de yew dew a.

edebîyat neqışnaye yo, luxetî hey mîyûn di yê. Inê mi ûna açix o, zelal o, her kes tera fam kenû.

W. K. Merdimîn: Ez mewlidê to zaf meraq kena. Çunke tede (tey) hem qafîye zengîn a hem zî kirdkîya rind û delal a.

Mela Mehmed Eli: Zazakîyê yi rind fam bena. Ha wende ha nêwende. Ez zî nêzûna çiney ra wû.

N. Celalî: Hun, biney cayo dekewte de yo, derûdormeyê yi zî pêro kird i. Kirdkîyê yin zî zelal a û zaf tesîrê ziwananê bînan de nîmenda, kirdkîyê ey weş a. Yew merdim kirdkîyê Palî ser o bixebeitîyo zaf çîyan ano meydan. Mesela ti biney ser o xebitîyê, to xeylê çî ardî meydan.

Mela Mehmed Eli: Yow zî, ez hema zî nusena. Rey-rey ez yow qal yowî ra eşnawena, ez vûna “De reyna vaj!” Ez vûna “La, ma ûna nîvûnî!” Ez aye derhal nusena. Ûna sey kitabî nê, ha ezberî mi d’ a, otir (o tewir) şîirî ûmê ci, ez aye vûna. Mesela, Qerebegûn di “eyne” rê vûnî “lîlik”. Narey ma het yow Mela Îsmaîl bi, zaf qafalî bi, biney wende bi. Va:

-In “lîlik” çi zûn (ziwan) o?

Mi va:

-Ma zî vûnî.

Va: Key ma vûnî?

Mi va:

-Ma vûnî. Cînî şinî pêhet. Cînîya cûn (ciwane) ma tera vûnî “veyw”, ayê kûmil ra zî ma vûnî “naj”. Aya naj vûna “Veywê, tu key xwi tera daw (daw tera)?” Vûna “E”. Vûna “Tu seqernaw (seqilnayo)?” Vûna “Najê, mi kerra guret seqerna, seqerna, mi kerd sey lîlikî!” Bo! Îtya di ma zî vûnî.

Yow bekçî bi, şes serrî dewê ma di bekçîyê kerdibî, Qerebegûn ra yow yenû tera vûnû:

-Di kîlê riz bid mi!

Ma vûnî “pîrînç”. Pîrînç tirkî ya.

Va:

-Ma vûnî “pîrînç”, qey yi vûnî riz?

Mi va:

-Ma zî vûnî riz!

Va:

-Ma nîvûnî!

Mi va:

-Ma vûnî! Mesela, ti lajî xwi şawêن mi het, ti vûnî “Şû melayî ra vaj seat 12 di, destî tu riz û rûn di zî bibî ti yêنî”.

Va:

-Willay ma vûnî!

Narey yow kemûnîyê melûn ma zî, zûnî xwi ra xeberdar nîyî. Yanî yow kelîma vajîyena, hema încar kenî. Vûnî “Ina kelîma zûnî ma nîya!” Lîya qey ti încar kenî? Ti gerek mewzû bidewernî, hema aya kelîma eşkera kirî.

N. Celalî: Nika nê embazî Vateyî zî wina vanî. Vanî “Kam ca ke kirdkî qalî bena, ma biancî pêser, wa biney yewbînan ra nêzdî bibo. Wa yewbînan ra fam bikerî.”

Mela Mehmed Elî: Tabî, ma gûnî zûnî xwi r' xizmet bikî. Tabî inî fikrî baş ï la merdim gerek dîn-dîyanetî xwi zî bizanû.

N. Celalî: Xora ma vanî, dîndarî zî ganî ziwanî ser o bixebitî. Eke wina bibo hinî ê bînî nêvanî “Biewnî muslimanan ma tenya verday, ma ca verday, ziwanî ma rî wayîr nêvejîyay”. Ziwan çita (çinê) yo? Nameyê “Kelam”î yo. Ustad vano “Her çî tecelliyyê nameyanê (esmau'l-husna) Homayî yo”. Ziwan tecelliyyê nameyê “Kelam”î yo. Mesela to de, nameyanê Homayî ra, nameyê “Kelam”î û nameyê “Wedûd”î tecellî kerdo. To de eyseno.

Mela Mehmed Elî: Seyday yow kitab ard mi r' na rû, ez hema ha wûnena. “We elleme Ademe esmae kulleha”, yanî Homa tealay nûmey her çî da Ademî zanayış. Howt sey (700) heb zûn bonder kerd (musna). Kurdkî, almankî, tirkî pîyori ha mîyûn di yê. Ez ecêb mûnena, inî tuy melayî bêxeber ï, yûn zî yow meqsedî yin estû. Vûnî “Çira şima filankesî dima şinî?”

Fûad Efendî di hebî quesîdey mi ezber kerdbî. Ümebi Çowlîg, willay ez nêzûna -o wext va zî mi vîr di nîyû-, va “Yow melayî îtîraz kerdû, vatû yow melayî Hunî estû, bê Qur'an çîk nêzûnû. Inî şîirûnî xwi nusenû, qe nê wa biney ayetû mîyûn kirû”. Va “Mi va willahî ez nîvûn çî zûnû, lakîn inkê ti yi het yow fatîha biwûnî, howt hebî xeletûn a fatîhay tu di veynenû”.

Uca ra pey mi başle kerd mi ayetî zî kerdî mîyûn. Zaf quesîdûnî mi di

ayetî zî estî.

W. K. Merdimîn: To dest kerdo pê nuşto. To dima Mela Kamil esto, ma zanî. Mela Mehemed esto, ma zanî. Sewbîna çewî dest pêkerdo kirdkî nuşto?

Mela Mehmed Elî: Willay Mela Mehemedî xwi r' nê serrûnî peyinûn di dest kerd pey. Yanî irtîbatî min û yi çinê bi. Mela Kamilî zî in qeyde bi. Yanî xwi rî şîirî mi eşnawitî. Ma ûmên tîya Çowlîg, yi ûmên mi het vatîn “Tu ûna ûna vatû”.

W. K. Merdimîn: Nê dîyin a wet, derûdorme de sewbîna melayî estî ke kirdkî nusenî, elaqedar benî, wina piştî danî şima?

Mela Mehmed Elî: Nê willay, çin î. Çowû (keso) ki teqdîr bikirû çin o. Yalnız, mi da pire ez şîya Sofî Terxûnî het. Di hebî qicûnî yi mi het wendînî. Mi va:

-Sofî, Mela Ehmedî Sêraçurî vatînî “Lîya qalê zazûn mekirîn! Zûnî zazûn zûnî kutikûn o!” Hend zorî mi şî, hend zorî mi şî!

Sofiyê Terxûnî va:

-Ti binus! Ez ha tîya!

Cuwa ver mi va. Ez ûniyawa zazakî qaffîye pîye yena, nusîyena. Mesela, senî g' yow merdim bûnîyo yow kerra (kemere) ra, molozî bêbîçimî ra, yan zî kerpiçî ra û vajû “Pê inîyûn bûn vîrazîyenû?” Feqet merdim dîqet bikirû virazîyenû. Dêmek îmkanî yi estû. O memleketo g' ez şîya, mi zaf gurey dî. Wesarûn pey çamur, pey safî çamur bûn virazên. Temel nîkenên, ûna (wina) biney aşûnên; pey huye çamur qeldên pêser, qeldên pêser, gark-gark virazên. Now-des metrey dergê yi ya, hîrayî zî xêlêk a. Heta şinî sere, enû benû wişk; garka (garik, garg, rêze) bîn qeldên ser, hîn vila nîbenû. Narey hîrê garkî g' virazîyey, yow in perr di vindenû ûniyên tera, o bîn pey huye danû pure, danû pure, kenû yow. Pencerê xwi zî, pencereya hazır virazên, ûnî fînên de. O şekil safî çamur ra bûn virazên. Mesela o zî yow îlham o. Yini zî otir yow îlham girotû. Îtya ma vûnî “Kê gûnî iskele bestî, qalib girê dî, pey bûn virazî”. È bêqalib bûn virazên. Willay ma seyday ma rî safî çamur ra bûn viraştîn, seyda tey rûniştîn û keye zî kerdîn.

W. K. Merdimîn: Yanî merdim cehd bikiro kirdkî de şîire nusîyêna.

Mela Mehmed Elî: Însûnî desti ra çî nêqedîyenû (nêxelisîyêno). Hendo gi merg însûnî vindarnenû. Biney nîyetî yi zî hol bû, Ellah yardım kenû.

Ê verînû se kerdînî? Pîzey dadîyê xwi di musey?

N. Celalî: Na kirdkîya ke Hun de nika ha qalî bena û kirdkîyê wextê qicîyê (domanîyê) to, beyntar (bêname) de ferq esto? Zemanî verê û ê nika maneno yewbînan?

Mela Mehmed Elî: Inkê zazakî biney bedilyawa. Zaf tirkî kenî mîyûn. Tu va se, tu va “Çalê Hunî girewtî (gureti) bî”. La inkê hîn alış-veriş bîyû zêd, sey verî nîyû. Cûnî (ciwanî) ma inkê mesela ruejû xwi vîr a kenî. Ez sey verî vûna kirê, dişeme, sêşeme, çarşeme, paşeme, yene, şeme. Key mi di zî kênêy mi persena vûna “Baba salî kûm ruej o?”. Lîya, lîya, salî, zazakî di sêşeme wo.

W. K. Merdimîn: Na kirdkî cayanê ciya-ciyan de yena qalîkerdis. Çewlîg de, Dêrsim de, Pali de, Sêwregi de...

Mela Mehmed Elî: Bo ez şima rî vajî. Wîlayetûn ra zazakî wîlayetî Çowlig di; qezûn ra Solaxûn (Bongilan), Dara Hêni, Hêni, qismêk Licê, Erxenî, Çêrmûg, Sêwregi di qalî benû. Mi inî cay pîyor dî. Narey zerey Palî inkê tirkî qalî kenî. Seyyah Ewlîya Çelebî ûmo Pali -nûmey yi o wext Palo bîyû-, vatû:

“Bir acayib şehre vardım, adına derler Palo
Kimi Zaza, kimi Zozo, kiminin de adı Lo.”

“Zaza” ma yî, “zozo” arminî yî, “lo” zî kurmûnc î.

W. K. Merdimîn: Dêrsim û Gimigim de zî kirdkî qalî kenî. Goreyê kirdkîyê ma, tayê ferqî estî. Ti qalîkerdişê ìnan ra fam kenî? To çirey (qet) goş nawo ser?

Mela Mehmed Elî: Kê (kes) fehm kenû. Zaf kelîmey yin biney çî yî. Mesela ma vûnî “nuşte”, tirkî vûnî “yazi”; yi zî vûnî “azû”. Seyîd Riza berdû idam, vatû “Domananî xo azû bonder kirîn!”. Yanî, “qicûnî xwi nuşte bimusnîn”. Seyîd Rizay tirkî nêzûnên. Şêx Tahir Efendî [Birayê Şêx Seîdî] vatîn “Sulaley Seyîd Rizayî zaf esîl yow sulale ya”. Lajî Seyîd Rizayî zî idûm kerd.

W. K. Merdimîn: Kirdkî de muxtelîf fekî estî. To dî ca ra ca bedilîyenî. Miyani ê ma û Palî, Sêwreg, Çêrmûg de ferq esto. Her kes sey kirdkîyê dewê xo binuso yew standard nêno orte. To dî tirkî de vanî “tirkîyê İstanbulî”, yanî nuştîşî ser o aye esas genî û şinî. Nika ê ke Vate de xebitîyenî, pêrune unîversîte qedînaya, her yew çend hebî ziwanan zano,

mintiqayê ïnan cîya yê, fikrê ïnan cîya yê labelê amê pêser û vanî ma ganî yew kirdkîya nuştekîya standarde virazî. O ke kird o, wexto ke nuşt, ganî tera fam bibo.

Mela Mehmed Elî: Aw, heta deyn nêbo nêbena. Zazay Palî, zazûn Çowlîg ra gerek kelîmûn deyn bigirî. Narey hem zî fedekarey bikirî, yanî qebul bikirî.

W. K. Merdimîn: Her kes rikdar bo, vajo “illa ayê dewê mi”, nêbeno. No fikrê to zaf muhîm o. Her kes ganî nêvajo “ez ke esta ez a” û gerek fedakarî bikiro.

Mela Mehmed Elî: Hem deyn, hem zî fedekarî. Yanî, qebul bikirî. Fedekarî, qebulkerdişî rê vûnî. Mesela şîirê mi di yow qaffiye nûmey ci, mi zûnî Çowlîg ra, zûnî Licê ra, zûnî Sêwreg ra kelîme gureta. Gereka ez fedekarî bikirî, aye zî qebul bikirî. Ez vajî ina zî zazakî ya, ina zî yow şîve ya.

Heta erebkî bîle ûna wo. Mesela erebkîya en fesîh ayê Mekkî nîya. O qebîley Benî Sa'd bi ya, qebîley mayê şitî Peyxemberî, Helîma. Uca ûmeyîş-şeyîş zaf çine bi. Aye ra erebîyê yin nîixerîpyabî. Saf mendbî. Peyxemberî ma yin mîyûn di bi pîl. Zeg' (seke, wexto ke) ûme şeş-howt serrûn, erebkîya ke pey qalî kenû pîyor pey heyreti di mendînî. Senî ke yow qico ke Îstanbul di pîl bû, tirkîyê yi çâ, tirkîyê yow xarpêtij çâ? Erebkîyê yi ina weş û fesîh bî.

W. K. Merdimîn: Ziwanî xo musayîşî ser o ti ciwanan rê çi tewsîye kenî?

Mela Mehmed Elî: Metod, mi şima ra va. Inî şîvey estî ya, Çowlîg, Pali, Çermûg, Sêwreg, Dêrsim... Inî gerek fedekarî bikirî. Gerek yowbinûn ra deyn bikîr. Mesela wexto g' çine bî, şîveyûnî bînûn ra deyn bikîr. Zûnî ma zengîn yow zûn o. Mesela, Mela Mehemedî qalê tu kerd, va zaf fesîh qalî kenû. Va, mi va “yuksek tehsîl”, yi va “tehsîlo berz”. Va, mi va “bağlı”, yi va ”pabeste”.

W. K. Merdimîn: Nê kelîmeyî ma de estî. Ma nêviraştî.

Mela Mehmed Elî: Nê! Nê! Tebîî yê. Viraşte (yapma) nîyî.

W. K. Merdimîn: To dî kirdkî zaf nênuşiyaya, kirdkînuştiş biney merdimî rê xudik yeno. Senî ke qic hêvîrî şero mekteb, nuştiş ci rê xudik yeno.

Mela Mehmed Elî: Yalniz, latînkî ra herfûn Qur'anî, herfî Qur'anî

hîna musâit î.

W. K. Merdimîn: Ciwananê ma, xortanê ma zafî herfanê latînkî ser o wendo. Ma vanî wa ê zî îstîfade bikirî.

Mela Mehmed Elî: E! Aye ez qebul kena. Serrekî (yaşlıyî) ma bî, ez ûnîyen, ez wende ya la zazakîyê mi hendey yin nîya.

N. Celalî: Pali de medresa çin bî?

Mela Mehmed Elî: Willay yow zemûn bî. Üna biney durî bî. Yow Mela Mehemedî Guazêrek bi, Wexçiyûn di ders dên. Mela Ehmed estû, Mela Mustefa Koç estû.

N. Celalî: Awo ke derheqî kirdkî de wina (ina) qalî kerdên, pê kirdkî yan tirkî ders dên?

Mela Mehmed Elî: Zazakî ders dêni, feqet senî zazakî ders dêni? Pûnc kelîmey zazakî bînî, hîrê kelîmey tirkî kerdînî mîyûn.

W. K. Merdimîn: Yeno zanayış ke kirdkî hol nêzanên. Aye ra bîyo dişmenî ziwanî xo. Eke weş bizanên, fesîh qal bikerdên, dişmen nêbîn.

Mela Mehmed Elî: Tu dî vûnî “Kûmî çi nêzûna benû dişmenî ey”, “Kê dişmenî nezûney xu wo”.

W. K. Merdimîn: Ti wexto ke geyrê a, amey Hun, to pê kam ziwanî ders da?

Mela Mehmed Elî: Mi zazakî ders da. Inkê rojo cume zî ez zazakî wazûn dûna. Zazakî ayet mana kena, hedîs mana kena. Rîsalûn, hîkayetûn zazakî erzena mîyûn.

W. K. Merdimîn: O wextî imamîyê xo de zî to zazakî wazî dêni?

Mela Mehmed Elî: E! O wext zî 23 serrî mi zazakî wazî dey. Xutbe resmî bi, mi aw teyna tirkî wendînî. Dewi di qereqlî bi, o cawo ki ginênu sîyasetî yin r', kê nêcuynê; nêbenû, luzûm nêkenû.

W. K. Merdimîn: Ma nîvanî ma kirdî her kesî ra berz ê, ma wina yê filan. Ma vanî “Homay yew ziwan dayo ma, ma wazenî pê ê ziwanî qisey bikerî. Ma pê xo ifade bikerî”.

Mela Mehmed Elî: Zûnî ma weş o feqet malesef alimû heta inkê îhmal kerdû. Rey-rey ez şina misafirey, inî cînî kûmilî (serrekî) pey berî ra gueş nûnî wazûnî mi ser, vûnî “Zaf melayî amên waz dêni, ma tera çî fehm nîkerdên. In mela, ma zûnî ho vûnû se”. Iney ra ez zûna ke zazakîyê mi nîxerîpîyawa.

Qicîyê mi di, yow rey pî mi şîrûn mi hesîya. Biray mi Dewrêş esker

bi. Tîrûn çin a, rahar çin o. Ez qij a. Pey yazîyo verîn mektub nusêن, erzêن zerf, dêni posta. Mi tirkî şîirî nuştînî. Pî mi ruejêk mektub benû, muwezzî ûnêنû fekî zerf hol pîya nêduşîyo. Zerf kenû a û ê şîirûn mi wûnenû. Pî mi vatînî “Hem wendînî hem zî nata-weta şînî, ûmêنî û sarey xwi şêنî tîye, vatînî ‘lîya in lajî tu şâîr o’ ”.

Pî mi va “Lajî mi, ti zûnî ina şâîreyey tu çâ ra yena?” Va “Ma rî vûnî Keyê Ebdulcelîlû; tera zaf alimî, wendeyî, şâîrî vecîyay”. Belkî uca ra zî çî estû.

Merdimîn û N. Celalî: Homa to ra razî bo. Emro derg û siheto weş bido to.

Çewlîg, 16.10.2003

MEWLIDÎ PEYXEMBERÎ

Mela Mehmed Elî HUNÎ

Bîsmîllahîrrehmanîrrehîm

Namey Homay vaj hêverî, pey namey Homay ak berî
Xebêr mewlîd weş xeber î, biwan mewlîd peyxemberî

Peyxembêr zaf aşiq resnaw', yi qelbî aşiqan veşnaw'

Mewlîd peyxemberî beşnaw, biwan mewlîd peyxemberî

Peyxember pîl peyxember û, ha peyxemberûn ra ver û

Serêf yi zî hemîn ser û, biwan mewlîd peyxemberî

Wi yew sayê sér tebsî yo, beyîş peyxember ebsî ⁽¹⁾ yo

Ameyîş yi peynesî ⁽²⁾ yo, biwan mewlîd peyxemberî

Ameyîş yi yew rehmet o, mewlîd yi di çîn zehmeto

Homay ma berû cenneto, biwan mewlîd peyxemberî

Homay wi yew rehmet dawo, vatiş mewlîd rind peymawo

Mewlîd peyxemberî ma wo, biwan mewlîd peyxemberî

Şima mewlîd yi gueştarî, dinya k' esta hezey warî

Homay xwi rî bikîn zarî, biwan mewlîd peyxemberî

Gueştarî mewlîd yi keko, may xwi pî xwi ra yewek o

Wi holek o, wi xasek o, biwan mewlîd peyxemberî

Peyxembêr ma rind' rindûn o, peyxembêr însûn, cindûn o

Wi serekî hemînûn o, biwan mewlîd peyxemberî

Peyxembêr peyxemberûn o, wi rehberî rehberûn o

Wi me'denî xeberûn o, biwan mewlîd peyxemberî

Ti bizan peyxembêr tu kam, yûndes beytî verîn temam

Vaj "esselatû wesselam", biwan mewlîd peyxemberî

Tî wazenî xeyrû temam, vaj "esselatû wesselam"

Tî wazenî cennet meqam, vaj "esselatû wesselam"

* * *

1. ebsî: verên, ewilîn

2. peynesî: peyên

Yew wesîyyet ken qey tu rî, mewlîd ra ver ti hêverî
 Yew fatîha biwan mi rî, biwan mewlîd peyxemberî
 Tu ra wazen yew fatîha, tu ra wazen ez yew du'a
 Ruhî tu rî z' bena şîfa, biwan mewlîd peyxemberî
 Kami k' yew fatîha biwan, wi mûnî rehmetî d' biman
 Wi 'ef Rebbî ra pey nîman, biwan mewlîd peyxemberî
 Mewlîd zaza beşnaw mi ra, yew şîret ken qey tu r' bira
 Yew fatîha wazen tu ra, biwan mewlîd peyxemberî
 Fatîha bid' çiqas nebî r', fatîha bid' çiqas welî r'
 Fatîha bid' Mehmed Elî r', biwan mewlîd peyxemberî
 Wazen akîr enî berî, cewherû vec rîy teberî
 Hurmet bikir mewlîd yi rî, biwan mewlîd peyxemberî
 Mevaj peyxember êrên û, wi yew peyxember verên û
 Nûr' yi Adêm ra gîrênu, biwan mewlîd peyxemberî
 Adêm ra şî çarey' Hewa, Adem pî ma w, ya may' ma wa
 May' peyxemberûn ïz ya wa, biwan mewlîd peyxemberî
 Şerîf peyxemberû bi pîl, nûr gina Îbrahîm Xelîl
 Weyra pey resa Îsmaîl, biwan mewlîd peyxemberî
 Îbrahîm ra yi vîst yew ber, bera rind ra mevêc teber
 Peyxember pîl yew peyxember, biwan mewlîd peyxemberî
 Ena ber nîya putperest, heramî r' derg nîkerd yew dest
 Pey zerrey xwi qena'et best, biwan mewlîd peyxemberî
 Çiqas bera mubarek a, çiqas yew bera holek a
 Çiqas yew bera xasek a, biwan mewlîd peyxemberî
 Ti wazeni tarîx akîr, bera pak tarîx id ca kîr
 Cewherûn mewlîd yi pakîr, biwan mewlîd peyxemberî
 Ti Adem' ra bê ûnvari ⁽³⁾, ti Îbrahîm ra vambari
 May-pî yi ra vîjêr dîyari, biwan mewlîd peyxemberî
 Îbrahîm ra vîst û yew ber, 'Ebdullah ra otir yen cêr
 Eno yewek bi peyxember, biwan mewlîd peyxemberî
 Ti bizan peyxembêr tu kam, yûndes beytî dîyin temam
 Vaj "esselat û wesselam", biwan mewlîd peyxemberî

3. bê ûnvari: bê anver/ûnvar/ûmvar/ovor; bê war, bê diwar, bê cêr (bi tirkî "aşağı gel").

Ti wazenî xeyrû temam, vaj “esselat û wesselam”
 Ti wazenî cennet meqam, vaj “esselat û wesselam”

* * *

Ti wazen bîb' ummet yi rî, ti wazen vîn xizmet ci rî
 Ti wazen bîk' hurmet yi rî, biwan mewlîd peyxemberî
 Tarîx biwan bîg' xeberû, mewlîd biwan vîn cewherû
 Nûr gina zaf peyxemberû, biwan mewlîd peyxemberî
 Nûr gina İbrahim Xelîl, nûr gina Hezret' İsmâîl
 Resa 'Ebdullahî bi pîl, biwan mewlîd peyxemberî
 Berê Amîna zaf pîl a, Amîna k' esta kamil a
 'Ebdullah ra bî hamîla, biwan mewlîd peyxemberî
 Bî hamîley Muhemedî, bî hamîley nî Ehmedî
 Qey yi r' selawatû bidî, biwan mewlîd peyxemberî
 Resay melaketû xeber, melaketî vîjey sefer
 Va: “Ha yen dinya peyxember”, biwan mewlîd peyxemberî
 Şeref resa 'erdî cêrî, recef gina 'erşî corî
 Amey melaket û hûrî, biwan mewlîd peyxemberî
 Rebî'ul-ewwel duyes a, amey hûrî îmdad resa
 Şewa duşemî bêhes a, biwan mewlîd peyxemberî
 Şerq û xerb id, Ke'be d' yew, yew, hîrê 'elêm ricey yew şew
 Amîna zaf bîbî têşan, biwan mewlîd peyxemberî
 Hûrî debî heta pey bêr, yew şerbet da may peyxembêr
 Wi ame dinya ver' sehêr, biwan mewlîd peyxemberî
 Ti bizan peyxembêr tu kam, yûndes beytî hîrin temam
 Vaj “esselat û wesselam”, biwan mewlîd peyxemberî
 Ti wazenî xeyrû temam, vaj “esselat û wesselam”
 Ti wazenî cennet meqam, vaj “esselat û wesselam”

* * *

Vaj: “Merheba!” ti qey yi rî, vaj: “Merheba!” ti key yi rî
 Vaj “Merheba” sukey yi rî, biwan mewlîd peyxemberî
 Şanên gerguşey peyxembêr, melaketî bî emirbêr
 Vûn: “Merheba!”, bîy seferbêr, biwan mewlîd peyxemberî
 Selam danî peyxemberî, hemî melaket û hûrî
 Gergus şanên nûrî nûrî, biwan mewlîd peyxemberî

Pey selam a, pey merheba, vengo resa 'erd û sema
 Hemîn yi ra va: "Merheba!", biwan mewlîd peyxemberî
 Vaj "Merheba!", ti z' vaj qey yi r', vaj "Merheba!", vaj "Ya wezîr!"
 Vaj "Merheba!" vila rezî r', biwan mewlîd peyxemberî
 Vaj "Merheba!", vaj "Merheba!", vaj "Merheba ya Mustefa!"
 Vaj "Merheba ya Ehmeda!", biwan mewlîd peyxemberî
 Vaj "Merheba wahar Qur'an!", vaj "Merheba wahar Furqan!"
 Vaj "Merheba wahar îrfan!", biwan mewlîd peyxemberî
 Vaj "Merheba nay xwi ser tac!", vaj "Merheba şeyox Mîrac!"
 Vaj "Merheba ardox nimac!", biwan mewlîd peyxemberî
 Peyxemberî tu kerd eda, ya Muhammed ez tu r' feda
 Tu r' merheba, tu r' merheba, biwan mewlîd peyxemberî
 Heme cey' dinya d' merheba, Mekke d', Medîna d' merheba
 Hetta enû ca d' merheba, biwan mewlîd peyxemberî
 Ti bizan peyxembêr tu kam, yûndes beyt merheba temam
 Vaj "esselat û wesselam", biwan mewlîd peyxemberî
 Ti wazenî xeyrû temam, vaj "esselat û wesselam"
 Ti wazenî cennet meqam, vaj "esselat û wesselam"

* * *

Yew şîret ken ez qey tu rî, dewam bikir Qur'an xwi rî
 Ti wazen cenneti d' hûrî, biwan mewlîd peyxemberî
 Peyxemberî r' ame Qur'an, sukey Mekkî d' iney bizan
 Cuzyey Qur'an ra pey meman, biwan mewlîd peyxemberî
 Çores' peyxembêr ma debî, sukey Mekkî d' wi bi nebî
 Putperestey şî, pey se bî? Biwan mewlîd peyxemberî
 Tarîx peyxemberî ma ak', biwan mewlîd, yi tede ca k'
 Yi putûn ra Ke'be kerd pak, biwan mewlîd peyxemberî
 Sukey Mekkî derey derey, uca d' amey peyxemberey
 Salawatûn meverd erey, biwan mewlîd peyxemberî
 Qicey xwi ra heta bi pîl, qalî k' yi di ti vanî vîl
 Wi yew dar a, peyxembêr gîl, biwan mewlîd peyxemberî
 Peyxembêr ma w yin pîya wo, wi rehbêr ma w yin pîya wo
 Şefa'et kerdoxî ma wo, biwan mewlîd peyxemberî
 Ummetey xwi r' ken şefa'et, sek' ame dinya kerd hîmmet
 Yi va: "Ummet!", yi va: "Ummet!", biwan mewlîd peyxemberî

Enû peyxembêr şefqetî, enû peyxembêr rehmetî
 Va: “Ummetî!”, va: “Ummetî!”, biwan mewlid peyxemberî
 Nay xwi ser tac, va: “Ummetî!”, şewey Mîrac va: “Ummetî!”
 Yi kerd nimac, va: “Ummetî!”, biwan mewlid peyxemberî
 Ti bizan peyxembêr tu kam, yûndes beytî peyin temam
 Vaj “esselat û wesselam”, biwan mewlid peyxemberî
 Ti wazenî xeyrû temam, vaj “esselat û wesselam”
 Ti wazenî cennet meqam, vaj “esselat û wesselam”

DU'AYÊ MEWLIDÎ ŞERÎFÎ

Ya Reb we bî heqqî'r-Resûl, ya Reb mewlid ma bik' qebul!
 Ya Reb ti ma nikîr melul, ya Reb du'an ma bik' qebul!
 Ya Reb ti ma zelîl nêkî, ya Reb ti ma rezîl nêkî!
 Muhammîd ma r' delîl bikî, ya Reb du'an ma bik' qebul!
 Qey xatirî namey Celîl, qey xatirî Îbrahîm Xelîl
 Muhammîd ma r' bikîr delîl, ya Reb du'an ma bik' qebul!
 Qey xatirî Mekkî, Medîna, qey xatirî Tûrî Sîna
 Qey xatirî 'Erefat, Mîna, ya Reb du'an ma bik' qebul!
 Qey xatirî Sefa, Merwî, qey xatirî Zemzem, umrî
 Qey xatirî ruecan cemrî, ya Reb du'an ma bik' qebul!
 Qey xatirî heccu'l-ekber, qey xatirî Siddîq, 'Umer
 Qey xatirî 'Usman û Heyder, ya Reb du'an ma bik' qebul!
 Qey xatirî Ke'bey' ulya, qey xatirî 'Erşî E'la
 Qey xatirî Adem, Hewa, ya Reb du'an ma bik' qebul!
 Qey xatirî semawatû, qey xatirî meqamatû
 Qey xatirî kainatû, ya Reb du'an ma bik' qebul!
 Qey xatirî hezretî Qur'an, sekerat id' ma mek' têşan
 Ti ma r' nesîb bikîr îman, ya Reb du'an ma bik' qebul!
 Qey xatirî namey Semedî, qey xatirî namey Ehmedî
 Qey xatirî Muhemmedî, ya Reb du'an ma bik' qebul!
 Qey xatirî namey' Hafîz, ti gunûn ra ma bîk' temîz
 Daîm ti ma bikîr 'ezîz, ya Reb du'an ma bik' qebul!
 Aya qebra tengâ tarî, ti ma nêverdî bêwarî
 Ya Reb ma tu r' kenî zarî, ya Reb du'an ma bik' qebul!

Şîfa bid' ma, bîg' decan ma, 'ef biker pîl û qican ma
 May ma, pî ma, hem xocan' ma, ya Reb du'an ma bik' qebul!
 Ma bik' naıl şefa'etî, 'ef bik' enî cema'etî
 Qebul bik wendiş, ta'etî, ya Reb du'an ma bik' qebul!
 Qey xatîr vil 'ef bik telî, vетox mewlîd Mehmed Eli
 Ya Reb ti yi bîk' yew welî, ya Reb du'an ma bik' qebul!

MÎRACÎ PEYXEMBERÎ

Ti hêvîr namey Homay vaj, ti namey yi r' benî muhtac
 Peyxembêr ard panc wext nimac, peyxembêr ma vêca Mîrac
 Ti pey zikir akir berî, ti pey şikir bid' xeberî
 Ti pey fikr şû dinyay vêrî, peyxembêr ma vêca Mîrac
 Ti xeberey Mîrac bira, pey zazakî beşnaw mi ra
 Ez yew du'a wazen tu ra, peyxembêr ma vêca Mîrac
 Wazen' derdan xwi rî darî, Homay xwi rî bikir zarî
 Beşnaw mi ra me'na barî, peyxembêr ma vêca Mîrac
 Me'na barî mi ra beşnaw, destan mi ra bişim ti aw
 Homay wi ma rî rehmet daw', peyxembêr ma vêca Mîrac
 Me'na barî biwan rind vên, ti vîn se kerd 'erd û asmên
 Ti vîn senî mehkema bêñ, peyxembêr ma vêca Mîrac
 Enû 'erd vûn: "Ez ik ez a, ez ik esta ez merkez a
 Merkêz mi d' bêñ herb û xeza", peyxembêr ma vêca Mîrac
 Asmên vûnû: "Ez ha ser a, mi astarey kêrd xwi ver a
 Ez rind a, ez munewwer a", peyxembêr ma vêca Mîrac
 'Erd vûn: "Merkêz merkezûn a, ez merkêz darûn, rezûn a
 Ez ik esta ez zozûn a", peyxembêr ma vêca Mîrac
 Asmên vûn: " 'Erdo ti gêc î, ez a merkêz aşm û ruecî
 Ez zaf pîl a, ti zaf qic î", peyxembêr ma vêca Mîrac
 'Erd vûn: "Ez cey' însanûn a, cey' cindûn û heywanûn a
 Ez tarixî zemanûn a", peyxembêr ma vêca Mîrac
 Asmên vûn: "Mi d' melaketî estî, tu d' bêñ felaketî
 Ez a cayî selametî", peyxembêr ma vêca Mîrac
 'Erd vûn: "Ez cey enbiyan a, ez merkezî ewlîyan a
 Ez ik esta ez însan a", peyxembêr ma vêca Mîrac

Asmên vûn: “Ti xebêr medo, ’erş ha mi d’ o, kursî mi d’ o
 Lewhî Mehfûz nika mi d’ o”, peyxembêr ma vêca Mîrac
 ’Erd vûn asmên ra: “Bib’ haya! Piley teyna qey Homay a.
 Qala weş a ’erdî va ya”, peyxembêr ma vêca Mîrac
 “Ha mi d’ Muhemed Peyxember, ez pey yi bîya munewwer.”
 Asmên va: “Ellahû ekber!”, peyxembêr ma vêca Mîrac
 Asmên va: “Mi r’ çîn xeberî, ez nîşken zor’ ’erdî berî
 Ya Reb, wazen peyxemberî”, peyxembêr ma vêca Mîrac
 “Ya Reb, ti k’ estî qadir î, şerêf’ ’erdî estû, la mi rî?
 Wazen enî misafiri”, peyxembêr ma vêca Mîrac
 “Muhemed ik est yew sedef, yi ra resa ’erdî şeref
 Wazen ez bib’ yi r’ yew hedef”, peyxembêr ma vêca Mîrac
 Uca d’ gina asmên recef, va: “Vazen ez bigîr şeref
 Pey Bûraq û Mîrac Refref”, peyxembêr ma vêca Mîrac
 Homay ven da asmên serî, va: “De’wet ken peyxemberî”
 Resay cennet nê xeberî, peyxembêr ma vêca Mîrac
 Cennêt ’eşq yi nîhemelna, qey peyxembêr xwi xemelna
 Heme nûr id xwi remelna, peyxembêr ma vêca Mîrac
 Serr’ peyxembêr bî çewres new, Cebrâil yi r’ ame yew şew
 Va: “Muhemed warzi pay rew”, peyxembêr ma vêca Mîrac
 Wi key Ummuhan id rakewt, aşmey Recêb resay vîst hewt
 Astarey sibay nîakewt, peyxembêr ma vêca Mîrac
 Cebrâil va: “Warz bê Herem”, Muhemed ame sêr Zemzem
 Desmac girewt, yi tepişt gem, peyxembêr ma vêca Mîrac
 Cebrâil gêm Bûraq tepişt, Muhemed Peyxember wenişt
 Wir dîn rahar Qudus tepişt, peyxembêr ma vêca Mîrac
 Bûraq hezey heway şina, ça vînena pay rûnena
 Muhemed Mustefay’ bena, peyxembêr ma vêca Mîrac
 Şî hêt Beyt’ul-muqeddes’ ra, wir dî bî xalî hes-bes ra
 “Fesûbhane'l-lezî esra” ⁽⁴⁾, peyxembêr ma vêca Mîrac
 Peyxembêr Mekke d’ xwi wepişt, sukey Mekkî ra şew warişt
 Resa sukey Qudus ruenişt, peyxembêr ma vêca Mîrac

4. Fesûbhane'l-lezî esra: Qur'an, Sûreyê Îsra, ayetê yewin a. “O Homayo ke ebdê xo Muhemedî Mescîdî Heram ra beno Mescîdî Eqsa û tay ayetanê xo mojnero (musneno) ey, zaf pîl o.”

Şewa tarî çîn û hes-bes, şewa tarî rakewt her kes
 Si resa Beyt'ul-muqeddes, peyxembêr ma vêca Mîrac
 Hezret Muhemed ame war, hêt Herêm ra yi birna xar
 Peyxemberî z' amey ûnvar, peyxembêr ma vêca Mîrac
 Hezret Muhemed şî zerre, cema'et' va: "Werre! Werre!"
 Vengî resay herr û kerre, peyxembêr ma vêca Mîrac
 Peyxemberû kerd yew nîda, cema'etî vet yew seda
 Va: "Merheba!", va: "Merheba!", peyxembêr ma vêca Mîrac
 Cema'et yin ame temam, Hezret Muhemed bi îmam
 Yin kerd nimac, yin da selam, peyxembêr ma vêca Mîrac
 Peyxembêr ma kerd yew nimac, peyxembêr ma nay xwi ser tac
 Peyxemberî r' amey Mîrac, peyxembêr ma vêca Mîrac
 Muhemed ik est yew sedef, wenişt Mîrac da yew şeref
 Gina Muhemmed yew recef, peyxembêr ma vêca Mîrac
 Muhemed vêca Mîrac ser, Cebrail yi r' bi yew rehber
 Wir dîn va: "Ellahû ekber!", peyxembêr ma vêca Mîrac
 Hezret Muhemed Peyxember, Herêm Qudus ra şî teber
 Hemîn va: "Ellahû ekber!", peyxembêr ma vêca Mîrac
 Gueştarî k' ez tu r' vaj heyna, Mekke ra şî Tûrî Sîna
 Uca ra zî şî Medîna, peyxembêr ma vêca Mîrac
 Medîna ra yi kewt rahar, sukey Qudusî d' amey war
 Qudus ra wi vêca dîyar, peyxembêr ma vêca Mîrac
 Qudus îstasyuney 'erdû, sarey Qudus sarey derdû
 Peynî d' Qudus ben' cey merdû, peyxembêr ma vêca Mîrac
 Qudus îstasyuna pîl a, ti vûn Muhemed yew vil a
 Saley surêt hezey kil a, peyxembêr ma vêca Mîrac
 Qudus îstasyuney cêr î, Muhemed ame ver' berî
 Wenişt Mîrac dey xeberî, peyxembêr ma vêca Mîrac
 Hezret Muhemed Mustefa, wi bi îmamu'l-enbîya
 Tewrî Cebrail kewt hewa, peyxembêr ma vêca Mîrac
 Peyxemberî yin id ramênd, peyxembêr Qudus id ca mînd
 Wi w Cebrail tuk-teyna mînd, peyxembêr ma vêca Mîrac
 Mîrac bi sey yew minara, Mîrac a pey leqey ca ra
 Vêcvey gewey na dinya ra, peyxembêr ma vêca Mîrac

Dinya îstasyuney cêr î, şî Mîracey peyxemberî
 Ver' xwi tada asmên serî, peyxembêr ma vêca Mîrac
 Dinya pey 'eşq ha gêrena, dor-maley' xwi w ruêc gêrena
 Mîrac şina, agêrena, peyxembêr ma vêca Mîrac
 Mîrac vecena raharû, ya lez şina sey teyarû
 Resay sêr aşm û astarû, peyxembêr ma vêca Mîrac
 Aşm û ruec û astarû ra, viyêrt enî raharû ra
 Qat û qatî asmênû ra, peyxembêr ma vêca Mîrac
 Qatey asmên yewinça ya? Uca d' yew dîk dî sey say a
 Wi dîkan' 'erdû kenû haya, peyxembêr ma vêca Mîrac
 O dîk vînayîşî r' mexsûs, enî wanen ti vûn tawus
 "Sûbhane'l-melîku'l-quddûs" (5), peyxembêr ma vêca Mîrac
 Dîk' asmênû da yi selam, va: "Merheba tu r' ya îmam!"
 Pêl xwi akêrd yi kerd qiyam, peyxembêr ma vêca Mîrac
 Qatey diyin, qatey hîrin, çeher, pancin, şesin, hewtin
 Çiqas yi şî, hurmet dî yin, peyxembêr ma vêca Mîrac
 Zaf hurmet kerd şarî corî, hemîn melaket û hûrî
 Yin va: "Nûrî, nûrî, nûrî!", peyxembêr ma vêca Mîrac
 Mîrac şina sey teyara, hêt Sîdretu'l-munteha ra
 Asmên şesin id yew dar a, peyxembêr ma vêca Mîrac
 Darey Sîdre rindey d' yew a, uca d' ne suk a, ne dew a
 Dinyay' cêrî d' hema şew a, peyxembêr ma vêca Mîrac
 Melakêt asmênû yên war, sey jetû yên bîn aya dar
 Sîdre ra wi vêca diyar, peyxembêr ma vêca Mîrac
 Sîdre îstasyuney heway, Refref amey qey Mustefay'
 Çiqas xerîb gurey Homay, peyxembêr ma vêca Mîrac
 Sukey Mekkî derey' xorî y', Muhemmed şî dinyay corî
 Yi dî melakêt û hûrî, peyxembêr ma vêca Mîrac
 Cebraîl yi r' benû yew şef, qatûn asmênû gên hedef
 Pey Bûraq û Mîrac, Refref; peyxembêr ma vêca Mîrac
 Bûraq yi r' bî sey yew teqsî, ver' xwi tada hetî Qudsî
 Cebraîl va: "Ti nîtersî!", peyxembêr ma vêca Mîrac

5. Subhane'l-melîku'l-quddûs: Yew îbareya erebki ya. "Homa heme kêmasî û nuqsanî ra dûrî (munezzeh) yo."

Mîrac yi r' bî sey teyara, sey teyara şî hewa ra
 Hetî Sîdrey' Munteha ra, peyxembêr ma vêca Mîrac
 Refref yi r' bî sey yew fuzey, dayrey Rebbî dî sey muzey
 Rebbî z' yi dî, sey yi hezey, peyxembêr ma vêca Mîrac
 Muhemmed sek' weniş Refref, uca d' gina yi yew recef
 Hîcab vera yi bi hedef, peyxembêr ma vêca Mîrac
 Pey Refref sey fuzyey' heway', Mustefa şin de'wêt Homay
 Homa de'wet ken Mustefay, peyxembêr ma vêca Mîrac
 Enû de'wêt heqîqetî, enû de'wêt me'rîfetî
 Hedîye ûn' şerî'etî, peyxembêr ma vêca Mîrac
 Lay' kaînat' nika rişte, niştey kaînatî z' nişte
 Muhammed sey girzî pişte, peyxembêr ma vêca Mîrac
 Lay' kaînat' ra pey nîmend, niştey' kaînat îz yi wend
 Cebraîl yew deme ramend, peyxembêr ma vêca Mîrac
 Cebraîl yew deme ramend, weyra pey Cebraîl ca mend
 Kilometre nîn vajî çend, peyxembêr ma vêca Mîrac
 Dergey' Mîrac nîna reqem, dergey' Mîrac nîna qelem
 Refref ser o ruenay qedem, peyxembêr ma vêca Mîrac
 Refref yi r' bî yew asansor, peyxember pey Refref şî cor
 Uca d' çîn hor û vart û vor, peyxembêr ma vêca Mîrac
 Wi şî yew ca, resa yew ca, jet û fuze nîşîn uca
 Pey qudrêt Homay xwi vêca, peyxembêr ma vêca Mîrac
 Mîrac Muhammed Peyxembêr, xarîc quwêt benî besêr
 Xebêr Mîrac zaf weş xebêr, peyxembêr ma vêca Mîrac
 'Erş û kursî, lewh û qelem, hem cennet û hem cehennem
 Yi dî hîkmêt nînî reqem, peyxembêr ma vêca Mîrac
 Yi dî mabêن 'erş û fersî, yi dî hem îz tûrî wehşî
 Şînî cennet vînî neqşî, peyxembêr ma vêca Mîrac
 Yi dî neqş hîkmetan' Homay, Hezret Muhammed Mustefay
 Şî Mîrac ame ver' sibay, peyxembêr ma vêca Mîrac
 Şewa k' peyxember şî Mîrac, yi kerd hîrê rekat nimac
 Pey eşq û şewq nay xwi ser tac, peyxembêr ma vêca Mîrac
 Yi Homa dî, wi şî xwi ra, yi heyna dî, mevaj "Zur a"
 "Reahû nezleten uxra" (6), peyxembêr ma vêca Mîrac

6. Reahû nezleten ûxra: Qur'an, Sûreyê Necm (53/13). "[Muhammedî] warameyişê dîyin de o reyna dîbi."

Yi Homa dî bê ca w teref, Homay yi d' xebêr da bê herf
 Gina peyxembêr yew recef, peyxembêr ma vêca Mîrac
 Bê radar, bê televîzan, rindey Rebbî yi r' bî 'eyan
 "Ma kezzebe'l-fûad" (7) biwan, peyxembêr ma vêca Mîrac
 Vato k' yi Reb' xwi het vatû, yi wend, va: "Ettehîyyatû" (8)
 Îlm û hîkmet zaf wurat û, peyxembêr ma vêca Mîrac
 Va: "Ya Rebbî, mi veng mereyk, Homay va: "Ya Hebib, lebbeyk!"
 Hem va: "Esselamû 'eleyk! (9), peyxembêr ma vêca Mîrac
 Du'ay' hebîb' qebul bena, qaley yi ya dîyên ena,
 Va: "Esselamû 'eleyna!", peyxembêr ma vêca Mîrac
 Vaj: "Qulhuwellahû ehed (10), Ellah yew, resûl Muhemed
 Veng şî Cebraîl, va: "Eşhed!", peyxembêr ma vêca Mîrac
 Me'nay Mîrac me'na barî, şewey Mîrac yi kerd zarî
 Rebbî ra 'ef waşt qey ma rî, peyxembêr ma vêca Mîrac
 Wi berma, va: "Rebbî! Rebbî! Ummeta gunekar se bî?"
 Reb va: " 'Efû ken ya Nebî!", peyxembêr ma vêca Mîrac
 'Eyban yin ir ez settar a, gunan yin ir ez xeffar a
 Ummetey tu 'ef ken ca ra, peyxembêr ma vêca Mîrac
 Yi va: "Ya Reb! Ummet! Ummet! Senî ummet şina cennet?
 Ya Reb! Ummet îr bik' rehmet!", peyxembêr ma vêca Mîrac
 "Ena ummet gunekar a, gunan' xwi ra zaf bêzar a
 Ez 'ef ummet wazen ca ra", peyxembêr ma vêca Mîrac
 Homay va: "Eyyûhe'l-Resûl! Meters, ez tu nîken melul
 Du'an tu w ummet ken qebul", peyxembêr ma vêca Mîrac
 Hezret Muhemed Mustefa, wi ame war ummet ra va
 "Ma yentîqû 'enî'l-hewa" (11), peyxembêr ma vêca Mîrac

7. Ma kezzebû'l-fûad: Qur'an, Sûreyê Necm (53/11). "Çîyo ke ey [Muhemedî] dî, zerrîya (qelbê) ey înkâr nêkerd."
8. Ettehîyyatû: Duayê nimajî ya. Nimaj de, gama ke merdim ronişte yo, wanîyena.
9. Esselamû 'eleyk: Duayê "Ettehîyatû" de vêrena. Manayê aye: "[Ey Peyxember] Selam to ser o bo."
10. Qulhûwellahû ehed: Qur'an, Sûreyê Îklasî (112/1). Manayê aye: "Vaje: O, Homayo yew (tek) o."
11. Ma yentîqû 'enî'l-hewa: Qur'an, Sûreyê Necm (53/3). Manayê aye: "O [Muhemed] goreyê keyfê (fîkrê) xo qalî nêkeno."

Ti vatey xwi meverd belî r', qey vil hurmet bikir telî r'
Du'a bik' Muhemmed 'Elî r', peyxembêr ma vêca Mîrac

WEFATÎ NEBÎ

Namey Homay ben rehbêr ma, pey Homay abêr xebêr ma
Merg ha yenû verî ber' ma, dinya ra şî peyxembêr ma

Merdim' nezan ti vûn verg û, wi vûn "Rahar mergî derg û".

Çend weş manî peynî d' merg û, dinya ra şî peyxembêr ma

Dinya bena fanî, fanî, nêbena mal qey însanî

Miren çiqas însan ganî, dinya ra şî peyxembêr ma

Miren şinû benî însan, rîy' dinya ra, enî bizan

Vaj: "Kullun men 'eleyha fan" ⁽¹²⁾, dinya ra şî peyxembêr ma

Ti vîn xizmêt enî dînî, ti ca verdên sifre w sînî

Ti ca verdên keye w cinî, dinya ra şî peyxembêr ma

Bîg' desmacû, bik' nimacû, ti ca verdên keynû, lacû

Ti ca verdên text û tacû, dinya ra şî peyxembêr ma

Homay xwi rî bikir zarî, derdan xwi rî biwaz darî

Peynî d' mirêن, mekir yarî, dinya ra şî peyxembêr ma

Peyxemberî ha herr bin d' î, sirrî Homay nika yin d' î

Ti ca verdên ena rindî, dinya ra şî peyxembêr ma

Îbret bigîr ti hêverî, beşnaw wefat peyxemberî

Salawatû bîya yi rî, dinya ra şî peyxembêr ma

Aşmekû ra aşmey Sefêr, Rebbî yi ra amey xeber

Nêweş kewt Hezret Peyxember, dinya ra şî peyxembêr ma

Aşmey Seferî z' amey şî, peyxembêr ma kewt nêweşî

Rîy' erdûn ra vêcêy weşî, dinya ra şî peyxembêr ma

Rebîu'l-ewwel bî newî, aşma newî bî çend şewî

Melaketî debî lewî, dinya ra şî peyxembêr ma

Melaketî debî lewû, xeber ginay sukû, dewû

Xeber ginay ruecû, şewû, dinya ra şî peyxembêr ma

Ruecû waştîn nîakewtîn, şewû waştîn birakewtîn

Qiyamet waştîn pakewtîn, dinya ra şî peyxembêr ma

12. Kullun men 'eleyha fan: Qur'an, Sûreyê Rehman (55/26). Manayê aye: "Riyê erdî de heme çî fanî yo."

Qiyameta pîl vûn ena, qiyameta qic ha yena
 Qiyametey ma zî bena, dinya ra şî peyxembêr ma
 Yew ruec vecya sér mînberî, yew xutbe wend peyxemberî
 Yew naz ra yi dey xeberî, dinya ra şî peyxembêr ma
 Ver' xwi tada cema'et xwi, ver' xwi tada Ehlî Beyt xwi
 Yew naz ra kerd wesîyet xwi, dinya ra şî peyxembêr ma
 Va: "Wa mi biş' Hezret 'Elî, pey destûn xwi enû welî
 Wa awkey mi ci kir fedlî", dinya ra şî peyxembêr ma
 "Nimac mi ken Siddîq Ekber, ben xelîfe, wi ben rehber"
 Otir va, berma peyxember, dinya ra şî peyxembêr ma
 Wi berma va: "Ez rehber a, ez a hem pî ya hem bira
 Ez qey şima r' peyxember a", dinya ra şî peyxembêr ma
 "Xatir şima sehabûno, xatir şima ewladûno!"
 Peyxember nesîhet dûno, dinya ra şî peyxembêr ma
 "Ez şima r' vûn îlm û 'îrfan, mi ra pey zî merg û Qur'an
 Mi ra pey zî wir dîn bizan", dinya ra şî peyxembêr ma
 Va: "Pey Qur'an bigîn hîkmet!", va: "Pey mergî bigîn 'ibret!"
 Cema'et xwi r' da nesîhet, dinya ra şî peyxembêr ma
 Va: "Gueştarî nesîhetî, xatir şima cema'etî
 Xatir şima Ehlî Beyti", dinya ra şî peyxembêr ma
 "Xatir şima, xatir şima!", va, berma zaf peyxembêr ma
 Warişt ame key Fatima, dinya ra şî peyxembêr ma
 Serr' peyxembêr şeşt û hîre, rocgarû ⁽¹³⁾ ra rueco kîre
 Wi hem axa w hem zî mîre, dinya ra şî peyxembêr ma
 Axay peyxemberû rakewt, rocgar' nîweşî bî des hewt
 Wi sér cilanî mergî d' kewt, dinya ra şî peyxembêr ma
 Şewa dişemî bî tarî, sehabû kerd zarî-zarî
 Yin va: "Ma mendî bêwarî!", dinya ra şî peyxembêr ma
 Ruec dişeme nimac sibay, cema'et kerd yi qey Homay
 Hezret Muhemed Mustefay', dinya ra şî peyxembêr ma
 Ver' xwi tada cema'etî, ver' xwi tada Ehlî Beyti
 Heraret da nesîhetî, dinya ra şî peyxembêr ma
 Cema'etî r' kerd nesîhet, Ehlî Beyti r' kerd wesîyet
 Sehabû zaf girewt 'ibret, dinya ra şî peyxembêr ma

13. rocgar: rojgar, zeman, wext

Peyxember şêş hîrê serre, bêr key' xwi ra wi şî zerre
 Xeber ginay herr û kerre, dinya ra şî peyxembêr ma
 Xeber ginay asmên serî, xeber ginay dinyay' cêrî
 Resay cennet nê xeberî, dinya ra şî peyxembêr ma
 Ame war Hezret Cebraîl, yi ra ver ame 'Ezraîl
 Ya Reb! Îman ma nêk' zaîl, dinya ra şî peyxembêr ma
 'Ezraîl ver' ard xeberî, ame ver' bêr peyxemberî
 Fatima amey pey berî, dinya ra şî peyxembêr ma
 Fatima va: "Ti kam î, bira?" 'Ezraîl va: "Merem mi ra!"
 Ez yew xeber vûn pîy tu ra", dinya ra şî peyxembêr ma
 Fatima va: "Xuerto hey meş"! Ti pers kenî, pîy mi nêweş"
 Pî va: "Kûm?" Yê va: "Yew hebeş", dinya ra şî peyxembêr ma
 Fatima va: "Bawko, yew xuert", peyxembêr va: "Meleku'l-mewt"
 Peyxember nêweş peyser kewt, dinya ra şî peyxembêr ma
 Peyxembêr va: "Wi Gangêr û, wi ha yenû ganû berû
 Wi ha nika ganû ser û", dinya ra şî peyxembêr ma
 "Wi ha maxey ma nîcnenû, wi ha quçey ma rîcnenû
 Wi ha yew-yew ma vîcnenû", dinya ra şî peyxembêr ma
 "Wezîfey yi zaf-zaf muhîm, wi yen verî berû tim-tim
 Wi Hesen, Huseyn ken yetîm", dinya ra şî peyxembêr ma
 "Virsey yi bîya sipsîyay, cînan ciwûnû verdûn vîyay
 Wi Gangêr û, ganû ken ray", dinya ra şî peyxembêr ma
 "Wi ardoxî xeberûn o, qefelnayoxî berûn o
 Gangêrî peyxemberûn o", dinya ra şî peyxembêr ma
 "Gûn merdim' gen, kenû kerre, merdim nêşken bikir gerre
 Tera vaj, wa bêrû zerre", dinya ra şî peyxembêr ma
 Fatima va: "Xuerto bira! Ti qey nîn zerre la, ci ra?
 La ti se vanî pîy' mi ra?", dinya ra şî peyxembêr ma
 'Ezraîl selam da hêvîr, ame zerrey key' peyxembêr
 Peyxembêr yi r' weş dey xebêr, dinya ra şî peyxembêr ma
 Peyxembêr va: "Ya 'Ezraîl! La çâ w' biray mi Cebraîl?
 Ek' wi bêrû ez ben qaîl", dinya ra şî peyxembêr ma
 Hezret Cebraîl ame ser, va: "Esselam ya peyxember!"
 Yi da selam, wi ame ver, dinya ra şî peyxembêr ma

Peyxembêr va: "Ya Cebraîl! Se bena ummeta cahîl?
 De hey bê ver ya 'Ezraîl!", dinya ra şî peyxembêr ma
 "Ez ha miren şin dinya ra, me'lumat wazen şima ra
 Ummetey xwi r' bermen ca ra", dinya ra şî peyxembêr ma
 Cebraîl va: "Ti meb' melul, ummet 'ef bena ya Resûl!
 Homay du'a kerda qebul", dinya ra şî peyxembêr ma
 Va "Homay va: 'Ez Xeffar a , ez zûn ummet gunekar a
 Ummetey tu 'ef ken ca ra'", dinya ra şî peyxembêr ma
 Peyxembêr va: "Ez bîya rehet, ummetey mi r' bik' merhemet
 Ya 'Ezraîl, mi r' bik' zehmet", dinya ra şî peyxembêr ma
 "Ummet vera mi r' zehmet bik'; ya 'Ezraîl, zaf şefqet bik!
 Ya Reb, Ummeti r' rehmet bik!", dinya ra şî peyxembêr ma
 Va: "Ya Cebraîl, bewn mi ra!", Cebrâl nîşka bewn yi ra
 'Ezraîl dusa gûn yi ra, dinya ra şî peyxembêr ma
 Asmênû ra şarî corî, amey melaket û hûrî
 Decî mergî çiqas zor î, dinya ra şî peyxembêr ma
 Vila sura rezî bî zerd, 'Ezraîl ruh peyxembêr berd
 Hezret Peyxembêr wefat kerd, dinya ra şî peyxembêr ma
 Ehlî Beytî r' dinya bî hor, melakêt ha yenî sey vor
 Ruh peyxembêr girot şî cor, dinya ra şî peyxembêr ma
 Gurey Homay çiqas xerîb, 'Aîşa va: "Ha ça w' hebîb?"
 Fatima va: "Ha ça w' tebîb?", dinya ra şî peyxembêr ma
 'Aîşa va: "Hebîb merdo, yi nanî cow mird nîwerdo
 Şew nîrakewt, nimac kerdo", dinya ra şî peyxembêr ma
 Fatima va: "Bawo! Bawo!" Fatima va: "Hebîbça wo?"
 Wehyî asmênû biryawo, dinya ra şî peyxembêr ma
 'Aîşa va: "Ma vîyey mîndî!", 'Aîşa va. "Ma ca mendî!"
 Yê çend ayet' Qur'an wendî, dinya ra şî peyxembêr ma
 Fatima va: "Dayê, hey vîn! Yetîm mendî Hesen, Huseyn"
 "Ya Reb! Ma yi cennet id vîn!" dinya ra şî peyxembêr ma
 Micî xemî nişt rîy' 'erdû, Ehlî Beytî bîy sey merdû
 Sarey yin bi sarey derdû, dinya ra şî peyxembêr ma
 Yin Homay ra waştîn sebir, şewa paşemî wi şî qebir
 Xelîfe bi Ebûbekir, dinya ra şî peyxembêr ma

Medîna sukey peyxembêr, îslamî heyna bîy sey vêr
Xelîfetî resay 'Umêr, dinya ra şî peyxembêr ma
Medîna sukey Qur'anî, hezek' peyxember bi ganî
Xelîfetî kewt 'Usmanî, dinya ra şî peyxembêr ma
Medîna yew suka guler, tede defin bi peyxember
Xelîfe bi 'Elî Heyder, dinya ra şî peyxembêr ma
'Elî Heyder Hezret 'Elî, ya Reb, qey vil 'ef bik' telî!
Zazakî vûn Mehmed 'Elî, dinya ra şî peyxembêr ma.

Mîladî serrê 1971 de amo nuştiş.

Transkribekerdox: W. K. MERDIMÎN

ZIWAN Û EDEBÎYATÊ KURDKÎ

Serdar BEDIRXAN

Beytarê rojanî 05.11.2003 û 09.11.2003 de Diyarbekir de konferans û rojê edebîyatî amey viraştene. Rojanê edebîyatî de gelek nuştoxan qalî kerd. R. Lezgînî zî “ziwan û edebîyatê kurdki” ser o qalî kerd. Lezgînî çiyê zaf erjayeyî vatî. R. Lezgînî vateyê xo bi lehçeya kurmanckî hedirnabi. Mela (boka) qalanê xo biçarno kirmancî û kovara Vate de neşr biko.

Nê rojanê edebîyatî de qalîkerdoxanê kurdan yan tirkî yan zî kurmanckî qisey kerd. Nuştoxanê kirmancan zî ê ke kurmanckî zanaynî kurmanckî, ê ke nêzanaynî tirkî qisey kerd. Kesî kirmancî qalî nêkerd. Çiyê ke tewr bala mi ante no bi. Sebebê ïnan zî o bi ke goştarîkerdoxan ra zafi kirmancî fam nêkenî. Eke sebeb no bi, ganî yew kombîyayîş zî tena bi lehçeya kirmanackî bivirazîyaynî.

Eya, seke mamoste Malmisanij vano; averberdişê yew lehçe pabesteyê (girêdayeyê) tercîhanê sîyasîyan o. Nê rojê edebîyatî zî bi destê sîyasetçîyan ameybî hazirkerdiş. Ci heyf ke afişan ra yew zî kirmancî nênusîyabi.

Yewna çîyo ke bala mi anceno zî no yo: Zaf nuştoxê kirmancî kurmanckî nusenî. No durum zî lehçeya kirmancî lehçeyanê bînan ê kurdkî ra apey verdano. Eke ma giranîya xo nêdî lehçeya xo ser û ma heme ca de aye nêşuxulnî, xora kes ehemîyet nêdano aye. Eke kirmancî bi xo lehçeya xo rê xizmet nêkî, heqê ma çin o ke ma nê xizmetî kurdanê bînan ra bipawî.

Labelê yewna çî esto: Kurmancî, seba ke hûmara ïnan zaf a û kurmanckî zaf cayanê Kurdistanî de qalî bena, ma kirmancan ra pawenî ke ma lehçeya ïnan bimusî û vanî “xora şima kurmanckî zanî.” La ê ke nêzanî se benî? Î ke nêzanî xo nê dis (tewir) konferansan ra dûrî gênî û beşdar nêbenî.

Senî ke Kurdistanê Başûrî de kurdê soranî û kurmancî lehçeya yewbînî ra fam kenî, herkes eşkeno lehçeya xo de qalî biko û no zî hetê

dîyalogî ra problem nêbeno; ganî kurmanc û kirmancê vakurê Kurdîstanî zî eynî wina (inawa) xeyret bikî, yewbînan ra weş fam bikî ke wa mecbur nêmanî yewbînî de tirkî xeberî bidî.

Nê çend xususan ra dima eke ez ageyra qalîkerdişê R. Lezgînî yê corêni ser. R. Lezgîn vano:

Ewro tayê nuştoxê ke kurdkîya xo înakar nêkenî labelê seba ke ziwanê xo xo vîra kerdo, xo edebîyatçîyanê kurdan ra û eseranê xo zî edebîyatê kurdkî mîyan de hesibnenî û vanî “ziwanê tirkî de edebîyatê kurdkî”. No tewir fîkr bin ra şaş o. Çunke ma vanî “ziwan û edebîyatê kurdkî”. Ma nêeşkenî vajî “ziwanê tirkî û edebîyatê kurdkî.” No tewir yew fîkr dunya de qet çin o. Temayê nuşteyanê nê nuştoxan cuyê (heyatê) kurdan ra, veyve, edet, cemâtê kurdan ra bigîriyê û derheqê nînan de bibî zî, nê dis xebatî edebîyatê kurdkî miyan de ney, edebîyatê tirkî mîyan de hesibîyênî û edebîyatê tirkî zengîn kenî⁽¹⁾.

Tayê nuştoxi zî estî ke ziwanê xo tam nêzanî, vanî “Kurdkî qîmê ma nêkena ke ma bieşkî (bese bikerî) derd û kulê xo, waştîş, sînayîş û hîssanê xo bi aye binusî”. Şaşîya nê dis fikran ver a çiman a. Problem besnêbîyayîşê kurdkî ra ney, kêmizanayîşê ïnan ra yeno.

Tayê nuştoxi zî estî ke kurdkî nusenî labelê seba ke mentiqê tirkî reyde fikirîyênî, nê mentiqî dekenî kurdkî mîyan. Birêz R. Lezgîn vano ganî nê dis merdimî hetana ke tam waqifê kurdkî nêbî, nênusî⁽²⁾.

-
1. Goreyê fîkrê mi, xebatê îlmî, kitabê fîkrî û xebatê sey nînan ewro bi sewbîna ziwanan bibî zirarê ïnan çin o.
 2. Goreyê fîkrê mi, no tewir nuştoxi zî ganî binusî la verê ke nuşteyê ïnan çap ro bigînî ganî terefê weşanxaneyan ra redakte bibî. Problemê weşanxaneyanê ma zî yewna problemê ziwanê kurdkî yo ke nê konferansî de H. Diljenî behs kerd.

YARA MIN A

Xidir ÇELİK

Ez hes keno, hes nikeno
Yara min a, to rê çik o?
Rindek bena, pîsin bena
Para min a, to rê çik o?

Zureker a, bena melle
Melawe şarî se dele.
Mehejne, merişne pele
Dara min a, to rê çik o?

Şimena reqî, esraro
Nişimena, ê mi qerar o.
Belkî leyê to de zerar o
Karê min o, to rê çik o?

Ti Xidirî nas nikena
Rinde ra qet behs nikena.
Ti ci zana ke hes nikena?
Nûrê min a, to rê çik o?

HESEN EFENDÎYÊ BAŞKOYE

Ercan SARIÇİÇEK

Hesen Efendîye Başkoye pîyayêde (merdimêdo) rûmetin o, erkanê qizilbaşîye zaf rind zano. Verê şarê xo de vero cûy rind nêno dîyayene. Peyê cû xetayanê xo vîneno. Xo bi xo mehkemeya rindiyê û xirabîye keno. Aye ra dime vejêno çîle. Çîle, erkanê qizilbaşan de zaf çîyêde muhîm o. Pîya beno hakîmê nefşê xo. Çîyo xirab ra dûrî vindeno.

Xeybet, fitne û fesadiye ra, loqmê heramî ra destê xo anceno. Pîya beno pîyayêde rind. Heqê kesî nêweno. Her kesî de cewherê însanetîyênî vîneno. Qedr û qîymet dano însanî, heywanî; dano hardî û asmênî.

Destê xo warîyatê na dinya ra anceno. Zem û demê kesî de nîyo. Rindîye fikirîno, rindîye vîneno û rindîye vano.

Erkanê qizilbaşan de naye ra vanê merdene ra raver (aver) merdene. Pîya weş o, ama, îcraatê xo, xizmetê xo, yê heqî yê. Neheqîyêni qebul nêkeno. Xetayanê xo û guneyanê xo ra beno pak. Cewherê rindîya Heqî pêroyê tebîetî de vîneno. Bi nezerê yew (ju) çimî qayîtê her kesî beno. Ferq nêkeno beyntarê (wertê) zengînî û feqîrî. Edaletê wîjdanî şuphe nêanceno. Beno xizmetkarê raye, beno pîyayêde kamil.

Seba naye ez wazena ke nê nuşteyê xo de pîyayêde rindî, cewherêde delalî, Hesen Efendîyê Başkoye şima rê bidêni naskerdene.

Dewa Başkoye o taw (wext) nahîye bîya û girêdayîyê Têrcanî bîya. Têrcan kî (zî) girêdayîyê Erzinganî bîyo. Başkoye dewêde pîle bena. Hesen Efendî na dewe de êno dinya. Teba (tevî) dê ra hîrê domanê pîyê ey Îbrayîm Axayî benê. Hesen Efendî qijê têdîne yo. Çend serrî verê Qırkerdişê (Jenosîdê) Dêrsimî de kaxita Îbrahîm axayî ya eskerîye vejîna. Îbrayîm Axa gencê beno. Zaf rûmetin o. Têdîne ra xatir wazeno, şono lewê Sey Rizayî. Şewê-dide beno mêmânê ey. Sey Rizayî ra vano: Şîyene esta, ama beno ke ameyene nêbo. Ez emanetêde xo lewê to de nana ro. Hîrê lajê mi estê. Beno ke rojê ïnan ra yew ame û na emanete waşte. Ti o zeman bidi ey. Eke nîyamayî wa lewê to de vîndero. Ti be xo

kî qet qalê naye meke. Sey Riza soz dano ey, emanete ey gêno. Emanete kî mektube bena. Peyê cû viranê fine bi yewbînî ra, xatir wazeno şono. O kî sey (zê) ê bînan pey de nêno. Aqîbeta ey se bena kes nêzaneno. Rojî, aşmî û serrî derbaz benê. Hesen Efendi waneno, beno gencêde zanaye. Wertê şarê xo de keweno (kuno) çim. Tenê kî xeyret keno beno mudirê nahîye. Keweno bi kaleka komutanê qereqolî, qaymeqamî û erkanê dewleta Tirkîye; raye ra vejîno, beno pîyayêde bîn. Derûdormeyê ey de kesêde munasib nêmaneno, merdimê menfeetperestî tenya manenê. Pîlê xo, may û birayê xo şîret (ogit) danê ey, nêgêno (nêcêno). O ancîya têla xo de şono. Şewê hewnê xo de pîyê xo vîneno. Pîyê ey ey ra vano: "Lajê mi, mi seba to rê emanetêde rind lewê Sey Rizayî de nawa (naya) ro. Ti se kena bike, şo lewê Sey Rizayî, ey ra biwaze." Şodir wurzeno ra, kar û barê xo dano arê, şaneno raya Dêrsimî ser. Şono qonaxê Sey Rizayî, xo dano naskerdene. Şewê lewê Sey Rizayî de maneno. Roja bîne emanete gêno tey ano. Keno ra, waneno. Xo be xo, cêno dare.

Aye ra dime mudirîya nahîye ca verdano, xo anceno çîle. Erkan keno top, cem dano girêdayene; helala xo ra, yanî xanima xo ra helalîye wazeno. Yewbînî rê benê sey waye û birayî. Nefsê xo gêno (cêno) binê kontrolê aqilê xo. Heram nêweno, içkî nêşimeno, neheqîye nêkeno, zurî nêkeno, bi çimê xirabî qayîte namûsê kesî nêkeno. Xeta û guneyê ke kerdê, ïnan ra beno pak. Şono Gola Axirî ser. Beno murîdê Gola Axirî. Pukê zimistanan de, doran û şîliyan de, teng û tarîyan de tik û tenya serê Gola Axirî de hetanî heqîya xo vindeno, çîlê xo keno pirr.

Ewro o mîyanê (wertê) ma de nîyo feqet mîyanê erkanê qizilbaşanê hetê Erzinganî de bi qedr û qîmet o û se pîyayêde zaf birûmet qalê ey beno. Goreyê rîwayetê, nameyê Davut Sularî yo verên Davut Axbaba bîyo. Hesen Efendî rojê venga Davudî dano. Destur dano ey, nê nameyî vurîneno, keno Davut Sularî. Aye ra tepîya Davut beno bilbilê erkanê qizilbaşan. Hîna (huna) kî bi nê nameyî êno naskerdene. Wa rehma Heqî ey ser ro bo.

DEWRAN TO RÊ KÎ NÊMANENO

Burhan BEYAZYILDIRIM

To mi ser ra kerdo tarî
Dewran to rê kî nêmaneno.
Ti bîya sey heşê harî
Dewran to rê kî nêmaneno.

Timî nîya şewe nîya
Dimayê tengê, hîratî ya
Daru û derman xelisiya
Dewran to rê kî nêmaneno.

Yazix eşq û sewda mi rê
Mi nafile wendo to rê
Ti bîya xêxe, bîya kore
Dewran to rê kî nêmaneno.

Burhanî va: Derdî ser ra derd
Bes o êdî, to canê mi werd
Kamî ra vajî? Mi bi xo kerd.
Dewran to rê kî nêmaneno.

Îzmîr, 11.05.2003

KIRMANCKÎ DE NAMEYÊ TAYÊ NEBATAN

Ehmedê DIRIHÎ

<i>Tirkî</i>	<i>Kirmanckî (Zazakî)</i>	<i>Latînkî</i> ⁽¹⁾
aci badem	gewrvam (m), vama tehle (m) ⁽²⁾	Amygdalus amara
aci çigdem	qerqaşa payızî (m), kozvilika mêşnan(m) ..	Autumn crocus
ayrik otu	qere şırame (m), sînzek (m)	Agropyron repens
bağ sarmısağı	sîro koyî (n)	Allium vineale
balık otu	masejehr (n)	Anamirta cocculus
bodur badem	vamic (m)	Amygdalus orientalis
çiriş otu	gulike (m), hêluge (m)	Aesphodelus aestivus
çöven	kefkefok (n)	Gypsophila bicolor
dana ayağı	kardî (m), karî (m)	Arum maculatum
dere otu	virzolo, vizdewrê mîrçikan, vizdorik	Anethum graveolens
doğu yılanyastiği. axû (n)	Arum orientale
dulavrat otu	gurnigê heran	Arctium lappa
erkek pelin	rihanê maran (n)	Artemisia abronatum
frenk soğanı	kahar (n), sîrik (n)	Allium schoenoprasum
geven	gewen (n), gon (n), gûn (n)	Astragalus kurdica
güz çigdem: b. acı çigdem		
hatmi çiçeği	hîro (n), īro (n), hîrê (n)	Alcea kurdica
helva kökü: b. çöven		
kaya sarmısağı	sîrê kesayan (n), sîr kesûn (n)	Allium ampeloprasum
kırmızıköklü til-		
kikuyruğu	koksûr (n), lexandûr (n), luexandû (n)	Amaranthus retroflexus

-
1. Nameyanê latînkî de çekuya (kelîmeya) verêne yê cinsî, çekuya dîyine yê tewirî, çekuya hîrêyine yê çeşidî ya.
 2. Kilmnuşteyî
b.: biewnî, nîyade
m: makî
n: nêrî

- kızılağaç dargendar (m), sûredar (m), súrdar (m) Alnus
 kurtluca otu: b. logusa çiçeği
 kuşkonmaz merje, merji, vaşê maran Asparagus kurdica
 logusa çiçeği gafîş (n), goşê kutikan (n), melvaş (n)..... Aristolochia
 mantar sung (n) Agaricus
 maviyeşil alg kefzer (n), kevzer (n) Anabaena spirooides
 melek otu lerge (m), larûge (m) Angelica archangelica
 meryemeli çengê meryeme, meyreme Anastatica hierochuntica
 misk otu: b. erkek pelin
 öküzgözü: b. sarı papatya
 papatya elikfatik, cenecehnem, vizik (m) Anthemis
 rüzgar otu xalcinî Apera spica-venti
 sarı papatya ... kekvila zerde (m), vaşê kekûn (n), vasê kekûn (n) .. Anthemis tinctoria
 sığır dili gêlbizane (m), gelezan (m), gelzûn (m), geleziwan (m) .. Anchusa azurea kurdica
 tıbbi hatmi hîro (n), iro (n), hîrê (n) Althaea kurdica
 yabani sarmısak: b. frenk soğanı
 yavşan otu gezo sûrin (n) Artemisia herba-alba
 yılan yastiği bilikê heşî (n) Arum dioscoridis
 - puncvaş (n) Avena ludoviciana

HÎNA BAŞ O

W. K. MERDIMİN

Bi destanê xo serekendiş hîna baş o
Ziwanî dayîkan de wendîş hîna baş o

Belê, pê her ziwanî îlim tehsîl beno
La ziwanê pîrikan d' wendîş hîna baş o

Heta k' bi minet ma luwelê şarî wenê
Bê minet a nan û dowerdiş hîna baş o

Herçend terraq û yarîyê dostan weş bo zî
Hetî îlm û fen a vengdayîş hîna baş o

Heta k' ma zulumkaran rê hetkarî kenê
Ma r' hepis û zîndan de mendîş hîna baş o

Ma çi ra kedheraman rê minet bikerî?
Bi renca helale karkerdiş hîna baş o

Heta k' pê mal û milkê heram' bena zengîn
Mîyanî feqîran de mendîş hîna baş o

Nîyet pak bo zî, qalanê xo hol bisence!
Vera bêbextî çim akerdiş hîna baş o

Eke vînayoxan heq ra verî xo çarna
Xo r' mîyanî koran de mendîş hîna baş o

Vanê: "Dêze hol a ke ewro bigirîyo."
Gefan' verînan caverdayîş hîna baş o

Merdimîn, madem ke ziwan kamîyê ma ya
Ziwan' xo d' zewt û duawendiş hîna baş o.

Adare 2003

ZÎNÊ KEZÛN:

“ESKERÛN HER ÇÎ MA VÊŞNABI”

Roportajkerdox: Seyîdxan KURIJ

Seyîdxan Kurij: Nacê, ti eşkena semedê wendozanî Kovara Vateyî ya xo bida sinasnayîş?

Zînê Kezûn: Namê mi Zîn a la key bay (bawkê) mi ra Key Kezûn vacîyenû. Mi ra zî vûnî Zînê Kezûn. Ez Kur di ûmeya dinya û Kur di zewicîyaya. Mîyerdê mi ra Meh Seyîdxûnûn vatîyen. Ez wahar çar lacûn û di kênûn a.

Seyîdxan Kurij: Nacê, qaydeyo ke ma zanî ti meselayê Şêx Seîdî di qic bîya. Ti o wext çend serrî bîya û ci yenû to vîrî?



Zînê Kezûn

Zînê Kezûn: Biko, ez se vacî! Ay ruêc (rojî) ruêc zaf zuar (zorî) bî. Wexti go eskerî ûmê Kur, dûmarey bûnûn ma girot û cumyêrd ard pîyeser, ez şeş-hewtserrî bîya. Eskerûn Kur ra 32 têr tepîşt, pey resnûn girê day û ard vêr ina Guazîyerey Xecûn. Guazîyerey Xecûn ha Mehlay Erfûn ⁽¹⁾ di ya. Day (dayîka) mi va:

1. Erfûn, Kur de yew barix (baxir) a.

-Zînê, ti qic a, ço (kes) tu ra tiway (teba) nivûnû, hê şue dê bay tu tiway vûnû, nivûnû.

Ez şîya bay xwi het. Bay mi ez kerda xwi verar, lo (lewe) na min a û berma; va:

-Zînê mi, ina qutî mi ber û mi ri tutun dekir, bigîr bîya.

Mi va:

-Bayo, wilay adir naw bûn ma ya, bûn ma ho vêşenû.

Bay mi berma, esker bi çengley mi ro, ez verarey bay mi ra eşta.

Bay mi va:

-Day xwi ra vac, wa şima bigîr û îta ra şuer. Cay hêt a şuêriyen, dê Rebî se ken?

Mi da ra ez ûmeya ki bûn ma vêşaw. Ma pîyer teber di mînd. Bay mino yi eskerûn bêrd, kîst. Biray mi Remzûn qijkek bi, cînûn wi bin pîyeşûn xwi di nimit. Remzûn o qide (qayde, hawa) xêlisya. Ma a şew teber a kotî (rakewtî), sêr sibay Remzûn virişt şî.

Day mi va:

-Remzûn mi, şue biûyn (biewnî, nîyade), dê ti meyît bay xwi nivînêni?

Xwi ra her kes şîn gêraynî meyîtûn xwi, meyît xwi girotyen, deaf (defn) kerdiyen. Remzûn şinû, hêvîr ay wir dî qicûn efendîyûn vînenû. Nûmey yoy (yewî) Mistik, êy ay bîn Evdilezîz bi. Yo (yew) bira hêvîr merdbi, o birayo bîn şibi dêst xwi kerdbi bin sarê yi ra û o qide merdbi; o qide teslîm bibi. Bacê (badê) Remzûn şinû raşt Mehmed Emîn yenû. Mehmed Emîn, Key Têr ra bi.

Remzûn vatîyen: Ez şîya, mi Mehmed Emîn birîndar dî. Yi mi ra va “Remzûn ti se kên yo witê owk (awke) mi resn!” Sarê mi ser yo fes bî. Mi fesê xwi berd da owk a, la owk lîl bî. Mi owk ard da ci, yi yo fesê owk şimit. Mi yona fesê owk ard da ci. Yi fesê didin kerd nîme, ez ûnîyaya ki bi xirab. Mi va: “Ez ha gêrena meyît bay xwi.” Yi va: “Wilay Remzûn mi dî eskerûn bay tu pekna, hetûn vêr lay berd. Yin bay tu vêr lay di kişt û eşt owk.” Ez ûnîya Mehmed Emîn zaf bi xirab, mi yi ser yo Quran zî wend, wi teslîm bi. Mi sarê yi erd di na rue, ez şîya. Ez şîya gêraya, gêraya; nata şîya weta ûmeya, mi meyît bay xwi dî. Bay mi kiştbi eştbi zerê lay, owk berdbi, dabi pey yo zaduir r’. Yo dêst yi û yo lingê yi zî owk berdbî. Ez şîya gêraya, mi lingê yi dî, la mi dêst yi nidî. Mi lay ver di erd kend, mi bay xwi kerd de û mi da ra ez ûmeya.

Seyîdxan Kurij: Şima o wext ra pey se kerd?

Zînê Kezûn: Eskerûn her çî ma vêşnabi, qet tiway ma nimendbi. Pes û diwar ma zî qir kerdbî. Ma yo lehêf û yo sabun kerdbî kurney dar, tik-têna ayî mendbî. Ma teber a mêtend, ma kuçûn di mêtend. Ma nieftayn dow (dewe) di bimûn. Xwi ra dow bîbî xirabe. Ma şînî kue, kue ya ma xwi ri yeling arîye dayn, potîyen û yelinga bîyesual (bêsole) wêrdîyen. Sualê ma çîniye bî, têna çend kîyun di sual bî, ayin zî sualê xwi çoy nidayn. Ma ûnîyay ki ûna niben, ma astiwar xwi bar kerd, şî Puex. Ma Puexi di, hîrye-çeher dowûn di gêray. Ma her dow di yo mude mêtend. Ma bacê ûmê Warê Qeregual ⁽²⁾. Warê Qeregual di însûnî xerîb bî. Ma Qeregual ra ûmê dow. Ma şî ûnîyay bûnûn xwi ra. Co û xelê ma umbarûn di bî. Umbarî ma o wext herrin bî. Ma bûn xwi şay a (aşanay). Ma resay umbarûn, co û xele zî umbarûn di vêşabi. Ma herr dayn a, ma mûn (mîyan) herr ra co û xeleyo vêşaye vîcnayn, êştîyen xwi fek, wêrdîyen. Cînî şîn inî dowûn bînûn ra parse kerdîyen, binê çî ardîyen. Ma o qide idare kerd, heta ma hêna bûn xwi viraşt. Ma kot bin bûnûn xwi, ma binê pes û diwar na pirye. Ma o zimistûn hîrye-çeher kîyê yo çimê bûn di mêtend. Tûnîn o payîz bar kerd şî dowûnî Xarpîyetî sey Germilî, Şintîl û êy bînûn.

Seyîdxan Kurij: Şima rayîran di çî zehmetî dîy?

Zînê Kezûn: Ma rîye di zî zaf zehmet ûnt. Ma ray-ray çend ruêc rîye şîn. Ma vêşûn bî, ma têşûn bî. Qîci bî, gerguşî (dergûşî) bî; cumyêrd zaf çînye bî, hêna zaf cînî bî. Cînî zaf ray hin nieşkayn qicûn xwi tê bêr. Wilay inkê mi vîr nîn, ez nizûna kûm bi la yo hin nieşkay gerguşê xwi tê ber, yay gerguşê xwi bin yo têlî di nay rue. Ma gerguş o ca di ca verda, ma şî. Ma rueca bîn gêray a, ma ûmê ki gergüş huma weş a. Ma gerguş hêna girot tê berd.

Seyîdxan Kurij: Ma nê qiseykerdişê to kovara Vateyî di vejenî. Ti wazena tiwayna vacî?

Zînê Kezûn: Biko, ez se vacî? Hûma şima ra razî bû, çî mirad şima est bidû. Hûma şima kar û gurê şima di serfiraz kirû.

2. Warê Qeregual, yew warê Kur o.

YEHYAYÎ TÊR:

«KUR RA 33 TÊN KİŞİYAY»

Roportajkerdox: Seyîdxan KURIJ

Seyîdxan Kurij: Ma wazenî to bisinasnî.

Yehayî Têr: Ez Hecî Yehayî Têr a. Nûmey pî mi Têr bi, mi ra zî vûnî Yehayî Têr. Ez Kur di dadî xwi ra bîya û Kur⁽¹⁾ di bîya pîl.

Seyîdxan Kurij: Ti terteleyî 1925î de, yanî meselaya Şêx Seîdî de, çend serre bî? Ti eşkenî ma rî qalî bikîr? To ci dî, ci nidî?

Yehayî Têr: Meselay Şêx Seîd de ez desserre bîya. Ez o wext dew di bîya, mi her çî dî. Kur ra 33 têن (tenî) kişiyay, o wext a pey ma yetîm mînd. Ma bî feqîr, ma gêrayin yew pirûn nan çinîye bi ma bûr.

Seyîdxan Kurij: Nê kurijî qey kişiyayî? Senî kişiyayî?

Yehayî Têr: Wexti go (ku, ke) Çewlîgî ra kurdî bi Şêx Şerîf û Yad Mehmud Ebasî ya pîya şî Xarpîyet (Xarpêt), kurij zî pa şî. Kurijûn ra yew Xarpîyet de kişîya. Wexti go eskér Şêx Seîd mecbur mînd Xarpîyet terk kerd û hêt Çewlîgî ya tepîya agêray ûmê, ê kurijî bîn zî agêray ûmê. Eskér tirkûn zî yin dima ûmê. Eskér ûmê dûmarê dew girot û xeber şawit dew, va:

-Bîyêren, teslîm bîyen; ma wesîqa dûnî şima, şima pey wesîqa ya eşkenî serbest bigêrî.

Dewê ma ra yew başçawîş bi, nûmey yi Elî bi. Inî Elî Çawîşî xeber şawit, va:

-Bîyêren, teslîm bîyen; ma şima ef kenî.

Kurijî ûmê pîyeser, xwi miyûn di qisey kerd. Yew qisim dewicûn va:

-Ma teslîm bî, Elî Çawîş merdim ma yo, wi xirabê ma niwazênû. Elî Çawîş ma xelisnenû.

Yew qisim dewicûn zî va:

-Elî Çawîşî dest di tiway (teba) çîn û, wi zî emirqulî yû; wi nieşkenû ma bixelisnû. Bext tirkûn çîn û, ma teslîm nibenî. Tahîr Mehmudûn

1. *Kur*, yew dewê Çewlîgî ya. Çewlîgî ra 20 kilometre dûrî ya. Sînorî Depeyî û Palî de ya.

va: "Lîya meşuerîyen, teslîm mebîyen! Wilay ini hukmat şima kişenû, şima ra tek niverdenû."

La peynî di yew qisimî dewicûn teslîm bî. O wext baxirey (barixa) Erfûn ra ço (çew, kes) îta di çînîye bi. Yi wexti go wirisi (rûsi) ûmê Eşek Medûnî, o wext şibî Xarpîyet. Bekûn ra zî têna Heyd Hecî teslîm bi, ê bîn remay. La baxirey Nebûn û Binatûn ra hema-hema pîyerey (pêroyê) cûmîyerdûn teslîm bî. Eskerî ûmê Kur di 32 têna teslîm girot, dest û ling yin girê day û tê bêrd. Cuwa pey inî pîyer kişt. Babî (pîyi) mi zî ûme dest, wi zî berd kişt. Wexti go Babî mi ûme teslîm bi, dest yi, ling yi girê day; babî mi dadî mi ra va:

-Qumê, Qumê! Ay wir dî qicûn ma bigîr îta ra şue, wilay inî şima zî kişen. Ma bizûnayn ina mesela ya, ma dest nimênî (nêameynî). Ina alayî nîye, yewna alayî eskér zî bimên, nieşkayn ma.

Nûmey babî mi Yibrâhîm Xelîl bi.

Seyîdxan Kurij: Nê 32 tenî kam ca de kiştî?

Yehayî Têr: Inî 32 tenûn ra heşt têna bin Emtax⁽²⁾di kiştî. Di-hîrye têna Qeldar⁽³⁾ di, di-hîrye têna Duêşa Xîçin di kişiyay. Yib Tuapûn, Yibrâhîm Xelîl û hîrye têna Şêxûn ra, Silêmûn Arif, Wis Tuapûn, Mehmet Werîf û lacî yi bêrd bin Vay⁽⁴⁾di kiştî. Eskerûn şilamûndey yin qerfinay, pîyer kêrd yew mezel; dar û dûmarey yin girot, sungî kêrd, kiştî. Şayir, Tahîr û Mala Husêن pey Vay di kişiyay. Yew umbazî Heyd Hecî subay bi. Yi astiwarê (estora) inî subay tepîst heta Çirrey Yadî⁽⁵⁾. Vêr Çirrey Yadî di ay subay ti ra va:

-Ti hin îta ra birem!

Wi rema. Eskerûn pey ra tifing kêrd ser ra, la wi şî, xelisîya. Cafir Hemdulah (Cafir Axa) ser mergûn Kur di, lacî yi Xalit wi ver a, Qilsur di kişîya. Cafir Hemdulah, axay new dewûnî Şîrnûn bi. La axatey welat ma, sey axatey welat cîyer nîya. Ma het axay wahar erd nîyêbî. Cafir Axa zî hendey ay dewicûn bînûn wahar erd bi. Xwi ra ma het o qide erd

2. *Emtax*, yew dewê Çewlîgî ya, beyntarê Kur û Çewlîgî de ya.

3. *Qeldar*, yew mezrayê dewê Kur a.

4. *Vay*, beyntarê Kur û Emtaxî de ya.

5. *Çirrey Yadî* (Çîrrê Yadî), beyntarê Mendo û Çewlîgî de, serî rayîrî aswaltî de ya. Cuntayê Diwêsi Êlulê 1980 ra pey dewlete namê na çirre kerd "Ata Çeşme" la şarî ma hançî zî aye ra vano Çirrey Yadî.

zî cîn û. Dewîc hêna zaf pes û diwar kenî wîye. La mi va pes, o qide birr pêş nîye. Her dewic o wext çend biz û mîyeşnê û çend mûngey yi bî. Îdarey Cafir Axay zî sey îdarey ay dewicûn bînûn bi. Wexti go yew deway (dawaya) Şîrnûn bibîn, Cafir Axay vera yin dewa hal kerdiyen.

Ma hêna bîyerim esil mesela. Arif Şekûn û Melk Şekûn, Mendo⁽⁶⁾ di kîşîyay. Mehmet Emîn zerê dew di sungî kerd, kişt. Wi niweş bi, mîyûn cilûn di bi. Eskerûn wi yew ray sungî kerd, nimerd; hêna ûmê sungî kerd, kişt.

Seyîdxan Kurij: To va “eskerûn cûmîyerdî, teslîm girotî û kiştî”, la cinî û qicî şima se bî?

Yehyayî Têr: Ma qicî û cînî key Hus Ehm di ardî pîyeser. Şêx Dorîyeş zî ma ya bi. Yin ma kêrd zere, cil ard eşt pîyeser. Ez tersaya, mi dadî xwi ra va:

-Heywax, heywax! Dayê, ma îta di veşnêni.

Şêx Dorîyeş va:

-Wilê mi (lajî mi, tutî mi) meters! Tiway nibenû.

Yin ard adir na pa, tîye nikot. Qaz şâ pirye û adir na pa, hûnc tîye nikot. Yew bomba eşt zere la bomba zî niteqay. Yin ma kêrd teber û adir na bûn a, bûn hebîyek yew ray di veş. Bacey (badê) eskerûn adir na pîyerê bûnûn a, pîyerê dew veşnay. Di eskerî kotî bin quel Şêx Dorîyeş, ma şî vêr Qilê Suafî Reşûn. Ma şî vêr Qilê Reşûn eg (eke) eskerûn pîyerê cinî îta di ard pîyeser, kilaw yin sarê yin ra nay rue. Eskerûn cînûn ra vatîyen ki bin kilawûn şima di perê estî. Ay di eskér ki ma het bî, yin tifing darit ay eskerûn bînûn, va:

-Wilay şima qaris dewicûn bî, ma şima kişen! Ina dewê şêxûn a, inî pîyer bisilmûn (musluman) î.

Inay ser ra eskerûn ma ca verday, şî. Yin Şêx Dorîyeş Efendî girot û tê de berd Kerrê Efendiyûn⁽⁷⁾. Ma çend têñ pa Şêx Dorîyeş a şî mîyûn gem, Kerrê Efendî. Ma oca di yew mude mînd û cuwa pey eskér şî, ma zi agêray, şî dew. Ma amê ki bûn ma kot tîye, hê veşen. Ma nata-weta şî ûme ki ma bûnûn hûn (hewn) a kir, la ma nişkay hûn a kir.

Seyîdxan Kurij: O wext ra pey, şima ê kesê ke weş mendî, şima se ra şî?

6. *Mendo*, yew dewê Çewligî ya. Çewligî ra 10 kîlometreyî dûrî ya.

7. *Kerrê Efendiyûn*, yew kerre yo ke keweno (kuweno) perrî corî dewê Kur ser.

Yehyayî Têr: Xwi ra baxirey Erfûn ra ço dew de çînîye bi, yi pîyer Xarpîyet di bî. Bekûn pîyer remay şî. Ap mi kişîya, babî mi kişîya. Yew pîrîk mi bi, wi zî heştayserre bi. Pîrîk mi o wext gueme (gome) di bi, yi nişka biremû. Eskerûn tirkûn talûn ma berd, tiway ma niverda. Pes ma bi, 150 kelîcê ma bî, eskerûn pîyer sare birnay. Dadî mi, ez girota ma remay şî. Ma şî kue ya gêray. Tiway ma çînîye bi, nûn ma wişk çînîye bi ma bûr; ma vêşûnê ver helag bî. Eskerûn zexre pîyer pa bûnûn a veşnabi. Ez yetîm menda, ma kuçûn di mînd; çoy ma ri waharey nikêrdîyen. Xwi ra ço îta di nimendbi, di-hîrye kîyey têna mîndbî; ay bîn pîyer remaybî. Tayn şîbî, Xarpîyet, tayn hêt Pîyex a ⁽⁸⁾ şîbî. Yew kîy Ehmêd Ehmedûn yew zi kîy Têr Sarî, Kur di mîndbi. Ma çend aşm têşûn-vêşûn, neçar û pêr-perîşûn nata- weta gêray. Ma payîz hûna ûmê dew. Dewîc ûmê pîyeser, yewbînûn ri ardim kerd. Ma hêdî-hêdî bûn xwi viraştî û kot bin bûnûn xwi. O zimistûn, ti çi qide vac ma o qide feqîrey ûnt. Wisar binê qatix vêcîya, tar û tur vêcîya, ma binêna kot hîrayê.

Çend serrî Yad Mehmud Ebasî û umbaz xwi ûmên îta. Yi ûmên kîyûn ma, ûmên gem di vindêrtîyen; dewicûn ci ri çî wêr (werdî) berdîyen. Ma o wext ûmnûnûn şîn ware, Yad û umbaz xwi zaf ûmên ware.

Dewê Kur, Hamnanî 2003

8. *Pîyex (Puex)*, yew mintiqayê Çewlîgî ya.

TI MELEMA ZERRÎ YA

Gulbehar ÇELİK

Ti melema zerrî ya
Roştî ya çiman a ti.
Ez to de bena tal
To de bena pirr.
Çiyêde rind yan kî xirab
Vaje mi rê.
Wext beno ez wayîr a
Wext beno çiyê nîya.
Ti qelema destanê min a
Ti ziwanê aliman de ya.
Ceng ceng o
Ti kî aştî ya.
Birîne ke birîn a
Ti kî sewda ya.
Orteyê gulan de
Bena tarî û roştî
Çimanê mi de nişena ro.
Seke ti sey sewda ya
Seke ti saya dinya ya.

Derheqê kirmancan (zazayan) de konferans:

REWŞA KIRMANCKÎ (ZAZAKÎ)

B. ŞİLAN

2 8ê aşma gucige (sibate) de, ede paytextê Almanya Berlin de bi nameyê “Rewşa Kirmancî” konferansê ame amadekerdene. Amadekerdoxê konferansî Înstitutê Ziwan û Kulturê Kirmancî (Zazayı) bî.

Konferansî, salona Werkstatt der Kulturen de, saete 14.30 de bi qiseykerdişê serekê Înstitutî Hesen Çîmenî dest pêkerd. Hesen Çîmenî, rakerdiş (akerdiş) de silam da meymanan û bi kilmekîye programî ser



Konferansê Berlînî (28.02.2004)

o agahdarîye dê. Nê qiseykerdişî ra dime goreyê rojeve (gündem), babetî (mewzûyî) ameyî pêşkêşerdene. Temayê ke konferans de ser o ame qiseykerdene nê bî:

1. Muhîmîya ziwanî û şexsîyetê merdimî ser o têşîrê xo
Amadekerdoxê na babete, nuştox û mamosta Lerzan Jandîl, moderator kî (zî) nuştox Çeko bî.

Lerzan Jandîl, qiseykerdişê xo de ziwan çik o (çi yo), çitûr (senî) êno meydan, doman çitûr ey museno; averşiyayîşê kesîya merdimî de rolê ziwanê dayîke û bi nê ziwanî wendîş û nuştîşî çik o; nê persan ser o vinet. Bi ziwanê dayîke wendîş û nuştîş qey muhîm o? Kesê ke wazenê ziwanê miletê vîndî kerê, qey qedexekerdişê (yasaxkerdişê) ziwanî ra dest pêkenê? Nê babetî kî hetê qiseykerdoxî ra amê îfadekerdene.

2. Nasname û kulturê kirmancan

Na babete, hetê nuştox û serredaktorê kovara Vateyî Malmîsanijî ra amê amadekerdene. Moderator kî Dr. Şukrî Guler bî.

Malmîsanijî, qiseykerdişê xo de giranîyê dê nasnameyi, bi vatenêda bîne xonamekerdişî. Ey qiseykerdişê xo de eşkera kerd ke kurdê ke kirmancî qisey kenê, mintiqayanê cîya-cîyayan de xo ra “kirmanc”, “kird”, “dimîlî” yan kî “zaza” vanê. Qiseykerdox, yew bi yew nê nameyan ser o vinet û mîsalê tarîxî û rojaneyî dayî.

3. Xoverdayîşê (xoverrodayîşê) kurdan de rolê kirmancan

Na babete hetê nuştox Munzur Çemî ra amê pêşkêşerdene û moderatorîye kî tepîya Dr. Şukrî Gulerî kerde.

Munzur Çem, qiseykerdişê xo de bi kilmekîye, seserra 20. de xoverdayîşanê kurdan ê Kurdistanê Vakurî ser o vinet; bi nimûneyan eşkera kerd ke seserra 20. de kurdê ke kirmancî qisey kenê, xoverdayîşanê neteweyîyan (miliyan) de aktif ca girewto. Lehçe, dîn ya kî mezhebê xo çi beno va (wa) bibo, welatperweran dest dayo (do) yewbînî û xebata azadîye pîya kerda.

4. Ziwan û kulturê kirmancan.

Pêşkêşkerdoxê na babeta aktuele kî nuştox, endamê redaksîyonê kovara Vateyî û mamosta J. Îhsan Espar bî. Nê qisimî de moderator Çeko bî.

J. Îhsan Espar, qiseykerdişê xo de, muhîmîya standardîzekerdişî ser o vinet û na çarçewa de kirmancî ra nimûneyî dayî. Amadekerdoxî, no mîyan de derheqê kar û gureyê Grûba Vateyî de kî agahdarîye dê, hetanê cîya-cîyayan ra û bi îstatîstîkan kovara Vateyî dê naskerdene.

Ziwanê konferansî kirmancî û almankî bî. Yanî qiseykerdoxan kirmancî qisey kerd, pers û munaqeşeyî –hema hema ke pêro- bi kirmancî bî. Labelê hem qiseyê amadekerdoxan hem kî pers û cewabî bi kilmekîye almankî kî vajîyayî. Karê çarnayîşî (tadayîşî) kî hetê Huseyîn Kulu û Dr. Şukrî Gulerî ra ame kerdene.

Derheqê nê konferansî de nuqtaya tewr muhîma ke merdim ser o vinderone na ya: Reya verên a ke na çarçewa de konferansê bi kirmancî êno amadekerdene.

Konferans serkewte qedîya. Konferansî ra dime şan de, hetê Înstîtutî ra şenayîyê amê amadekerdene.

ŞINASÎ

N. CELALÎ

Xerîbî, zerê keyê xo di
Tame fekî ma xeripîya, werdî şarî ra
Tasék do bidîn mi
Wa boyê gendar ti ra bîyorû.

Mi rî yew lawik vajîn
Wa kirdkî bû
Hawar, hawar, hawar
Wa hawarî bû
Xem û xeyalanî mi wa têra kû

Ho ça koy' ma yo wenik?
Ma germixîyê na bûnî d'
Xo bidîn kîşt
Wa heway koy' mi ri d'
Ma verêna şinasî yê.

Tebaxe 2003

RAWEYA FERMANÎ

Merdim bi raweya fermanî (emirî) yan yew emir
dano yan kî kesê ra çiyê wazeno, dixalet keno.
Mi na xebata xo de kirmancîya Dêrsim û
Gimgimî bingê girewta:

Yew kes bi ti Qeleme bide mi!
Yew kes bi şima ⁽¹⁾ Qeleme bidêrê mi!

Zaf kesî bi şima Qeleme bidêrê mi!

Merdim raweya fermanî de yew dexelet ya kî
yew wâstene bi çekuya “keremê xo” ano re ziwan.
Yew kes bi ti Keremê xo qeleme bide mi!
Zaf kesî bi şima Keremê xo qeleme bidêrê mi!


Eke kokê karî (fîlî) bi -na-yene biqedîyo, o taw:

1- Kesê dîyînê yewhûmarî de raweya fermanî bi “bi-”ye, *kokê karî* demê nikayî de ⁽²⁾ û bi “-e”ye virazîno. Modus û kesnîşan “-ena”ye ginena war ro:

çarnayene Ti çarnena raweya fermanî: Biçarne!
miradnayene Ti miradnena raweya fermanî: Bimiradne!
rijnayene Ti rijnena raweya fermanî: Birijne!
zewecnayene Ti zewecnena raweya fermanî: Bizewcene!

1.1- Negatîfiya raweya fermanî bi “me-”ye virazîna, “bi-”ye ginena war ro:

1. Her çığa ke pratîk de nêno vatene kî, kirmancî de merdim şîkîno hurendîya “ti” de sey formê qedrî “şima” kî bigêro. Hurendîya “Ti şona?” de merdim şîkîno bivajo “şima şonê?” kî.
2. Tayê kesî idîa kenê, ke kokê nê karî, kokê konjunktîfi l yo. Labelê konjunktîf l kî bi kokê demê nikayî virazîno. Bingê demê nikayî yo.



Lerzan JANDİL

raweya fermanî *halo negatîf*
 Biçarne! Meçarne!
 Bimiradne! Memiradne!
 Birijne! Merijne!
 Bizewecne! Mezewecne!

2- Kesê dîyînê zafhûmarî de raweya fermanî wuncîya bi “*bi-*”ye, *kokê karî* demê nikayî de û bi “-*ê*”ye virazîno. Modus û kesnîşan “*enê*”ye ginena war ro:

çarnayene şima çarnenê. raweya fermanî: Biçarnê!
 miradnayene şima miradnenê. raweya fermanî: Bimiradnê!
 rijnayene şima rijnenê. raweya fermanî: Birijnê!
 zewecnayene şima zewecnenê. raweya fermanî: Bizewecnê!

2.1- Negatîfiya raweya fermanî wuncîya bi “*me-*”ye virazîna û “*bi-*”ye ginena war ro:

raweya fermanî *halo negatîf*
 Biçarnê! Meçarnê!
 Bimiradnê! Memiradnê!
 Birijnê! Merijnê!
 Bizewecnê! Mezewecnê!

Eke kokê karî bi “-*i-yene*” biqedîyo, o taw:

3- Kesê dîyînê yewhûmarî de raweya fermanî bi “*bi-*”ye, *kokê karî* demê nikayî de û bi “-*ye*”⁽³⁾ ye virazîno. Modus û kesnîşan “-*na*”ye ginena war ro:

fetelîyene Ti fetelîna. raweya fermanî: Bifeteliye!
 miradîyene Ti miradîna. raweya fermanî: Bimiradiye!
 qefelîyene Ti qefelîna. raweya fermanî: Biqefeliye!
 zewecîyene Ti zewecîna. raweya fermanî: Bizeweciye!

3. Funksîyonê “*y*”ya nêmvenge, teyna meseleya rehet vatene wa.

3.1- Negatîfiye:

raweya fermanî *halo negatîf*
 Bifetelîye! Mefetelîye!
 Bimiradîye! Memiradîye!
 Biqefelîye! Meqefeliye!
 Bizewecîye! Mezewecîye!

4- Kesê dîyînê zafhûmarî de raweya fermanî wuncîya bi “*bi-*”, *kokê karî* demê nikayî de û “*-yê*”ye virazîno. Modus û kesnîşan “*-nê*”ye ginena war ro:

feteliyene şima fetelînê raweya fermanî: Bifetelîyê!
 miradîyene şima miradînê raweya fermanî: Bimiradîyê!
 qefeliyene şima qefelînê raweya fermanî: Biqefelîyê!
 zewecîyene şima zewecînê raweya fermanî: Bizewecîyê!

4.1- Negatîfiye:

raweya fermanî *halo negatîf*
 Bifetelîyê! Mefetelîyê!
 Bimiradîyê! Memiradîyê!
 Biqefelîyê! Meqefeliyê!
 Bizewecîyê! Mezewecîyê!

Eke kokê karî bi “*-ayene*” biqedîyo, o taw:

5- Kesê dîyînê yewhûmarî de raweya fermanî bi “*bi-*”ye, *kokê karî* demê nikayî de û bi “*-e*”ye virazîno. Modus û kesnîşan “*-ena*” ye ginena war ro:

asayene Ti asena raweya fermanî: Biase!
 persayene Ti persena raweya fermanî: Biperse!
 tersayene Ti tersena raweya fermanî: Biterse!
 kuxayene Ti kuxena raweya fermanî: Bikuxe!

5.1- Negatîfiye:

raweya fermanî *halo negatîf*
 Biase! Mease!
 Biperse Meperse

Biterse! Meterse!
 Bikuxe! Mekuxe!

6- Kesê dîyînê yewhûmarî de raweya fermanî bi “bi-”ye, *kokê kari* demê nikayî de û bi “-ê”ye virazîno. Modus û kesnîşan “-enê” ye ginena war ro:

asayene şima asenê raweya fermanî: Biasê!
 persayene şima persenê. raweya fermanî: Bipersê!
 tersayene şima tersenê. raweya fermanî: Bitersê!
 kuxayene şima kuxenê. raweya fermanî: Bikuxê!

6.1- Negatîfiye:

raweya fermanî halo negatîf
 Biasê! Measê!
 Bipersê Mepersê
 Bitersê! Metersê!
 Bikuxê! Mekuxê!

7- Tayê karê bêqaydeyî:

amayene
 Ti êna raweya fermanî: Bê!
 Şima ênê. raweya fermanî: Bêrê!
 ardene
 Ti ana raweya fermanî: Biya!
 Şima anê raweya fermanî: Biyarê!
 kewtene
 Ti kuna. raweya fermanî: Bikuye!
 Şima kunê. raweya fermanî: Bikuyê!
 litene
 Ti lêna raweya fermanî: Bile!
 Şima lênen. raweya fermanî: Bilê!
 şiyene
 Ti şona. raweya fermanî: şo!
 Şima şonê. raweya fermanî: şorê!

zayene
Mîye zêna. raweya fermanî: Bize!
Mangayî zênê. raweya fermanî: Bizê!

7.1- Negatîfîye:

raweya fermanî halo negatîf
Bê! Mê!
Bêrê! Mêrê!

Biya Miya!
Biyarê Miyarê!

Bikuye! Mekuye!
Bikuyê! Mekuyê!

Bile! Mele!
Bilê! Melê!

Şo! Meşo!
Şorê! Meşore!

Bize! Meze!
Bizê! Mezê!

8- Kokê karanê “bîyene” û “berdene” demê nikayî de sey yewbînî yê, formê raweya fermanî de:

bîyene
Ti bena. raweya fermanî: Bibe!
Şima benê. raweya fermanî: Bibê!

berdene
Ti bena. raweya fermanî: Bere! (bi)bere!
Şima benê. raweya fermanî: Berê! (bi)berê!

8.1- Negatîfîye:

raweya fermanî *halo negatîf*

Bibe! Mebe!

Bibê! Mebê!

Bere! Mebere!

Berê! Meberê!

Gurênayena “bi-”ye:

9- “-i”yê “bi-”ye gineno war ro:

antene

Ti ancena. raweya fermanî: Bance! (bi)ance!

Şima ancenê. raweya fermanî: Bancê! (bi)ancê!

eştene

Ti erzena. raweya fermanî: Berze! (bi)erze!

Şima erzenê. raweya fermanî: Berzê! (bi)erzê!

erziyene

Ti erzîna. raweya fermanî: Berzîye! (bi)erzîye!

Şima erzînê. raweya fermanî: Berzîyê! (bi)erzîyê!

9.1- Negatîfîye:

raweya fermanî *halo negatif*

Biance! Meance!

Biancê! Meance!

Berze! Merze! Meerze!

Berzê! Merzê! Meerzê!

Berzîye! Merzîye! Meerzîye!

Berzîyê! Merzîyê! Meerzîyê!

10- “-i”yê “bi-”ye gineno war ro û “we-” beno “-u” (⁴):

werdene

Ti wena. raweya fermanî: Bure!

Şima wenê. raweya fermanî: Burê!

10.1- Negatîfiye:

raweya fermanî halo negatîf

Bure! Mewe!

Burê! Mewerê!

11- Herfa “y”ye êna mîyanê “bi-”ye û karî:

ardene

Ti ana. raweya fermanî: Biya!

Şima anê. raweya fermanî: Biyarê!

11.1- Negatîfiye de herfa “-e”ya veredatê negatîfiyê raweya fermanî “me”ye bena “-i”:

raweya fermanî halo negatîf

Biya! Miya!

Biyarê! Miyarê!

12- Veredatê raweya fermanî “bi-”ye ginena war ro:

berdene

Ti bena. raweya fermanî: Bere!

Şima benê. raweya fermanî: Berê!

12.1- Negatîfiye:

raweya fermanî halo negatîf

Bere! Mebere!

Berê! Meberê!

4. Tayê cayan de na “we”ye bena “o”kî. Hurêndîya “Bure!” de, “Bore!” û hurêndîya “Burê!” de, “Borê!” kî vajîno.

13- Karê ke kesê dîyînê zafhûmarî de hurêndîya “-ê”ye de “-erê”ye gênê:

kerdene

Ti kena. raweya fermanî: Bike!

Şima kenê. raweya fermanî: Bikerê!

vindetene

Ti vindena. raweya fermanî: Bivinde!

Şima videnê. raweya fermanî: Bivinderê!

13.1- Negatîfiye:

raweya fermanî *halo negatîf*

Bike! Meke!

Bikerê! Mekerê!

Bivinde! Mevinde!

Bivinderê! Mevinderê!

14- Karê ke şarî mîyan de hem bi “bi-”ye û hem kî bê “bi-”ye vajînê (⁵):
potene

Ti pojena. raweya fermanî: Bipoje! şarî mîyan de: Poje!

Şima pojenê. raweya fermanî: Bipojê! Pojê!

vatene

Ti vana. raweya fermanî: Bivaje! Vaje!

Şima vanê. raweya fermanî: Bivajê! Vajê!

viraştene

Ti virazena. raweya fermanî: Biviraze! Viraze!

Şima virazenê. raweya fermanî: Bivirazê! Virazê!

vindetene

Ti vindena. raweya fermanî: Bivinde! Vinde!

Şima videnê. raweya fermanî: Bivinderê! ... Vinderê!

5. Nê karî gegane yew dewe de kî hetê tayê kesan ra bi “bi-” û hetê tayê kesan ra kî bê “bi-” vajînê.

14.1- Negatîfiya raweya fermanî yê nê karan kî bi “me-”ye virazîna
û “bi-”ye ginena war ro:

raweya fermanî halo negatîf

Bipoje! Poje! Mepoje!

Bipojê! Pojê! Mepojê!

Bivaje! Vaje! Mevaje!

Bivajê! Vajê! Mevajê!

Biviraze! Viraze! Meviraze!

Bivirazê! Virazê! Mevirazê!

Bivinde! Vinde! Mevinde!

Bivinderê! Vinderê! Mevinderê!

15- Raweya fermanî bi karanê refleksîfan yan kî karanê bi “xo” yî:

xo antene

Ti xo ancena. raweya fermanî: Xo biance!

Şima xo ancenê. raweya fermanî: xo biance!
xo diyene⁽⁶⁾

Ti xo vînena. raweya fermanî: Xo bivîne!

Şima xo vînenê. raweya fermanî: Xo bivînê!
xo kinitene

Ti xo kinena. raweya fermanî: Xo bikine!

Şima xo kinenê. raweya fermanî: xo bikinê!
xo lewnayene

Ti xo lewnena. raweya fermanî: Xo bilewne!

Şima xo lewnenê. raweya fermanî: Xo bilewnê!
xo şutene

Ti xo şuna. raweya fermanî: Xo bişuye!

Şima xo şunê. raweya fermanî: Xo bişuyê!
xo viraştene

Ti xo virazena. raweya fermanî: Xo biviraze! Xo viraze!

Şima xo virazenê. raweya fermanî: Xo bivirazê! Xo virazê!

6. Karêko bêqayde yo. Demê nikayî de sey “vînitene” wa.

- xo ca kerdene
 Ti xo kena ca raweya fermanî: Xo bike ca! Xo ca ke!
 Şima xo kenê ca raweya fermanî: Xo bikêrê ca! Xo ca kêrê!
 xo de nîyadayene
 Ti xo de nîya dana. raweya fermanî: Xo de nîyabide! Xo de nîyade!
 Şima xo de nîya danê... raweya fermanî: Xo de nîyabidêrê! .. Xo de nîyadêrê!
 xo ra merednayene
 Ti xo merednena ra..... raweya fermanî: Xo bimeredne ra! .. Xo rameredne!
 Şima xo merednenê ra.. raweya fermanî: Xo bimerednê ra! .. Xo ramerednê!
- 15.1- Negatîfiya raweya fermanî yê nê karan kî bi “me-”ye virazîna
 û “bi-”ye ginena war ro:**
- raweya fermanî *halo negatif*
 Xo biance! Xo meance!
 Xo biancê! Xo meancê!
- Xo bivîne! Xo mevîne!
 Xo bivînê! Xo mevîne!
- Xo bikine! Xo mekine!
 Xo bikinê! Xo mekinê!
- Xo bilewne! Xo melewne!
 Xo bilewnê! Xo melewnê!
- Xo bişuye! Xo meşuye!
 Xo bişuyê! Xo meşuyê!
- Xo biviraze! Xo meviraze!
 Xo bivirazê! Xo mevirazê!
- Xo bike ca! Xo meke ca! Xo ca bike!
 Xo bikerê ca! Xo mekerê ca! Xo ca bikerê!
- Xo de nîya bide! Xo de nîya mede!
 Xo de nîya bidêrê! Xo de nîya medêrê!

Xo bimeredne ra! Xo memeredne ra!
 Xo bimerednê ra! Xo memerednê ra!

16- Halê çîye ... dayene de:
 ardene dayene

Ti dana ardene. raweya fermanî: Bide ardene! şarî mîyan de: Ardene de!
 Şima danê ardene. raweya fermanî: Bidêrê ardene! Ardene dê!
 kerdene dayene

Ti dana kerdene. raweya fermanî: Bide kerdene! Kerdene de!
 Şima danê kerdene. raweya fermanî: Bidêrê kerdene! Kerdene dê!
 viraştene dayene

Ti dana viraştene. raweya fermanî: Bide viraştene! Viraştene de!
 Şima danê viraştene. raweya fermanî: Bidêrê viraştene! .. Viraştene dê!

16.1- Negatîfiye:

raweya fermanî *halo negatif*
 Bide ardene! Ardene de! Mede ardene!
 Bidêrê ardene! Ardene dê! Medêrê ardene!

Bide kerdene! Kerdene de! Mede kerdene!
 Bidêrê kerdene! Kerdene dê! Medêrê kerdene!

Bide viraştene! Viraştene de! Mede viraştene!
 Bidêrê viraştene! Viraştene dê! Medêrê viraştene!


17- Halê pasîfi de ⁽⁷⁾:

kiştene amayene
 Ti êna ... kiştene. raweya fermanî: Bê kiştene!
 Şima ênê ... kiştene. raweya fermanî: Bêrê kiştene!

7. Qesekerdena rojanîye de halê passîfi de raweya fermanî bigêrîme ke qe nêno xebetnayene. Labelê wuncîya kî hetê gramerî ra lazim o û ziwanê ma de kî no form esto.

17.1- Negatiffiye:

raweya fermanî *halo negatif*
Bê kiştene! Mê kiştene!
Bêrê kiştene! Mêrê kiştene!



OY HEWAR DILÊ MI

Newzat VALÊRÎ

Meberm dilê mi, meberm
A yara bêwefa
Gulê to ya sûr tera kerd
Gulîstanê to talan kerd
Çikêk nîyeno to dest ra, ax dilê mi
Bîla bermî û bîla nalî.

Ax dilê mi, ax!
A yara bêrehm
Adiro har eşto keyeyê to
Çikêk nîyeno to dest ra, ax dilê mi
Bîla bermî û bîla nalî.

Oy hewar dilê mi, oy!
A yara bêbext
Bîya yew seyddara zaf yeman
Xezalê tu bî ela kerd birîndar
Çikêk nîyeno to dest ra, ax dilê mi
Bîla bermî û bîla nalî.

Çewlîg, 29.07.1997

TI KOTÎ YA? VEJÎYE BÊ!

Akman GEDÎK

Emrê mi vêreno ra
mi çiyê fam nêkerd na dinya zalime ra
saetî vêrenê ra
sey deqîqa ênê mi rê
emrê mi bîyo sey duyê cixarî
veşena ez, barî barî
nişena perranê vayî ra
va, mi gêno xo ver, beno
ge dano na het ra ge dano a het ra.

Zerrê mi têşan
têşanê çimanê siyayan
têşanê huyayışan
ax gula m'
ax cîgera m'
roştîya çimê mi
endamê to,
sey pezkovîya serê koyî bî
bê qusur, bê hîle
to ez helêna
adirê zerê mi
ez veşna.

Ti kotî ya? Mevinde bê!
Bê to ez helak a
emrê mi vêreno ra
mi çiyê fam nêkerd.

Ti kotî ya? Vejîye bê!
Rojî vêrenê ra
aşmî vêrenê ra.

Ti nîyayêne nêbîya
sey yew mayîna xame bîya
bêgem bîya
vazdêne verba koyî.

Ti kotî ya? Bê!
Serê wisarî, verê zimistanî
vejîye bê.

Emrê mi vêreno ra
sey adiroka wisarî
wext ke vêrd ra
poyîna xo bi xo de.

Ti kotî ya? Vejîye bê!
Menda sey kutikêde bêwayîrî
teber ra, lerzena
vêşan a ez.

Ti kotî ya? Vejîye bê!
Mi bigîre qefsîngê xo.

ÎDYOMÊ MA-VI

Roşan LEZGİN

D

dadî û cinîya yewî pol û pere kerdiş: Nengê zaf pîs û giranî [bi] yewî çînayîş

Dadî/may û waya mi bo: Ez bi çimê nebaşî û nemehremîye ney la sey dadî û waya xo aye ra ewnêna.

Dadîya/maya ey/aye va “Lawo!”: Rastê belaya xo ame; bêkeysîye de, zor de mend. Dekewt halêkê xirabî.

Rehet nêvindert, engîsta xo qulan ra çarnay, peynîye de raştê belaya xo ame û *dadîya ey va “Lawo!”*

Dadîya/maya hewt lajan siloyî ser o mirena: Gama ke kar û gure yan zî çiyêk pabeyê zaf merdiman (kesan) mend, her kes xo dano kîşte û vano “Mi rê çi!”

dadîya şeytanî bîyayîş: Bi her tewirê hîle, mûzirî û firqûziye zanayîş yan zî kerdiş. Şeytanîye kerdiş, zinguriye kerdiş, têw dayîş.

Dage daga ey/aye ya: Dewran dewranê ey/aye yo. Serdestî ya ey/aye ya.

dalpey kerdiş: Gama ke di tenî, yan zî çend tenî qisey kenê, teber ra dekewtiş mîyanê qiseyanê înan; mudaxele kerdişê sohbetê ê bînan. Fuzûliye kerdiş; qiseyê vengî kerdiş; tewş xeberî dayîş.

damara zeïfe bîyayîş: Cayo tewr zeïf. Heto qels; qelsîye.

dar de kerdiş: îdam kerdiş

dar û ber ... rê bermayîş: zaf zêde bêkeysîye de, tengane de mendîş

dar û ber ... rê dijmin/dişmen bîyayîş: Her kes neyar/dijmin/dışmen bîyayîş. Her kes xo ra aciz kerdiş û heridnayîş/cigirnayîş.

Dar û ber tede/teder yeno ziwan: Derd û dejê ey/aye zaf-zaf giran o. Zaf-zaf perîşan o/a. Bêmecalîye; zêde ra tengane de mendîş.

dara xo ra şikîyaye bîyayîş: xulqê xo ra mulayîm bîyayîş; serenermiye; fekweşî, zarweşîye

Dare qeléya/qileyaya, ma biewnî hela gili kam heta şinê?: Sermîyan mîyan ra darîyayo we, hela ma biewnî ê mendeyî se kenê, dekewenê ci hal. Çîyo ke amêne hêvîkerdiş/pawîyaynê, qewimîya; hela ma bivînin tesîr û peynîye ey se bena.

Dayê min vilî û nérgizî, dayê şarî gayî û bizi: Ê mi heme kêna yê, ê kar û gurêyayîşî nîyê la ê şarî laj ê, yê xebate yê. Keso ke rewşa/halê xo ra razî nîyo nê vateyî vano.

Dayê ro kêna xo şîret kerde, kêna şîye serê tehta lojine de ronişte û va: “Dayê, qina min xişn a yan tehta lojine?”: Gama ke merdim ro yewêk şîretan keno û goşdaritox sey şîretanê merdimî nêkeno, şîretan tewş tetbîq keno no vate vajîyêno. Yanî, mi waşt ti karo baş

bikî la to karo hîna nêbîyaye/xirab kerd.

Dayê/maye weledî erzena: Roja teng a. Tu kes etrê tu kesî de nîyo. Çi kes çi kesî rê nêetirîyêno. Zaf dijwarîye/tengane de bîyayîş.

De bê memire!: De bê naye qebul bike û hêrs mebe! De bê vera nê karî/gureyî yan zî na xeletî/ xeta sebir bike û ver mekewe! Ez nika senî hêrs nêba yan zî ver nêkewa!

De bê nê herî na lay/vaye ra viyarne/ravîyarne!: b. De bêrîn na here na vaye ra derbas bikîn!

De bêrîn na here na vaye ra derbas bikîn!: Ez senî nê meseleyî hel bika? Ez senî nê halê xirabî miyan ra bivejiya. Helkerdişê nê gureyî zaf zor o. Wexto ke gure beno girift, çiyêko çewt/ çors beno, no idiom vajîyêno.

De biwere!/To werd!: Ahan/han to rê; to dî, ti senî raştê belaya xo ameyî! To cewabê xo girewt! Ox bo; to vatêne “ney”, de bivîne!

De gidî del!: De hadê ha! Ha yellâ!

De gidî de, mela/înşalah şima nika bîlasebeb ra bidê pêro!

De ti/tu û Homa!: Ti û bextê xo. Ti û ujdanê xo. Ti bi xo bifikirî û qerar bide. De ti senî munasib vînenî wina bike.

defê hawarî/hewarî cenayîş: destpêkerdişê belayêk, sebubbîyayîşê bela û musîbete; pêrodayîşî rê amade bîyayîş

defê şeytanî cenayîş: pêverdikîye, fitnetîye kerdiş; şer û pêrodayîş vetiş

defterê kanî/kehenî akerdiş: çiyanê viyarteyan dimakewtiş, newe ra meseleyê kanî/verênî akerdiş

dekewtiş binê yewî: yew tehsnayış, heşê yewî/yewe tadayîş; yewî/yewe rayîr ra vetiş, xapitiş/ xapênayış

Eyşane *dekekwe binê Fatma*, heta ke a xapite/xapênay û viste mîrdî dima/rey.

dekewtiş cilan: 1) bêdestmajîya cinî, halê adetî yê cinî 2) zacilanîya cinî; wextê doman/gede/ tutardîşê cinî

dekewtiş cile (cile kewtiş): nêweşîya girane de, cile de bîyayîş, nêweşê binê cayî bîyayîş

dekewtiş qirika yewbînî/yewbînan: yewbînî/yewbînan de xire-cir kerdiş, sert munaqeşe kerdiş

dekewtiş torra yewî/yewe: dekekwiş miyanê destanê yewêkê/yewêka nebaşî/nebaşê

Zilfi hol merdim o la *dekekwe torra cinîyêka xirabe!*

Dele Bexdad/Bexda de bilawo, kutik tîya ra şino: Cinîye (makî) boçe têşano; waştişê aye yo cînsî estbo, camêrd (nêrî) do dima şiro/sêro.

Delê, ez zana ti nêeskena mi bigirê/bigîra la ti kutikan bi mi hesnena!: Ez zana ke to ra çiyê nêno la qelebalixê to weş nîyo. Ti mi miyanî şarî de şermezár kena.

Delilê mergî nêweşî ya: Eke merdim derg û dila nêweş mend, peynî merg o.

dengeser/dengiser/dengsere bîyayîş: goş nêdayîş şîretan, goş kesî nênayîş, goşa xo yewî/kesî nênayîş; rikin bîyayîş, sey xo kerdiş

derba xo rind zanayîş: baş/hol zanayîş ke çi ca ra yan zî kê ra derbe/zerar/hîle ameya/ameyo

Derbe derbe ra nêşermayena: 1)Gama ke merdimî da yewî/yewe ro, ganî (gerek) hesabê xo û derbwerdişî zî biko 2)Dest û lepê her kesî estê.

Derbe gina pîze ro, va “Ax piştîya/paştîya min!”: Eke piştîya merdimî biqewet/qewetine bo, merdim tenya û bêkes nêbo, kes nêşkeno bido merdimî ro yan zî tada ro merdimî biko.

derdê serê derdan: derdo newe û zêdeyo ke ameyo derdanê verênan ser; derdo zêde-bar

derdê ... téra bîyayîş: çiyê nebaşî/xirabî bi vîrê ... ameyîş; birînê ... teze bîyayîş

derdê ... téro girêyayîş: çiyê nebaşî bi vîrê ... ameyîş; derdin û xemgîn bîyayîş

derdo bêderman bîyayîş: derdo ke daruyê ey nêvînîyêno bîyayîş, meseleyî rê çarevînayîş bêimkan yan zî zaf-zaf zehmet bîyayîş

Dere nêvînenê çaqan şemernenê: Bê ke meseleyî fam bikê her çiyî rê bêwext amade benê. Verê wextî, lezkanî mudaxele kenê. Qewetê xo bîlasebeb xerc kenê.

derg û dila kerdiş: diqor-hîrêqor vatiş, tekrar-tekrar qisey kerdiş; hera-hera bi detayañ ïzeh kerdiş

derg û pehn kewtiş/meredîyayîş: 1)sera-ser raqelibîyayîş 2)piştî/paştî ser erd o ginayîş 3)zaf nêweş yan zî rincan kewtiş

dersa Şeytanî dayîş: zaf çî zanayîş; fenek/qurnaz bîyayîş; mizirîye

Derzinî bierzê erd nêginena: Zaf-zaf qlebalix o; mërdimî zaf ê.

dest akerdiş: parse kerdiş, geşt gêrayîş; xalo-xalo kerdiş

dest bi xo kerdiş: 1)ver a vejîyayîş; pêrodayîş 2)meseleyêk de wariştiş; muqawemet kerdiş

dest bi yewbînan dayîş: pîya/têreyde têgêrayîş; piştî bi yewbînan dayîş; gureyêk/meseleyêk de ardimê yewbînî kerdiş

Dest bierzo dare, bin ra qelênenô: Zaf biqewet o; zaf xurt o; zaf xo ser o yo; palewan o.

dest dayîş Quran ro: b. **dest Quran ro dayîş**

Dest destî ra wazeno: Merdimî ci dabo kamî, ganî (gerek) reyna ey ra biwazo.

Dest destî ser ra yo: Zanayîş û qewetê her kesî sey pê nîyo.

Dest destî şuweno, dest agêreno rîyî şuweno: Her çî wezifeyêkê xo esto. Çiyo tay/qicek çiyanê girdan/pilan virazeno.

dest eştiş/vistiş: 1)ardim kerdiş 2)dest bi ... kerdiş, dest pêkerdiş 3)bi nîyeto xirab (bi şehwet) yewe tacîz kerdiş

Dest eşt binê goşî: Dest bi vatişê deyîran/lawikan kerd.

dest eşt goş: b. **dest eşt binê goşî**

dest mîyanê rûnî/ruwenî de bîyayîş: bilîyê/belîyê karêkê zaf muhîmî bîyayîş

dest Quran ro dayîş: pê Quranî sond wendiş, bi nameyê Quranî sond wendiş, Quranî ser o sond werdiş

dest ra ameyîş: heqê karêk/gureyêk ra ameyîş; derheqê çiyêk de westa bîyayîş, mahir bîyayîş; wayîrê qudretil bîyayîş

dest ... ra nêbîyayîş: hes kerdiş; ... ra mird nêbîyayîş; ca de verdayîşê ... nêwaştiş; terkerdişê ...

nêwaştiş

No vate sey nezaketî zî vajîyêno. Mavajî:

Destê mi şima ra nêbeno la ganî ez şêrî gureyê xo ser.

dest ... ra nêkerdiş: hes kerdiş; ... ra mird nêbîyayîş; ca de verdayîşê ... nêwaştiş; terkerdişê ... nêwaştiş

dest ... ra şutîş: hêvîya xo ... ra birnayîş, fek ... ra veradayîş

dest ra xelisîyayîş: binê tesîrê yan zî kontrolê ... ra azad bîyayîş, serbest bîyayîş, serbest mendîş

dest ser kewtiş: musayîş, bander bîyayîş

dest ser nayîş: teslîm girewtiş; devistiş binê kontrolê xo; îşxal kerdiş

dest û lingan ra bîyayîş: seqet yan zî leng bîyayîş; kokim/pîr bîyayîş; helhelîyaye bîyayîş, qewet ra kewtiş

dest û lingî pîze kewtiş: cayê hereket kerdişî, berih, ebr, dorûver, meydan ro merdimî teng bîyayîş

dest û lingî ... ra serdin bîyayîş: hewes nêmendiş; êdî/hinî sey verê ... ra hes nêkerdiş; hêvîya xo ... ra birnayîş

dest verê fekî resayîş: feqîrîye û tengane ra vejîyayîş; hetê maddî/debare ra halê merdimî weş bîyayîş, bê muhtacbîyayîşê kesî debara xo kerdiş

dest xo kerdiş: b. **dest bi xo kerdiş**

desta-dest: pir de, ca de, hema/hima; bê ereyvistiş, bê ereykewtiş; wext de; teze-teze; german-germ

destakerde bîyayîş: zaf comerd bîyayîş

destan bê ... ewniyayîş (bi destanê ... ewniyayîş): b. **destanê ... ra ewniyayîş**

destan ra herînayîş/erêneyayîş/girewtiş: malo newe ney la oyo xebitnaye/kan herînayîş

destan ser o gêrayîş: 1)xizmet kerdiş; xizmetkar/destirma bîyayîş 2)karo sivik/şenik kerdiş, karê/gureyê ke destî ver de yê kerdiş

destan ser o girewtiş/tepîştîş: zaf qîmet bi ... dayîş; ro merdimêk izet û îkram kerdiş; ... rê izet û îkram kerdiş

destanê ... ra ewniyayîş: 1)hetê maddî ra muhtacê ... bîyayîş 2)binê hukmê/selâhiyetê ... de bîyayîş

destçepeliye kerdiş: zexeliye kerdiş; hîle û xurde kerdiş; heramwerî kerdiş; karo xirab kerdiş; pizlekîye kerdiş

destdergiye kerdiş: 1)bi zor çiyê yewî girewtiş; çîyo ke heq nêkerdo waştiş yan zî girewtiş; bi neheqî çiyê rê wayîr vejîyayîş; hêrişkar bîyayîş; zordarî kerdiş, neheqî kerdiş; bêhuqûqiye kerdiş 2)hetê cinsî ra tecawuzkar bîyayîş

desteveng ameyîş: b. **destveng ameyîş**

desteveng bîyayîş: b. **destveng bîyayîş**

desteveng fetiliyayîş/agêrayîş: b. **destveng fetiliyayîş/agêrayîş**

destewişkiye: b. **destwişkiye**

destê binê kerra/kemere bîyayîş: mecbûrê ... bîyayîş; muhtacê ... bîyayîş; bêçare bîyayîş

destê ... derg bîyayîş: zaf cayan de xebera/qisaya/qala ... vîyartiş; zaf cayan de merdimê ... estbîyayîş; xurt bîyayîş

Destê hukmatî derg o: Hukmat vera (hemberê) kesî xurt o, qewet û îmkanê ey zaf ê, eşkeno xo bireshno her ca.

Destê kefilî qewlike/cuzdanî ser o yo: Gama ke merdim yewî/yewe rê kefil bi, ganî (gerek) zirarê/zîyanê xo zî bido verê çiman.

destê merdimî ... ra serdin bîyayîş: 1)qelsbîyayîşê/zeîfbîyayîşê hêvî; bêhêvîye 2)keyfê merdimî êdî/hinî karêk rê néameyîş 3)kar ra mird bîyayîş; ... ra kerixîyayîş

Destê min nêşî ro ... : Ez qîymışê ... nêbîya. Zerrîya mi pê veşay. Mi zerrî pê veşnay.

destê payîzi bîyayîş: êdî/hinî payîz nêzdî bîyayîş; sereyê payîzi bîyayîş

destê ... ra nêqedêneyîş: binê tesîrê ... de mendîş ra nêeskayîşê kerdişê gureyêk
Hesen zî wazeno ma reyde bêro/bîyo veveye la *destê babê xo ra nêqedênenô*.

Destê to tern bî/bê: Destê to weş bî/bê. Destê to zergûn bî/bê.

Destê to zergûn bî/bê: Destê to weş bî/bê. Destê to tern bî/bê.

destê xo bi xo girewtîş: 1)bi tedbir têgêrayîş/hererekterdiş; bîlasebeb mesref nêkerdiş; xo israf ra pawitiş 2)ro destê xo miqate bîyayîş; destdergiye nêkerdiş; bi kontrol/îrade têgêrayîş

destê xo dekerdiş pistinê xo: 1)bêçare mendîş 2)mihîr mendîş, mat/şaş mendîş

destê xo Homayê xo ra nêkerdiş: rast qisey kerdiş; iftîra û nege ro kesî nêkerdiş; heq û huquqê tu/çı kesî vîndî yan zî încar nêkerdiş

destê xo pa nênayîş: b. **destê xo ... ra nênayîş**

destê xo pistinê xo kerdiş: b. **destê xo dekerdiş pistinê xo**

destê xo ... ra esteritiş: ... qedênayîş yan zî ca de verdayîş

destê xo ... ra nêkerdiş: ... ra nêaqitîyayîş, ... ra dûrî nêkewtiş

destê xo ... ra nênayîş: destê xo ro ... berz nêkerdiş, nêdayîş ... ro; piro nêdayîş

destê xo ... rê pêser nayîş: ... rê itaet kerdiş

destê xo sere ra kerdiş: 1) vera yewî/yewe nermek têgêrayîş/hererekterdiş 2) lavay kerdiş; bi xebera/qisaya/qala weşe qisey kerdiş

destê zimistanî ... bîyayîş: êdî/hinî zimistan nêzdî bîyayîş; sereyê zimistanî bîyayîş

destgirewte/destgirewta bîyayîş: çıkış bîyayîş

destikê destê ... bîyayîş: ... şenik/sivik dîyayîş, pê kay/kaye kerdiş; xo dest ra berdiş û ardiş; xo dest a gérnayîş/çarnayîş

Ti vanî qey ez *bîya destikê destê ey*, mi beno û ano.

destmaj teng bîyayîş: îhtiyacîya destawkerdişî bîyayîş, îhtiyacîya tebervejîyayîşî/tuwaletşîyayîşî bîyayîş

destmajê xo sıkitiş: destawa xo kerdiş, teber vejîyayîş, şîyayîş bi tuwalet

destveng ameyîş: 1)xo dest de çiyêk (hedîye ûsn.) nêardiş; venga-veng ameyîş, veng û varit ameyîş 2)tu çiyê bi dest nêardiş

destveng bîyayîş: 1)bêceke/bêhacete bîyayîş 2)bêpere bîyayîş

destveng fetiliyayîş/agêrayîş: çîyo ke hêvî kerdibi nêdiyayîş, çîyo ke pawitêne nêdiyayîş; çîyo ke ro ey gêrayêne peyda nêkerdiş/nêqefilnayîş

destwişkiye: 1)temakarîye, çilekîye/çelekîye; çıkışîye 2)derbgiranîye

dewleta ey/aye xebîtiyayîş/gureyayîş: hetê maddî ra ey/aye rê werê ameyîş; kar û gureyê ey/aye rast/baş şîyayîş; talihê/şansê ey/aye gureyayîş

deyîre/dêre eştiş ser: ser o deyîre/kilame vatiş

deynê fekê xo dayîş: soz û qerarê xo ser o vindertiş, xebera/qisaya/qala xo tepiştîş; wayîrê sozê/xebera/qisaya/qala xo bîyayîş

dêgelange çarnayîş: çî vayî ver şanayîş; mesele zaf gird/xişn kerdîş; têw dayîş

Dêso ez to ra/rê vana, vevvê ti bieşnawe: Ez raste-rast to rê/ra nêvana, yewnayî ra vana labelê seke ez to ra/rê vana, ti zî fam bike.

Dêza nêvîneno/nêvînena, çembilan nano/nana pa wa: Her çiyî rê qulpêk vîneno/vînena.

Hema başe-baş xebere nêşnawita, ser o keno/kena temam. Ro çîyan zêde keno/kena, vêşî vano/vana.

Dêza va “Ez zerrêñ/zernin a”; kondêzî va “Ez ha mîyanê to de!”: 1)zanayeyî/zanaya rê yan zî ehlê karî rê –bê ke îcab biko- kar tarîfkerdiş, aqil bi kesê zanayeyî yan zî ehlê karî dayîş 2)xo vera yewê şinasî/nasî de tewirêna musnayîş (nawitiş)

Di lingê min kerdî ferêk/yew sol: Ez bêçare verdaya. Zaf rî/ri na min ser û leza-lez waşt ke ez nê karî/gurî bika. Dinya ro min kerde tenge, ecele kerd û bi îsrar û leze waşt ke ez nê karî bika.

di lingî ca bîyayîş: zaf nêzdî de bîyayîş.

Didanê ey/aye zî mi de şinê war: O/a zî bi mi eşkeno/eşkena. Çimê ey/aye zî mi ra birneno. Zeftê ey zî mi ser reseno.

didanê/dindanê ... hûmaritiş: bêedebî kerdîş, bêşermîye/bêterbiyeyîye kerdîş; ro yewî sere çarnayîş; mizirîye û zingurîye kerdîş

didanî qirrike de bîyayîş: kone bîyayîş, zexel bîyayîş, bêbext bîyayîş; bêbextîya/xayîniya xo zereyê xo de nimitiş

didanî seqênayîş: xo ro pirodayîşê yewî/yewe kudnayîş; qandê/seba pirodayîş yan zî zirardayîşî firsend/firset pawitiş

didanî şidênayîş: sebr kerdîş; xoverro dayîş, xover dayîş; idare kerdîş, viyarnayîş

dim pa wa nayış: 1)ey/aye rê xetayêk/qusûrêk peyda kerdîş 2)ro çiyêk qusûr peyda kerdîş 3)îlawe kerdîş

dima/dime kewtiş: 1)taqîb kerdîş; rêçe/şope/herinde çarnayîş 2)cigêrayîş 3)feh ... ra vera nêdayîş

dima/dime nêkewtiş: 1)taqîb nêkerdiş 2)feh ... ra veradayîş; goş pa nêkewtiş, goş ... nêşanayîş

Dimê kutikî se serre zî dekerê qalib, reyna/hêna sey xo yo; rast nêbeno!: Merdimo -yan zî çîyo- ke xirab o û tim sey xo maneno, nêbedilîyeno, rast û başbîyayîşê ey zehmet o.

dingildoşe ro dayîş: meseleyêk de çî nepixnayîş, mîyanê şarî de vila kerdîş; hawar-haware; çiyêko nebaş de nat-wet qisey kerdîş

Dinya bêro/bîyo pêser!: Mumkun nîyo. Nêbeno, bêimkan o. Hemeyê dinya pêresê û vajê, reyna/hêna yê xo ra nêno/nêna war. Fikrê xo de sebat/rike keno/kena.

Dinya bi dor a: Tim eynî merdim hîrayîye yan zî tengane de nêbeno, dora merdimanê bînan zî yena. Roje esta ke merdim bi xo tengane yan zî hîrayîye de yo, roje zî esta ke embazê merdimî no hal de yo.

dinya biveşo müyeka ... tede çinbîyayîş: 1)zaf bêxem/laqayt bîyayîş, çîyekî xo rê derd nêkerdiş 2)bê mal û milk bîyayîş

Dinya dinya de, Mendo cinîyan de: Her kes xo rê xebitîyêno/gureyêno la ... ha yê xo de; keyfê xo de yo. Xemê ey/aye nîyo. Ey/aye rê çîna bar nîyo, yê xo de yo/ya.

Dinya dorî ya, malêza çorî ya, serra yew ê qerî ya yew ê gewrî ya: Timûtim başı/keyfweşî/şayî yê merdimî nêbena, dewran ge destê merdimî de yo ge zî destê sewbînan de.

dinya gî de verdayîş: karo zaf pîs kerdiş, medirnayîş, hetiknayîş

dinya Homayî: zaf-zaf, xeylê, gelek

dinya ra bar kerdiş: merdiş, wefat kerdiş, dinya ra wenayîş, dinyaya xo bedilnayîş/vurînayîş, şîyayîş rehmet, resayîş bi rehma Homayî

dinya ra wenayîş: b. **dinya ra bar kerdiş**

dinya verê çimanê ... de siya bîyayîş: êdî/hinî çîyê ra hes nêkerdiş; keyfê ... ciwîyayîşî rê nêameyîş, zaf bedbîn/pesimîst bîyayîş

dinya werdiş: 1)zaf bi hirs bîyayîş, çimvêşan bîyayîş 2)zaf cayan de xebitîyayîş/gureyayîş, vêşî pere qezenc kerdiş 3)zaf hukum kerdiş, hukmê ey/aye zaf ramitiş

Dinyanêdiyan/tunedîyan rê laj bîyo, warişte cucikê/bilikê ey ci/tera kerdo serê berî de aliqnayo: Merdimê ke çî nêdiyo û bê esalet ê, gama ke benê wayîrê çîyêk xo şaş kenê; gureyanê bêfesalan û xaman kenê.

dinyaya ... tarî bîyayîş: 1)ameyîşê rojanê xiraban; bela serê ... de ameyîş, bela ... serî ser de ameyîş 2)şoke bîyayîş

dinyaya xo bedilnayîş/vurînayîş: merdiş, wefat kerdiş, dinya ra bar kerdiş, dinya ra wenayîş, şîyayîş rehmet, resayîş bi rehma Homayî

dirî bîyayîş: qumaşo ke her di rîyê/hetê ey zî benê û bêastar o

Dizd dizd bo, şewê Homayî zaf ê!/Dizd bibo, şewê tarî zaf ì! (Merdim dizd bo, şewê tarî zaf ì!): Ger merdim wayîrê qerarê xo bo, nîyetê ey bibo û biwazo çîyê biko wext hîra yo.

Dizd keye ra bo, gure asan o!: Merdimo ke mîyanê keye, kar yan zî meseleyêk de bo, hîna weş bi sirranê ê cayî/çiyî zano. Coka zî yewê xerîbi ra weşêr eşkeno zirar/xisar bido ê cayî yan zî kesî ro. Eke rêber/rayber zere ra bo gure asan o.

Dizd û wayîrê keyî bi yewbînî/yewbînan hesiyayê: Mesele bîyo eskera. Her di hetî zî bi nîyetê/fikrê/pirêzeyê yewbînanzanê; her di hetî zî yewbînan ra weş haydar ê.

Dîk mireno çimê ey silo de manenê: Cayê werdê dîkî, wetenê ey silo yo; ey rê silo hêca/erjaye yo. Wazena wa merdim sarayan de zî biciwîyo, reyna/hêna çimê merdimî tim wetenê xo de, ca û warê xo de yo.

dîkê serê siloyî bîyayîş: Tim –sey verê- çilek bîyayîş, xuyê xo nêteriknayîş. Dîkî erzenê embarê xeleyî, gama ke uca ra vejîyêno reyna şino serê siloyî, nequr keno.

dîkê şerî/pêrodayîş bîyayîş: 1)tim lej/pêrodayîş vetiş, kamca lej esto mîyan de bîyayîş, pêrodayîş ra xo nêdayîş kîşte 2)jêhatî bîyayîş

Dîkî rê silo layiq o: Heq nîyo ke merdim qîymet bido nemaqlan. Eke merdim qîymet bido merdimanê nêbiyayeyan/nebaşan, ê hem xo û hem zî merdimî hetiknenê.

Do birayê mastî yo: 1)Eke do tam sey mastî nêbo zî her di eynî çiyî ra virazîyênê; nêzdîyê yewbînan ê, eslê inan yew o. Eslê merdimî zî ci bibo, merdim zaf ra tay o yo. 2)Ti do/ko fam bikî! (Na mana de sey tehdîti vajîyêno.)

Ti vinde hela ez ci ana to sere! Ti ko o wext fam bikî ke *do birayê mastî yo* yan ney!

Do waştîş û kodik nimitîş nêbeno: Eke merdim çî biwazo ganî (gerek) merdim bi xo zî gure de bibo, wezîfeyê xo bîyaro ca. Bimesûlîyet têgêrayîş lazim o.

dohnê ma serê ma de dayîş: 1)Ma ra girewto, ro ma (ma rê) îkram kenê. 2)Ma ra musayê, musnenê ma.

dolabêk rê destik nêbîyayîş: tu gureyêk rê nêbîyayîş, çîyekê rê nêbîyayîş; ê şêlikan nêbîyayîş; bêkar bîyayîş, betal û tiral bîyayîş; bêmeharet bîyayîş; bêhuner bîyayîş

doman/gede/tut/pit ver şiyayîş: verê wextê xo hemlê xo vistiş/ardîş, domano merde ardiş

Dorê ma hewr o!: Nika vinde, qisey meke! Nika ma nêşenê asan/rehet qisey bikîn, merdimî nêzdîyê ma de estê! Wa xeberdayîşê/qalîkerdişê ma nika bimano!

dorûver weçinayîş: dorûver/çorşme pak kerdiş; çî-mî arêdayîş, pel û potî arêdayîş

dostê/yarê dadîya xo ra “baba” vatis: 1)heta ke kar û gureyê xo bivîno, girêya/hoka xo pey fino weş qisey kerdiş 2)dişmenîya xo yan zî kînê xo leze-lez eşkera nêkerdiş, nêdayîş teber 3)bi fekweşîye gureyê xo dîyayîş; her kesî de weş viyarnayîş; tu kes xo ra nêheridnayîş

Duaya kutikan qebul bibîne ka asmên ra esteyî/kateyî bivarî: Tenya bi vatis çiyê nêşino sere. Gani (gerek) kar bêro/bîyo kerdiş ke hema merdim bireso meqsedê xo.

Dûrî ra şer weş o: Kar/gure dûrî ra weş aseno; seke asan/rehet bo la eke merdim kewt mîyan hema zano ke cend zehmet o.

MEŞÛ BERFİN

M. MÎRZANÎ

Qay Berfinan

Cêr bi guîn, cor bi guîn
Bîye laserî çimanî mi vîn
Meşû Berfin, meşû Berfin
Aşm şîya, ti meşû Berfin.

Ma kerdî teber welat' xo ra
Kaşan' xo ra, kuşan' xo ra
Kincê hêsîr bidîn mi ra
Ez bermenâ, ti meberm Berfin
Aşm şîya, ti meşû Berfin.

Ma macîrî d', feqîrî di
Bêkesî di, hêsîrî di
Qalan weşan waştî rî verdi
Tij şîya awi, ti meşû Berfin
Aşm şîya, ti meşû Berfin.

Pisperikî ma kewtî mi vîr
Deştan' xo ra erzîyawa dûr
Heywaxî mi r', heywaxî mi r'
Ez weşawa, ti meveş' Berfin
Aşm şîya, ti meşû Berfin.

Ma gelekî tenyatî ant
Însanî mîyan d', ummeti mîyan d'
Ma milkuiz mênd mîyanî “gawiran” d'
Ez şîkawa, ti meşikî Berfin
Aşm şîya, ti meşû Berfin.

Qelem keder ma rî daw ta
Xo med' vilê m' “gawir”î heta
Vanî qedyayê yew newet a
Ti mi dest ra meşû Berfin
Aşm şîya, ti meşû Berfin.

Şew bermenâ, roj bermenâ
Mi ra şewi z' şarmîyena
Na ri geyrena, we ri geyrena
Ez bîya vîn, ti vîn mebi Berfin
Aşm şîya, ti meşû Berfin.

Nizana k' Homa ma ra vano se
Emro k' vanî eke no yo se
Wa mergi z' bîyor ek' camêrd o se
Ez metîn a, ti senîn a Berfin?
Aşm şîya, ti meşû Berfin.

DERÛDORMEYÊ BONGILANÎ RA TAYÊ VATEYÊ VERÊNAN

Arêkerdoxe: Aysena KURDÎ

Bedenî xwi lîş re, fekî xwi kufir re, qelbî xwi paye re bipaw!
Berî xwi rind racon, cîranî xwi meker dizd!
Birînê destî bena weş, yê ziwanî nîbenâ weş.
Birînê ziwanî dejnena zê birînê kalmî.
Ceyo ku adir çineye bû dun nêvejîyeno.
Çareyê her derdî esto.
Çim yo pencera wa, qelb pê vîneno.
Çimî di yî, gueşî (goşî) di yî, fek yo wo; zaf bivîn, zaf bieşnaw, tay vaj!
Çita (çi) dekerî nonî xwi o vejîyeno kûçikê ti.
Dar pê pel xwi rind a.
Dara bêmêwi kera nîerzîyena ci.
Dest destî ser re wû (yo).
Desto ku (ke) bido, cefa nîvîneno.
Duest aw o (o kes o) ku eybî ti ti re vano.
Duest (dosto) raştîkîn moneno mîse; şonîyan kueno ta (takuweno),
tarî de xwi belu keno (keno belu).
Eybî şarî verî mi d' o, eybî mi pê (pey) mi d'o.
Ez çiqa ti re hes bikerî zî ez xwi re hes kena zê (sey) ti.
Fersendî xiravî roj hîri dorî kuweno merdimî dest, fersendî rindî
serrêk doreki kuweno merdimî dest.
Gunî dima guni bîk ceza gunê verîya, xêr dima xêr bîk mukafat xêrî
verîn o.
Gurî erî (ewro) bawê sivê meverd.
Heqî biza kuel (kole) biza estirîn rê nîmoneno.
Herî mi şî sefer omî, rênê (reyna) zî herî verî yo.
Heskerdişo towr (tewr, en) rind wexto holi de nîbi zêd, wexto xirabi
de nîbi kem o.
Hetanî ti xwi rind muejnenî/muejnena ra, rind bi!
Heyato bêfaîde mono zê mergo lez bîero/yeno.

Îlim wayerî xwi keno gird.
Însano qij xirûrî yi gird o.
Karm dar, derd însanî weno.
Kenê (kêney) xwi medi her kesî, ê her kesî bîya.
Keso ku şeytanî dire (dir) wertax (bi ortaxî) cew biromo, simerî yi tik-têna geno (têna gêno).
Keso ku zaf qisey bikero zaf dor (rey) zî poşman beno, keso ku sikuti bû silometî vîneno.
Keyî şarî kiçî rê war nîbeno.
Keyî zurkerî veşîyo kiçî (çoyî, kesî) bawer nêkerdo.
Kom hîri sivay ro (rew) wirzo, newi yo roji fineno xwi desti (qezenc keno).
Kom qîmetî non û suel (sol) nîzonû, aqibetî yi yi çim re vejîyeno.
Kû (ko) çiqas berz bû teyr padusena (dusena pa).
Kû nêreseno kûy, însan reseno însanî.

BOGLATE BÎYE

Nevzat GEDİK

Ne erdî qebul kerd ne kî asmêni
Ne kesî dî ne kî hesna
şarî ricim kerd
goşê mi bî derg

Boglate bîye
Adire gazyaxî bîye
Kar-xezale bîye
Genimgunîye bîye
Çimbeleke bîye
Kila çimanê xo,
Ê koye Sîpanê Xelate bî

Sêneyê aye mi rê zîyare bî
Mi tede huzur diyene
Guna û movale xo vetêne, rişnêne
Uca; tepîya bîyene gunekar

Bîyêne pur û pak
Bîyêne qilêrin, xirabîn, cunis

Hem xêr bîye
Hem guna

Ge kar bîye
Ge zerar

Hamnan û zimistan bîye
Sitara mi bîye
Waştîya mi bîye
Çiyede mi kî nêbîye.

DORMEYÊ PALÎ RA ÇEND ÎDYOMÎ

Arêkerdoxe: Xezala ŞARIKÎ

adir fek ra varayîş
Aşik kelibîya, def dirrîya.
awk xu meşki r' şûnayîş
Binî awk ra şinû, bueçey yî hî nibena.
Cindî* bîy kuarî, kelle berd do Eyşê Farî.
çeq çimûn ra perrayîş
çimî rahar a mendîş
çimî tarî bîyayîş
Darb esta, darb ser ra wa.
dende mîyûn kotîş
dinya heta-hat gêrayîş
Emêl mi, binî lingûn mi ra warzîn* xirabî.
Ga pîr, Saringa* sur.
Gûn o meşû, lueley pêş.
Her arda bueç (boçe), bueç di verda.
Herê ma û herê şima, deza* û dedkeyna* cîe (cê)* yê.
Heşî fek ra verra dîya, kewt vergî fek.
heşt zûn ya xeberî dayîş
hîş sare ra vetiş
In mîr hama zaf awk darenû we.
Keynê mi tu rî vûn, veywê mi ti bieşnaw.
Kuryeko* hotpare xuezî wenî ⁽¹⁾.
Kûm mi musa, tirkî musa (resa) ⁽²⁾.
la derzîn a kerdiş ⁽³⁾
la derg û kilm cîe (cê) ver ra nayîş

1. Kuryeko hotpare xuezî wenî: Yanî “malo ke wayîrê ey zaf bibî bêwayîr maneno û telef beno”.

2. Kûm mi musa, tirkî musa (resa): Yanî “herkes mi rê dewayê pîliye keno”, “xo mi ser o keno pîl”.

3. la derzîn a kerdiş: zaf derg/derge kerdiş

lingî erd o mendîş
lingî qirbûn sarî kerdiş
Merrî nişka şîyerû quley dîyesî yo (ro), gezi best bueçey xu wa.
mîyûn di kueyûn di mendîş
mîyûn di werdiş, perr di kotiş
murey guîn bîyayîş, mil ri bîyayîş (⁴)
muy teli vindertiş
naley paydayîş
Nîe (nê) dada*, nîe (nê) baba, dest pa da, verra da.
pê peme wa sare birnayîş
pirnik hawa ra gêrayîş
pirnik wedartiş
pirnikûn ra ûmeyîş (ûmayîş)
pirnikûn ra ardiş
purtî (potî) xu awk di vetiş (⁵)
qapax sarî ser d' perrayîş
sak bure ûntiş (⁶)
sare-çim şikitîş
sare-çimî tey verdiş (verdayîş) (⁷)
sarewişk bîyayîş
sarey weşî r' nuşte kerdiş
ser o nûn werdiş, bin di cil birnayîş
sîr waharî, wahar sare kuwayîş
Şehri* sare ra, qin teber ra.
tîr sare vindertiş
ver a cil kuwayîş (⁸)
ver-pey gêrayîş

4. murey guîn bîyayîş, mil ri bîyayîş: nege (botan, iftira) yewî bîyayîş

5. purtî (potî) xu awk di vetiş: debara (idareyê) xo kerdiş, xo rê wayîr vejîyayîş

6. sak bure ûntiş: încar kerdiş, xo nêneyîş

7. sare-çimî tey verdiş (verdayîş): medirnayîş (medernayîş), zaf xirab kerdiş, herimnayîş (heremnayîş), berbat kerdiş

8. ver a cil kuwayîş: pawitiş, piştigirewtiş, piştidayîş, destdayîş, destgirewtiş

vilîk çequerî verî çimûn ra gêrayîş
 wir d' lingî yew sol kerdiş
 xişn bîyayîş, ver kîşt kotiş
 xu sêr pelûn a niardiş
 xu tal kerdiş
 zincî çiqirnayîş

(*)cind: cine

cîe (cê): yewbînî, yewbînan

dada: dayê, dadê; maye, dadî

deza: datîza, dedza, lajê apî

dedkeyna: datkêna, kênaya apî

kuryek: korek, gilgil

Saring: Nameyê yew wareyî yo.

şehri: şari

warzîn: hurzenê, werzenê, wardenî

SARADISTRIBUTION

Seba taqîbkerdena medyaya kurdî, seba peydakerdena kitab, kovar, rojname, kaset, CD û vîdeoyanê kurdî, çi yê neweyî çi yê kehenî (bi sorankî, kirmancî/zazakî, kurmançî), bêrênenê Înternet de kitabxaneyê kurdî yê Europa yê tewr kehenî ra biewnîyêne (nîyadê).

Erje û eseranê xo yê kulturî baş biseveknê!

www.saradistribution.com

Tel/fax: +46 8 331229

saradistribution.com ji bo lêçûna (taqîba) li medya kurdî, ji bo peydakirina pirtûk, kovar, rojname, kasêt, CD û vîdeoyêne kurdî, çi yênuh û çi jî kevin (bi soranî, kirmancî/zazakî, kurmancî), fermo werin li Înternetê serdanekê li *kevintirîn pirtûkxaneya kurdî ya li Ewrûpayê bikin.*

Nirx û berhemên xwe yê çandî baş biparêzin!

www.saradistribution.com

Tel/fax: +46 8 331229

ÇIMÛN XWI AK'

Mela Mehemedê MURADAN

Çimûn xwi ak' bûn' in alem ra bi îbret
Îbret tera bigîri, ti mekir xeflet

Êr' firset ho tu dest di, biker zikr û taet
Siwa ti pueşmûn bêñ', qîyamet d' nîv'nêñ rehet

Bîya xwi vîr bin' kerrûn a qebra tarî
Uca di ti têna yî, bêdost û yar î

Emel tu yê salih ançax tu rî heval o
Tu rê fayde taet o, nê ku milk û mal o

Ger serf kerd tu malî xwi cêy xirabî
Wey halî tu rî perîşûnî bi tabî

A tarî di dûnî tu ri eqrebî, marî
Vûnî: Biv'ne ezab. Çunkî ti gunekar î

Êr' ti bib' hişyar, bigîr cehdê Peyxemberî
Terk mekir sunnetê ay Ehmedî serwerî

Bib' aşiq bejn û balayê Taha û Yasîn
Bik' fedâ cûnî xwi qey ay Ehmedî tehsîn

Şew û ruej wesfûn yi bid' zê bilbil bi zarî
Vaj: Zerrê mi seyda dûmî ya, gul' tu tarî

Cîgêr mi eşq tu ra veyşo w' biryan kebab o
Bik yi ser awê lutf' nezer xwi, o bêtab o


Birîndarê tîrûnê nefş û şeytanî ya el-aman
Îmdadî mi rî bê ti, ey peyxemberî axirzeman

Çunkî ti hebîb û mehbûb î qey ay Xaliq' alî
Tim ti hê ma vîr di, nîbêni qelbî ma ra xalî

Ger destî ma nigîr, halî ma xirab û perîşûn û
Bê tu ma rî çîn o yo umîdêk, her kes pê zûnû

Hezar, hezar hezar selat û selam
Ruh' tu pak' seri b' şew û ruej dewam.


KITABÊ KIRMANCKÎ (ZAZAKÎ)-XI



52-Çetin Satici, Roja Sîpîye, Weşanên Elma, İstanbul, 2003, 87 r.




53-Munzur Çem, Hewara Dêrsimî, Weşanên Deng, İstanbul, 2003, 478 r.




54-Hamdi Ozyurt, Lajeko Zimbêlin, Weşanxaneyê Vateyî, İstanbul, 2003, 18 r.




Roşan Lezgîn, Binê Dara Valêre de, Weşanxaneyê Vateyî, İstanbul, 2003, 72 r.




55-M. Malmisanij, Pîre û Luye, Weqfa Kurdî ya Kulturî Li Stockholmê, Stockholm, 2004, 24 r.



56-M. Malmisanij, Rindê Kincan Xo ra Dana, Weqfa Kurdî ya Kulturî Li Stockholmê, Stockholm, 2004, 20 r.



57-M. Malmisanij, Rindê Heywanan Nas Kena, Weqfa Kurdî ya Kulturî Li Stockholmê, Stockholm, 2004, 20 r.



58-M. Malmisanij & Mehmet Uzun, Rindê Baxçeyê Kaloyî de, Weqfa Kurdî ya Kulturî Li Stockholmê, Stockholm, 2004, 28 r.

Rindê Vana Ê Min a



Tekst: M. Malmisanij, Mehmet Uzun
Resim: Leyla Atak

Rindê û Keyeyê Xo



Tekst: M. Malmisanij, Mehmet Uzun
Resim: Leyla Atak

59-M. Malmisanij & Mehmet Uzun,
Rindê Vana Ê Min a, Weqfa Kurdî
ya Kulturî Li Stockholmê, Stock-
holm, 2004, 20 r.

60-M. Malmisanij & Mehmet Uzun,
Rindê û Keyeyê Xo, Weqfa Kurdî
ya Kulturî Li Stockholmê, Stock-
holm, 2004, 12 r.

Filit û Gulîzar

Kosan na resimler: Seyîdxan Kurîj
Resim: Leyla Atak



61-Seyîdxan Kurîj, Filît û Gulîzar,
Weqfa Kurdî ya Kulturî Li
Stockholmê, Stockholm, 2004, 28 r.